

Nsia yi Mbwe yi ósono

LUKE OSOMO

Wu me mukaana wu a Nsia yi Mbwe yi ósono Luke. Luke ka áli ntumu a Yiisu o, lo nde ákakala ya baara ba bákabulugye ya Yiisu ya nde ágyighili ofwulu bo bu óli bumweë bu Yiisu. Na mbihi, nde ásono mukaana wu kundaa mbwuru wu budziri wu a nkwumu Teofile. Luke áli ngaa-libughu ya nde ási midzye milagha ya ntumu Poole. Na kara li baara bwohono ba básono Bisoño bibi Ngili, yini a nde wuulu ka áli mu-Dzwife o. Lo nde ágyighili osuo ekulu ki ba-Dzwife mpaala bandughu ba nde bagyighili osoolo nande Yiisu áli.

Luke ályele ti ba-Dzwife áli bákakebe mukogho wu aayabvwuhu bo. Me Mubvwuhu wu óbili mibighili mi Nzaami munsa Bisoño bibi Ngili bu bályele ti Nzaami sa agweghe nde. Nzaami ásoolo ti kala ti Mubvwuhu ka li o, baara ba nsie yohono sa bapfighili. Mu obo nde ágweghe Mwana a nde wu a mbunu mpaala abvwuhu baara ba mansie mwohono ba baasa kana mu nde. Mwana munde me Yiisu-Kriste.

Luke ásuó munsa mukaana wu bunu-abo báburu mwana wu, mandagha ma ágyighili nde na yulu a nsie yi, ya mandagha ma áluo nde baara, lipfu li nde ya osighili o nde na kara li baara ba bákpi. Yiisu áluo baara ya litumu lwohono, nde ádzuhu babyele, nde ábyi mifulu mi mibi, nde agyighili mandagha malagha maala baara bákinjimi mu mo.

Luke ásono mukaana mukimi: Bigyighili bi bantum. Nde ályele mandagha ma mábwi mu bantum obaana bu bágyene a Yiisu ku yulu ya bunu bakriste bátsanama mu mansie mwohono.

Bu me bu baakakabala mukaana wu:

- Mandagha ma mátsiini Luke mu osono mukaana wu a Nsia yi Mbwe wu (1.1-4)
- Bunu-abo báburu Dzã Muboghoru ya Yiisu (1.5–2.52)
- Maluo ma Dzã Muboghoru (3.1-20)
- Liboghoru li Yiisu ya bunu satana ágyeele nde mpaala abwihi nde mu masumu (3.21–4.13)
- Yiisu áyikala ku Ngalile (4.14–9.50)
- Yiisu pala mu Ngalile mu ogye ku Yerusaleme (9.51–19.27)
- Liminji li Yiisu lili masini na yulu a nsie: Mumfwunu ya lipfu li nde (19.28–23.56)
- Yiisu sikhili mu lipfu (24.1-12)
- Yiisu monono kundaa binduono bi nde ya bagyene a nde ku yulu (24.13-53).

Ebaana e ndagha

¹ Ta Teofile, baara balagha baagyele osono mandagha ma máluru na kara li bihi-a-be.

² Bo básono mo bwunu a bu ólyele bihi bam-pughulu ba bámono mandagha mamo obaana mu ebaana, ya ba bágyi litumu lili oluo mandagha ma Nzaami.

³ Me mu obo, mehe si aansagha ogyighili ogya-haba mandagha mwohono ma máluru obaana ku ebaana, ya me aamono ti me mfaana osono mo ya bunkere.

⁴ Me ndi mu osa obo mu kuulu we baghala enganma ki mandagha ma báluo we.

Nsia yi a oburu o Dzã Muboghoru

⁵ Mu matala ma óli Erode mukogho wu a etsulu e nsie kii Yude, óli ya ngaa a Nzaami mutsyini nkwumu a nde Dzakari. Nde áli mumõ ña kara li emvununu ki bangaa ba Nzaami baba dzumu li Abiya. Ya Elidzabete mukala a nde áli musi dzumu li Aarõ.

⁶ Bo bansa buolo báli baara baba bunsumu ña busu bu Nzaami, ya bo bákagyighili onama mikyene ya mikele mi Mfumu myehene.

⁷ Lo bo ka báli a mwana o, mu kuulu Elidzabete áli etini, ya bo bansa buolo áli ayi binmini.

⁸ Etsughu etsyini, Dzakari ákasala esala ki bungaa bu Nzaami munsa nzo a Nzaami yi nene mu kuulu bibye bíli bitsughu bibi mukubu a emvununu e bo mu osala.

⁹ Ti bu óli epfu ki bangaa ba Nzaami, bo báti empa ki nga-a-bwehe * ya básuolo Dzakari mu osomo mu ngwumu a Mfumu yi a ngili mu oyitsughu malyimi mama mpihi yi mbwe.

¹⁰ Mpwumu a baara yohono yíli ku mbala mu okasamana, mu matala mama otsughu malyimi mama mpihi yi mbwe

¹¹ Ngye-yulu a Mfumu ayamonono kundaa Dzakari, ya atemene mu kwogho kii babaghala, ña bele a ebini ki baakatsughu malyimi mama mpihi yi mbwe.

* **1:9 1.9** ña baakata dzeke mu osuolo elogho bwunu we mbwuru. Lo okata mu okatubu mburu bwunu we bitsulu bi miti mu nsie

¹² Bu amono ngye-yulu munde, nde ápanjama ya ámono nzalamweẽ.

¹³ Lo ngye-yulu ályele kundaa nde ti:

«Dzakari ka amono nzalamweẽ o!

Nzaami aagyughu lisamana li we.

Mukala a we Elidzabete sa aburu we mwana wu baghala.

We sa gwa nde nkwumu Dzã.

¹⁴ We sa kala kunsã esee ki elagha

ya baara balagha sa banene mu oburu o nde,

¹⁵ mu kuulu nde sa akala mbwuru wu munene ña busu bu Mfumu.

Nde akala ka anjma bviini bwunu we mala ma maakolo o.

Nde sa akala wu alwulu mu Mufulu a Ngili obaana matala ma aakala nde munsã mweẽ a ngughu a nde.

¹⁶ Nde sa abvurulu basi Isarayelee balagha kundaa Mfumu, Nzaami a bo.

¹⁷ Nde sa atswama ku nkulu, ña busu bu Nzaami, mu mufulu ya mu lileene li Eli.

Mu obo nde sa abvurulu eyenẽ ña kara li bataara ya baana ba bo,

ya osa kuulu ti babo ba baagwene okagyughu Nzaami babagha munzeele wu a baara banga-a-bunsumu. Obo nde sa asa kuulu ti baara bakala a dzyi li likughu mu okihi Mfumu.»

¹⁸ Mu obo Dzakari ályele kundaa ngye-yulu ti:

«Bunu-abo me aangyahaba ti mandagha mamõ sa matswighi? Buulu me ayi enjmini ya mukala a me si maanjmini.»

¹⁹ Ngye-yulu ábvuhulu kundaa nde ti: «Me ndi Ngabiryele, me ndi ña busu bu Nzaami mu

osalala nde. Nde aatumu me mu oyabili ya we, ya oyagwa we Nsia yi Mbwe yi.

²⁰ Buulu we aabihi osa kana mu mi aandyele me we, we sa kala nkini ya we ka afiritsughu ndagha o tee matala ma ootswughu mandagha ma. Mandagha ma sa mamorjono mu matala ma ógwaa Nzaami.»

²¹ Mu matala mamo mpwumu a baara yíkakebe Dzakari yíkinjimi mu kuulu nde ákagyili munsa nzo yi a ngili.

²² Bu ayapala, nde ka áfirikaleene obili ya bo o, ya bo bábaghala ti nde ndagha ábwana a yo munsa nzo yi a ngili. Nde ákabili ya bo mu bilyimi ya ákala nkini.

²³ Bitsughu bi nde bibi esala bu bikughu, Dzakari ábvughuru ku nzo a nde.

²⁴ Na mbihi oño, Elidzabete mukala a nde ákeghele†. Mu obo nde ási bangoono bataana baala nde ásweme. Nde ákabili bu:

²⁵ «Litala ndagha yi oosi Mfumu mu me! Nde aamono ti ma matala ma omaha me budzwa na mihi mi baara bwohono.»

Ngye-yulu yalyele nsia yi a oburu o Yiisu

²⁶ Na óto yimi li Elidzabete mu bangoono basemene, Nzaami ágweghe Ngye-yulu Ngabiryele ku bvulu lili Nadzarete mu etsulu e nsie kii Ngilile,

²⁷ kundaa mutughu mutsyini wu ógwi Dzodzefe, musi dzumu li mukogho Dabvide bilyimi. Nkwumu a nde Mari.

† 1:24 1.24 Bagha yimi

²⁸ Ngye-yulu bu asomo munsa nzo a nde, ályele kundaa nde ti: «Kala ya esee, we li a bwehe, Mfumu li ya we!»

²⁹ Mari ákinjimi ku olagha bu agyughu mandagha mamu. Nde ka ábaghala bunu-a-bo mboro oyo yíkadzyi olyele o.

³⁰ Ngye-yulu ályele kundaa nde ti:
«Mari, ka mono nzalamweẽ o, mu kuulu we aabagha bwehe kundaa Nzaami.

³¹ We sa kegehele ya we sa buru mwana wu baghala, we sa gwa nde nkwumu Yiisu.

³² Nde sa akala mbwuru wu munene ya sa bata nde Mwana a Nzaami wu a Ensoõ-Yulu. Nzaami sa agwa nde likubu li Dabvide, nkagha-kwuru a nde.

³³ Nde sa akala mfumu a dzumu li Dzakobe mu mibvu ya mibvu.

Emfumu e nde ka ekala a masini o.»

³⁴ Mari áfwulu kundaa ngye-yulu ti: «Me nkini aangyahaba babaghala o. Bunu-abo ndagha oyo yikughu okala?»

³⁵ Ngye-yulu ábvuhulu kundaa nde ti: «Mufulu a Ngili sa agya mu we ya mpaana a Nzaami wu a Ensoõ-Yulu sa yifughu we ti edzwunu. Me mu obo mwana wu akala aaburu we sa akala wu a ngili, ya sa bata nde Mwana a Nzaami.

³⁶ Ya mono, Elidzabete, musi dzumu li we edzighi sa aburu si mwana wu baghala munsa bunjini bu nde, nde wuulu baara baakalyele ti nde li etini, mu li yimi li nde ayi bangoono basemene,

³⁷ buulu, Nzaami ka aakakuono a ndagha o.»

³⁸ Ya Mari ályele ti: «Me ndi musala a Mfumu, nyaã myehene mikala kundaa me ti bwunu a bu lyele we.» Na mbihi onjo ngye-yulu ábulusihi nde.

Mari gyene yitala Elidzabete

³⁹ Mu bitsughu bibye, Mari ágyene mu maswa-maswa ku bvulu limō lili etsulu e nsie kii minguo mimi Yude.

⁴⁰ Bu ato oko, nde ásomo munsa nzo a Dzakari ya ágwi Elidzabete mboro.

⁴¹ Na ogyughu Elidzabete mboro yi ógwi nde Mari, mwana a nde ányinji munsa mweẽ. Elidzabete álwulu mu Mufulu a Ngili,

⁴² ya ákehe engubu mu likyi lili mpini ti:
«Mu bakaha bwohono, Nzaami aabvulu osemi we, ya liseme lí nde lili mu mwana wu aaburu we!

⁴³ Me nande ndi mu kuulu ngughu a Mfumu a me agya kundaa me?

⁴⁴ Mu matala ma aangyughu me mboro a we, mwana aanyinji mu esee munsa mweẽ a me.

⁴⁵ Esee kundaa munde wu si kana ti mandagha ma oolyele Mfumu mu nde, sa makeele.»

Ekwumu e Mari

⁴⁶ Mu obo Mari ályele ti:
«Endwu e me esyighi Mfumu.

⁴⁷ Ya mukolo a me aalwulu mu esee mu nkooro a Nzaami, mubvwuhu a me.

⁴⁸ Mu enganma mu kuulu nde aakaala mihi mi nde kundaa me musala a nde wu gwene a mupfunu. Obaana mu matala ma, biseene byehene sa bilyele ti me nga-a-ese,

49 mu kuulu Nzaami nga a Lileene aagyighili
mandagha ma manene kundaa me.
Nkwumu a nde yili yi a ngili.

50 Nde aakamono babo ba baakagwa nde budziri
nyĩ mu biseene ya biseene.

51 Nde aasala mu mpini a myaã mi nde, litumu li
kwogho e nde

ya aatsala baara ba bali a limpampana.

52 Nde aamaha mikogho mu bimfumu,
ya akuhubu baara ba bagwene a limpampana.

53 Nde aaluhu bupfulu bulagha kundaa babo ba
bali a nzala,

ya aabvurulu bisini myaã-a-myaã.

54 Nde aayabaha baara ba Isarayelee basala ba
nde,

ya nde aalibili mweẽ mu osuo ngebe a nde,

55 Bwunu a bu ályele nde kundaa bataara ba bihi,
mu nkooro a Abarahame ya dzumu li nde
mu matala nswe matala.»

56 Mari ási ku bele a bangoono batere mu nzo a
Elidzabete. Na mbihi oño, nde ábvughuru ku bula
bu nde.

Baburu Dzã Mubogho

57 Matala ma ooburu Elidzabete máto, ya nde
áburu mwana wu baghala.

58 Baara ba báli bitaa-taa bibye ya basi dzumu li
nde bagyughu nsia yi a bubwe ba ósi nde Mfumu.
Mu obo bákala mu esee ya nde.

59 Mwana bu akuhu bitsughu mpuomo, bo
bágyi mu osohobo nde nzo a mbaa. Baara
bwohonon bákadzyi ogwa nde nkwumu a taara a
nde Dzakari.

⁶⁰ Lo ngughu a nde ályele ti: «Pele, sa bagwa nde kwumu Dzã.»

⁶¹ Bo bályele nde ti: «Mu dzumu li we ka oli ya nkwumu oyo o.»

⁶² Mu obo bafwulu Dzakari mu bilyimi nsa nkwumu nde adzyi ogwa mwana a nde.

⁶³ Dzakari bu aluomo mana baya, ásono: «Nkwumu a nde Dzã.» Baara bwohono bákinjimi.

⁶⁴ Ya ñaana oño, Dzakari áleene ofiribili ya nde ábwi osemi Nzaami.

⁶⁵ Mu obo, baara bwohono ba báli bitaa-taa bibye bámono nzalamweẽ, ya mu etsulu e nsie kii minguo mimi Yude, baara bákabulubili mu mandagha mo mwohono mamo.

⁶⁶ Baara bwohono ba bákagyughu ndagha oyo bákatsimi ya bákagwa bifwulu kunsá mukolo ti: «Mwana wu nande àakala? Mu enganma, Mfumu li ya nde.»

Dzakari bighili mu ekwumu

⁶⁷ Dzakari, taara a mwana, áli alwulu mu Mufulu a Ngili ya ábighili mandagha ma:

⁶⁸ «Nyaã masyighi makala kundaa Mfumu, Nzaami a Isarayelee,
mu kuulu nde aayabaha baara ba nde ya okwulu bo.

⁶⁹ Nde aagwi bihi Mubvwuhu wu a mpini ña kara li bateghele ba mukogho Dabvide, musala a nde.

⁷⁰ Ti bu átswama olyele nde mu matala ma makulu mu minma mi mibighili mi nde mimi ngili.

- 71 Nde ali ágwi misiini ti sa ákwulu bihi-a-be ña
myaã mi bataara ya ña myaã mi babo
bwohonon ba baakabele bihi-a-be.
- 72 Me mu obo nde aamono bankagha ba bihi nyĩ
ya aalibili ogwihini o nde kuu ngili mweẽ.
- 73 Mu engañma Nzaami áli álaba mukihi kundaa
Abarahame, nkagha a bihi-a-be,
- 74 ti sa akwulu bihi-a-be ña myaã mi bataara
mpaala lisalala nde ku ogwene a nza-
lamweẽ.
- 75 Mu kuulu bihi likala baba bungili ya baba
bunsumu ña mihi mi nde, mu bitsughu
byehene bibi bumweẽ bu bihi.
- 76 Ya we, mwana a me, we sa kala mubighili a Wu
a Nkara Yulu,
mu kuulu we sa dzyara ña nkulu a Mfumu mu
obwehẽ nzili a nde.
- 77 Ya mu osuo kundaa baara ba nde bunu-a-bo
bakughu obvwughu bu babagha kolokolo
a masumu ma bo.
- 78 Mu nkooro a mukolo wu a nyĩ wu a Nzaami a
bihi,
otsyeme o nde sa osehene ña yulu a bihi, ti anga
tala lili ku yulu,
- 79 mu otsehebe babo ba bali kunsá mpyibi,
ya kunsá edzwunu kii lipfu ya mu obiri myili mi
bihi-a-be mu nzili yi a edzuunu.»
- 80 Mwana ákakulu ya ákabagha mpini mu mu-
fulu. Nde ákabulukala kunsá syehe tee mu matala
ma áyapala nde ña busu bu basi Isaraye.

2

Baburu Yiisu

¹ Mu bitsughu bibye, Sedzare Ongusute ágwi litumu bataã mutala a baara bwohono ba bali ku nsie a emfumu e Rome.

² Otaã mutala a baara oko kuu nsomo, básí ko mu matala ma ólí Kirinyuse mfumu a etsulu e nsie kii Siiri.

³ Baara bwohono bákayisono mankwumu ma bo, mbwuru mbwuru, mu bvulu li ndeme.

⁴ Dzodzefe si ámara ku bvulu lili Nadzarete mu etsulu e nsie kii Ngalile ya ágyene ku Beteleeme, bvulu li báburu mukogho Dabvide mu etsulu e nsie kii Yude, mu kuulu nde áli musi dzumu li Dabvide.

⁵ Nde áyisono nkwumu a nde ya Mari, ndughu a nde wu ágwi nde bilyimi. Nde áli a yimi.

⁶ Naala bo nkini ku Beteleeme matala ma oburu máto nde.

⁷ Nde áburu mwana wu baghala, mwana a nde wu a nsomo. Ádzyinji nde kunsá misyene mi biko ya álaha nde ña ebini ki baakatwulu bilogho bi ookadza banyama, mu kuulu mu nzo yi baakabwana bandzyi, bo ka bábagha ebini ki baagyeneme o.

Ngye-yulu moñoño kundaa minkaala bibuolo

⁸ Mu etsulu e nsie ekye, ólí a minkaala bibuolo mi míkaluhu mpyibi ku ebiri mu ókabulukebe bibuolo bi bo.

⁹ Ngye-yulu a Mfumu mutsyini ámoñoño ña nkulu a bo, ya otsyeme ku onene ófi kundaa Nzaami óyadzyi bo. Bo bámono nzalamweẽ yi alagha.

¹⁰ Lo ngye-yulu ályele kundaa bo ti: «Ka likala a nzalamweẽ o, mu kuulu me aayandyele be

mukyene wu mubwe, wu akala aagwa etswumu e be kyehene esee ki elagha.

¹¹ Lolo li, mu bvulu lili Dabvide, baaburu mu nkooro a be, mubvwuhu. Nde me Kriste, Mfumu.

¹² Ki me elyimi ki liigyahaba be nde: Sa limono mwana wu badzyini kunsu mipa mi biko ya baalaha nde na ebini ki ookadza banyama.»

¹³ Naana onjo mu ensihibi, mpwumu a bangye-yulu baba mikaã mi bambumbulu baba mayulu, yiyabvununu ya ngye-yulu munde. Ya bo bázwi osyighi Nzaami ti:

¹⁴ «Nsia kundaa Nzaami mu ensoõ-yulu, ya edzu-unu na nsie, kundaa baara ba adzyi nde.»

Minkaala bibuolo mi yimono Yiisu

¹⁵ Bangye-yulu bu bábulusihi bo mu obvughuru ku yulu, minkaala bibuolo míbili bo-a-bo: «Litswe ku Beteleeme, mpaala liyitala mandagha ma maabwi, ma oolyele bihi-a-be Mfumu.»

¹⁶ Ya bo bágyene maswa-maswa ya bámono Mari, Dzodzefe ya emwa-mwana ki bálahu munsu ebini ki ookadza banyama.

¹⁷ Bu bamono nde, bo bályele mandagha mamu ma bályele kundaa bo mu nkooro a mwana munde.

¹⁸ Bo bwohonu ba bágyughu mandagha ma ólyele minkaala bibuolo bákinimi ku olagha.

¹⁹ Mari ákabunu mandagha mu mwohonu ma ya ákatsimi mu munsu mukolo a nde.

²⁰ Ya minkaala bibuolo, míbvughuru, mikabulusyighi Nzaami ya ogwa nde baana, mu myehene mi bágyughu ya bámono bo, mu kuulu myehene míli bwunu a bu ólyele bo ngye-yulu.

Basohobo Yiisu nzo a mbaa

²¹ Bitsughu mpuomo bu bikughu, matala mama osohobo mwana nzo a mbaa máto, bágwi nde nkwumu Yiisu, yi ólyele ngye-yulu, nsomo ngughu a nde akeghele.

Babiri Yiisu ku Nzo a Nzaami

²² Bitsughu bibi otsehebe nyuru bu bikughu, bwunu a bu ókatumu Mikyene mi Moyidze, bo bágyene a mwana ku Nzo a nzaami ku Yerusaleme mu osuo nde kundaa Mfumu.

²³ Bwunu a bu básono mu Mikyene mi Mfumu ti: *Nswe mwana wu a nsomo wu baghala wu baaburu sa bagwaghala nde kundaa Mfumu.*

²⁴ Ya bo bágwi ekaba, bwunu a bu ókalyele Mikyene mi Mfumu, *bidzu-dzughu byele, bwunu we mabeeme mwolo, maala nkini ka maayele o .*

Simeõ ya emwa-mwana Yiisu

²⁵ Ku Yerusaleme áli oli ya baghala mutsyini nkwumu a nde áli Simeõ. Nde áli mbwuru wu bunsumu ya wu aakagwa Nzaami budziri, wu áakakebe obuono o Isarayeleye, ya Mufulu a Ngili áli ña yulu a nde.

²⁶ Mufulu a Ngili ályele kundaa nde ti nde ka kpa o tee ku aamono nde Kriste Mfumu.

²⁷ Mu obo, Mufulu a Ngili ágyene a nde ku Nzo a nzaami, mu matala ma óyasomo taara ya ngughu a emwa-mwana e bo Yiisu mu Nzo a nzaami, mu osa mimye mi ókatumu Mikyene mu nkooro a nde,

²⁸ Simeõ ágwolo mwana, ásyighi Nzaami ya ályele ti:

²⁹ «Mfumu, mu matala ma, nyaã musala e we agye mu edzuunu, ti bu áli alyele we.

- 30 Mu kuulu mihi mi me miimono obvwughu o we,
31 ku átswama ogyighili we ɲa busu bu baara bwohono.
32 Oko me otsyeme ku akala oosuo omonono kundaa bikaana, ya nsia kundaa baara ba we, Isaraye.

Mandagha ma ólyele Simeō mubighili mu Yiisu

33 Taara ya ngughu a Yiisu bákinjimi bu bagyughu mi ókalyele Simeō mu nde.

34 Simeō áseme bo, ya ályele kundaa Mari, ngughu a Yiisu ti: «Mono, mwana wu li ɲa mu nkooro a obwa ya otemene kuu baara balagha mu Isaraye, ya mu okala elyimi kiili baara balagha akala baagwene odzyi kye.

35 Nde sa asuo mansweghe ma mali kunsu kara li mikolo mi baara balagha. Mu mi mitala weme, lipee sa litobolo we mukolo, mpaala mi ookatsimi baara balagha kunsu mikolo, baara basoolo mye.»

Ane, mubighili wu mukaha

36 Óli si mubighili wu mukaha, nkwumu a nde Ane, mwana a Fanwele, mu dzumu lili Asere. Nde áli ayi enjmini, ya bamvulu yini a nsama ási ku bala.

37 Na mbihi onjo, nde ásomo bupfiili, tee ɲa áto nde bamvulu makwumu-mpuomo ya bana (84). Nde ka ákagye la ya Nzo a nzaami o. Nde ákasalala Nzaami mpyibi ya mwii, mu okakuru muswele mu bala ya mu okasamana.

38 Mu matala maana mamo, nde si áli onjo, mu okabvurulu matuono kundaa Nzaami, ya

mu okabulubili mu mwana munde, kundaa bo bwohono ba bákakebe okwulu o Yerusaleme.

Obvughuru ku Nadzarete: Bufulu bu Yiisu

³⁹ Dzodzefe ya Mari bu bamana ogyighili myehene mi ookatumu Mikyene mi Mfumu, bo bábvughuru ku bvulu li bo ku Nadzarete, mu etsulu e nsie kii Ngalile.

⁴⁰ Emwa-mwana ékakulu ya ékabagha mpini, ékalwulu mu bunsughu ya bwehe bu Nzaami búli mu kye.

Yiisu mu Nzo a Nzaami

⁴¹ Nswe mvulu, taara ya ngughu a Yiisu bákagye ku Yerusaleme ku kyiri kii Paake.

⁴² Yiisu bu ato bamvulu kwumu ya buolo (12), nde ágyene ya bo, bwunu a bu óli epfu e kyiri.

⁴³ Bitsughu bi kyiri bu bifi, mu matala ma bákabvughuru bo, mwana Yiisu ábulusyili ku Yerusaleme, kuulu taara ya ngughu osoolo we.

⁴⁴ Bo bákatsimi ti nde áli munsá mpwumu. Bu badzyara etsughu etsyini mu nzili, ya babaana okabulusagha nde kundaa basi dzumu li bo, ya kundaa ba basoolo bo.

⁴⁵ Lo, bu bagwene omono nde, bo bábvughuru ku Yerusaleme mu okabulusagha nde.

⁴⁶ Bitsughu bitere bu bikughu, bo báýabagha nde mu Nzo a Nzaami, ábwi nsini ña kara-a-kara li baluo-mikyene, mu okagyughu bo ya mu okagwa bo bifwulu.

⁴⁷ Baara bwohono ba bákagyughu nde bákakinjimi mu mayele ma nde, ya mu mamvuru ma nde.

⁴⁸ Taara ya ngughu bu bamono nde, bákinjimi, ya ngughu a nde ályele kundaa nde ti: «Mwana a

me, mu emakye we aasi bihi bu? Mono ati, me ya taara a we liikpi mu okabulusagha we.»

⁴⁹ Lo nde ábvuhulu kundaa bo ti: «Mu emakye be lili mu okabulusagha me? Bunu, be ka ligyahaba o ti me mfaana okanama mandagha ma Taara a me?»

⁵⁰ Lo bo ka bábaghala ndagha yi ályele nde kundaa bo o.

⁵¹ Na nseele, nde ákumunu ya bo ku Nadzarete. Nde ákagyughu taara ya ngughu a nde. Ya ngughu a nde ákagyighili okebe mandagha mwohonon mamo munsá mukolo a nde.

⁵² Ya Yiisu ákakulu mu bunsughu, mu nyuru ya mu bwehe na nkulu a Nzaami ya na nkulu a baara.

3

Maluo ma Dzã Muboghoró

¹ Mu mvulu wu a kwumu ya bataana (15) wu a emfumu kii Tibere Sedzare mukogho wu a nsie yi a Rome, Ponse Pilate áli mfumu wu a etsulu e nsie kii Yude, Erode mfumu wu a etsulu e nsie kii Ngalile, Filipe mwana a taara a nde mfumu wu a etsulu e nsie kii Iture ya kii Tarakonitide, ya Lisanyase áli mfumu wu a etsulu e nsie kii Abilene.

² Ane ya Kayife báli bakwuru ba bangaa ba nzaami baba nsomo. Me mu matala mamo Nzaami ályele mandagha ma nde kundaa Dzã, mwana a Dzakari, ku syehe.

³ Dzã ákadzye mu etsulu e nsie ki eli be-bele a mwele wu a Dzurudẽ. Nde ákabuluta mukwughu

wu: «Ligiyinji mayele, libagha oboghoru kuu ogyinji mayele mu kolokolo a masumu.»

⁴ Ti bu básono mu mukaana a mubighili Edzayi ti:

«Likyi li munde wu li mu okakehe engumbu ku syehe:

Ligyighili nzili a Mfumu,

lisa mankwulu ma nde makala nsumu!

⁵ *Nswe mbye sa badzyighi yo*

Nswe munguo ya nswe nkwichi sa bakirili bye bipere,

Mafuru ma manzili sa basa mo nsumu,

Manzili ma mali bikumu-bikumu sa basa mo elehe

⁶ *Ya baara bwohono sa bamono obvwughu o Nzaami.»*

⁷ Nde ákalyele kundaa mpwumu a baara yi áakagya kundaa nde mu oyaboghoru ndiri: «Etswumu kii bampili! Nande aasuo be bu obara nkehe a Nzaami yi li mu ogya?

⁸ Mu obo, lisuo bigyighili bi bifaana ya ogyinji mayele, ya ka libaana okabululyele mu beme o ti: «Taara a bihi Abarahame», buulu me ndyele ti: mu mameẽ ma, Nzaami kughu otehebe baana kundaa Abarahame!

⁹ Ekwu ayi bamaatwulu ŋa yulu a midza mi muti: nswe muti wu gwene oburu bimburu bi bibwe, lo nde wu okpaa ya wu otsili ku mbaa.»

¹⁰ Mpwumu a baara yífwulu nde ti: «Lo bihi emakye lifaana osa?»

¹¹ Nde ábvuhulu kundaa bo ti: «Munde wu li a binkuru byele, agwa etsyini kundaa munde wu gwene a kye, ya munde wu li a bi-odza, asa bumõ si.»

¹² Mintolo-mpagha si mígyi mpaala baboghoru bo, ya bályele kundaa nde ti: «Muluo, bihi emakye lifaana osa?»

¹³ Nde ábvuhulu kundaa bo ti: «Ŋa liikatolo mpagha, ka likaluhu mutala wu bátumu o.»

¹⁴ Bambumbulu si báfwulu nde ti: «Lo bihi emakye lifaana osa?» Nde ályele kundaa bo ti: «Ka ligwohono kii mbwuru mu mpini o, ya ka lipfiri mpya o, lo liikakala a esee mu mufuru wu a ndaa-beme. Ya likala a esee mu nzi yi baakafiri be mu ngoono.»

Dzã Muboghoru gwi nsia a munde wu li mu ogya

(Mat 3.11-12; Mar 1.7-8; Dzã 1.24-28)

¹⁵ Baara bákabulukebe ya bákabulugwa bifwulu kunsu mikolo mi bo mu nkooro a Dzã, ti ampe nde me Kriste.

¹⁶ Mu obo Dzã ábvuhulu kundaa bo bwohono ti: «Me ndi mu okaboghoru be mu madza, lo munde wu bvulu me mu mpini li mu ogya. Munde wu bvulu me, ya me ka nkughu onyana musyi a bikoghoru bi nde o. Nde sa aboghoru be mu Mufulu a Ngili ya mu mbaa.

¹⁷ Nde aakwara mukele mu kwogho e nde mu okabala bimburu ya nsele. Nde sa akwu bimburu kunsu etaghala e nde, lo nde sa atsughu nsele ku mbaa yi aagwene okadzimi.»

(Mat 14.3-4; Mar 6.17-18)

¹⁸ Mu maluo ma malagha mama ogwa mpama, Dzã ákabulutsala Nsia yi Mbwe kundaa baara.

¹⁹ Lo Dzã áfyee Erode, mfumu a etsulu e nsie, mu nkooro a Erodyade, mukala a mbwee a nde, ya mu mandagha mwohono ma mabi ma ási nde.

²⁰ Na yulu a mandagha mwohono, Erode ásyimi Dzã ya álo nde mu boloko.

Baboghoru Yiisu

²¹ Bu bamana oboghoru baara bwohono, Yiisu si báboghoru nde. Mu matala ma ákabuono nde, yulu lídzubulu,

²² ya Mufulu a Ngili áyasughuru na yulu a nde mu efaana kii beeme, ya ndagha yídzumu mu yulu: «We li mwana a me wu mukolo, me aankamono esee mu we.»

Bankagha-kwuru ba Yiisu

²³ Yiisu áli a bamvulu bele makwumu-matere (30) na ábaana nde esala e nde. Nde áli bwunu a bu ókabulutsimi baara ti mwana a Dzodzefe, wu áali mwana a Eli,

²⁴ Mwana a Matate, mwana a Lebvi, mwana a Meleki, mwana a Yanayi, mwana a Dzodzefe,

²⁵ mwana a Matatyase, mwana a Amose, mwana a Nawume, mwana a Eseli, mwana a Nangayi,

²⁶ Nangayi mwana a Maate, Maate mwana a Matatyase, Matatyase mwana a Semeyi, Semeyi mwana a Yoseke, Yoseke mwana a Yoda,

²⁷ Yoda mwana a Dzãanane, Yowanane mwana a Resa, Resa mwana a Dzorobabele, Dzorobabele mwana a Salatyele, Salatyele mwana a Neri,

²⁸ Neri mwana a Meleki, Meleki mwana a Adi, Adi mwana a Kosame, Kosame mwana a Elemadame, Elemadame mwana a Ere,

²⁹ Ere mwana a Yiisu, Yiisu mwana Elyedzere, Elyedzere mwana a Yorime, Yorime mwana a Matate, Matate mwana a Lebvi,

³⁰ Lebvi mwana a Simeõ, Simeõ mwana a Yuda, Yuda mwana a Dzodzefe, Dzodzefe mwana a Yoname, Yoname mwana a Elyakime,

³¹ Elyakime mwana a Meleya, Meleya mwana a Mena, Mena mwana a Matata, Matata mwana a Natã, Natã mwana a Dabvide,

³² Dabvide mwana a Dzese, Dzese mwana a Obede, Obede mwana a Boadze, Boadze mwana a Sala, Sala mwana a Naasõ,

³³ Naasõ mwana a Aminadabe, Aminadabe mwana a Adimine, Adimine mwana a Arani, Arani mwana a Eserõ, Eserõ mwana a Farese, Farese mwana a Yuda,

³⁴ Yuda mwana a Dzakobe, Dzakobe mwana a Idzake, Idzake mwana a Abarahame, Abarahame mwana a Tera, Tera mwana a Nahore,

³⁵ Nahore mwana a Seruke, Seruke mwana a Rangawu, Rangawu mwana a Faleke, Faleke mwana a Ebere, Ebere mwana a Sala,

³⁶ Sala mwana a Kayiname, Kayiname mwana a Arafakade, Arafakade mwana a Seme, Seme mwana a Nowe, Nowe mwana a Lameke,

³⁷ Lameke mwana a Matusaleme, Matusaleme mwana a Enoke, Enoke mwana a Yarede, Yarede mwana a Maleleele, Maleleele mwana a Kename,

³⁸ Kename mwana a Enose, Enose mwana a Sete. Sete mwana a Adã, Adã mwana a Nzaami.

4

Satana gyelee Yiisu

¹ Mu matala ma ófi Yiisu ku Dzurudẽ, nde áli alwulu mu Mufulu a Ngili, ya Mufulu a Ngili biri nde ku syehe.

² Mu bitsughu makwumu-mana (40) Satana ágyeele nde. Nde ka ali áli elogho si etsyini o. Na bihi a bitsughu bi bye, nzala yifuru nde.

³ Satana lyele kundaa nde ti: «Kala ti we li mwana a Nzaami, lyele kundaa limeẽ li likighiri limpa.»

⁴ Yiisu bvuhulu kundaa nde ti: «*Basono bu, mbwuru ka li mweẽ mu yini a mampa o.*»

⁵ Satana biri nde ku nkara a yulu, ya mu mana tala, suo nde bimbumu bi nsie byehene,

⁶ ya lyele kundaa nde ndiri: «Me sa ngwa we litumu lwohono li, ya nsia a lo, mu kuulu kundaa me bágwi bye, ya me nkughu ogwa bye kundaa munde wu ndzyi me bye ogwa.

⁷ Kala ti we kunu mabuo na nkulu a me, lo lwohono tumu likala lili we.»

⁸ Yiisu bvuhulu kundaa nde ti: «Basono bu: *“Yini a na nkulu a Mfumu Nzaami a we, we faana okunu mabuo na nsie, ya yini a nde we faana osamana.”*»

⁹ Na nseele, Satana biri nde ku Yerusaleme, twulu nde ku yulu a nzo a Nzaami ya lyele nde ti: «Kala ti we li mwana a Nzaami, bwa ku nsie»,

¹⁰ mu kuulu básono ti:
«*Nde sa awa litumu kundaa bangye-yulu ba nde mu nkooro a we,*
Mpaala bo bakebe we.

¹¹ Ya ti: *Sa baseene we mu myaã,*
Mpaala kwulu e we enyaã okubu kya mu limeẽ.»

¹² Yiisu bvuhulu kundaa nde ti: «Básono si ti: «Ka gyeele Mfumu Nzaami a we o”.»

¹³ Satana amana ogyeele Yiisu mu bifaana byehene, bulusihi nde mu mana matala.

Yiisu gyene ku Ngalile ya baana oluo

¹⁴ Yiisu bvughuru ku Ngalile ya mpini a Mufulu a Ngili, ya nsia yitsanama mu etsulu e nsie kyehehe mu nkooro a nde.

¹⁵ Nde ákabululuo mu manzo ma ba-Dzwife mama lisamana, ya baara bwohono bákasa nde nsia.

Baara baba ku Nadzarete babihi Yiisu

¹⁶ Yiisu bvughuru ku bvulu li Nadzarete ku ákulu nde. Mu etsughu kii Sabate, nde somo nzo a lisamana a ba-Dzwife ti bu óli epfu e nde. Nde temene mu otala mandagha ma Nzaami.

¹⁷ Ya bagwi nde mukaana wu a mubighili Edzayi. Bu adzubulu nde, mono ebini ki básono ti:

¹⁸ «Mufulu a Mfumu li mu me,
Buulu nde aakili me maala,
Mu ogye a Nsia yi Mbwe kundaa bawe.
Nde aaweghe me

Mu ota mukwughu wu okwulu kundaa ba bali
mu manzo ma boloko,
Ya kundaa binkpa-mihi ti sa bamono,
Obvuhulu kunsá bumpoholo babo ba bali kunsá
kimini.

¹⁹ Ota mukwughu mu mubvu wu a bwehe bu
Mfumu.»

²⁰ Bu adzyi mukaana, bvurulu nde kundaa esala ya bwi nsini. Bo bwohono ba báli munsá nzo a lisamana babwi okatala nde.

²¹ Oño nde baana olyele kundaa bo ti: «Lolo li, bisono bi bi liigyughu be, biikeele.»

²² Baara bwohono báli bampughulu mu nde, ya bákakinjimi mu mandagha mama bwehe ma

mákapala mu muṇma a nde, ya bákalyele ti: «Bunu, wu ka li mwana a Dzodzefe o?»

²³ Nde lyele kundaa bo ti: «Me ngyahaba ti be sa lita me nkumu yi: “Ngaa, saha nyuru a weme.” Ya be sa lifirilyele me si ti: “Myehene mi liigyughu bihi mi aasi we ku Kaperenawume, yighili mye si mu etsulu e nsie e weme ki”.»

²⁴ Na mbihi oṇo, nde firilyele ti: «Mu engañma, me ndyele be ti: Ka oli a mubighili ti mumõ wu bákíhi mu etsulu e nsie e ndeme.

²⁵ Mu ngañma me ndyele kundaa be ti: Bap-fili ba bakaha báli balagha mu matala ma Eli mu Isarayelee, ṇa odzughubu yulu mu bamvulu batere ya bangoono basemene, ya munzyala ágyi mu nsie nsyini.

²⁶ Lo ka bágweghe Eli kundaa mupfili si mumo mu bo o, yini a ku Sarepeta, mu etsulu e nsie kii Sidõ, kundaa mupfili wu mukaha wu áali omo bágweghe nde.

²⁷ Banga-a-buala si áli balagha mu Isarayelee, mu matala mama mubighili Elidze, lo ka oli a si mumõ mu bo o wu bátsehebe, ṇa yulu a yini a Naamane musi Siri.»

²⁸ Bo bwohonon ba báli munsa nzo a lisamana bu bagyughu mandagha mamõ, bakolo nkehe.

²⁹ Batemene, bapaha nde ku mbala a bvulu ya babiri nde ku bele a mbye yi a munguo wu bátwu bvulu, mpaala batsili nde munsa mbye.

³⁰ Lo Yiisu ábululuru ṇa kara-a-kara li bo, ágyene o nde.

Yiisu saha baghala nga-a-mufulu wu mubi

³¹ Na mbihi oŋo, Yiisu ákumunu ku bvulu lili Kaperenawume mu etsulu e nsie Kii Ngalile. Oko nde ákaluo baara mu etsughu kii Sabate.

³² Baara bákakijimi mu nduo-nduo yi ákaluo nde, mu kuulu nde ákaluo ti mbwuru wu li a litumu.

³³ Mu nzo a lisamana óli ya baghala mutsyini wu áali a mufulu wu mubi. Nde ákehe engubu mu yulu ti:

³⁴ «Aa! Nsa ndagha yili ŋa kara li bihi ya we, Yiisu musí Nadzarete? Bunu, we bu aagyi mu oyapfihili bihi? Me nsolo we na nde li: We li wu a ngili wu oogweghe Nzaami!»

³⁵ Yiisu áfulu mufulu munde epama ya ályele ti: «Kuru muŋma a we, ya pala mu baghala wu!» Mufulu wu mubi ábwíhi mbwuru munde mu nsie ŋa kara-a-kara li baara, ya ápala mu nde ku ogwene a omweē nde mpara.

³⁶ Baara bwohonó bámono nzalamweē ya bákabili bo-a-bo ti: «Yi nki ndagha? Mbwuru li mu okabili mu litumu ya mu lileene kundaa mifulu mi mibi, ya mye mili mu okapala!»

³⁷ Ya nsia yítsaŋama mu nkooro a nde mu etsulu e nsie kyehene.

Yiisu dzuhu babyele balagha

³⁸ Na mbihi oŋo, Yiisu bu apala mu nzo a lisamana, yene ku nzo a Simō. Oko, buko bu Simō wu mukaha áli a mukaama wu a mpini. Baara basyama kundaa Yiisu mu nkooro a nde.

³⁹ Bu apfuŋumu ŋa bele a nde, Yiisu fulu mukaama epama ya mukaama pala mu nde.

N̄aana oño, mukaha munde, temene, bwi osalala bo.

⁴⁰ Bwihi bu buyili, baara bwohono ba báli a mabyele mama mawa-mawa, bayabiri mo kunda Ȳisu. Nde naã bo myaã ya dzuhu bo.

⁴¹ Mifulu mi mibi si mipala mu babyele balagha ya mu okabulukehe bingubu ti: «We me Mwana a Nzaami!» Lo Ȳisu ákafulu mye bipama, ya ka ágwi mye muswa mu obili o, mu kuulu mye míyahaba ti nde me Kriste.

Ȳisu yiluo mu Ngalile

⁴² Bwihi bu buki, Ȳisu bulupala mu bvulu ya yene ku syehe. Mpwumu a baara yibaana osagha nde tee bagyene ku áli nde. Bu bamono nde, bayeele osa myehene kuulu nde anyaã osihi bo.

⁴³ Lo nde lyele kunda bo ti: «Me mfaana oyiluo si Nsia yi Mbwe yi a Emfumu e Nzaami ku mabvulu ma make, kuulu me mu obo baaweghe me.»

⁴⁴ Oño nde yene mu okabululuo mu manzo ma lisamana mu etsulu e nsie kii Yude.

5

Ȳisu ti binduono bibi nsomo mbili

(Mat 4.18-22; Mar 1.16-20; Dzã 1.35-51; 21.1-11)

¹ Ȳisu áli átemene mu mukogho a bana lili Ngenedzarete. Mpwumu a baara yíyasa nde mpiji mu ogyughu Ndagha a Nzaami.

² Nde ámono mabwara mwolo ma bátwulu ŋa yulu a nseghe mu mukogho a bana. Ka óli a mbwuru mumo o, mu kuulu bilebe-banswi bísughuru ya bíkaswagha nkoho a bo.

³ Yiisu ákumu mu bwara butsyini bu búli bu bundaa Simō, ya áluomo kundaa nde ti: «Sehe eke mu kara a madza.» Ya nde ábwi nsini ya ábaana oloo mampwumu ma baara.

⁴ Bu amana obili, nde ályele kundaa Simō ndiri: «Sehe a bwara ku oli madza yighi, ya litubu nkoho a be mu olebe banswi.»

⁵ Simō ábvuhulu nde ti: «Muluo, bihi liimono mpara mu mpyibi yi nsyini, lo ka liibagha elogho o. Lo buulu we lyele, me likoho aafirintubu.»

⁶ Bu batubu likoho mu madza, bábagha banswi balagha, ya likoho li bo líbaana okagha.

⁷ Bo bágoro banganda ba bo ba báli mu bwara bubuke mu oyabaha bo. Bo bágyi ya báluhu mabwara mansa mwolo, kuulu mo mábaana odzyama.

⁸ Simō Piere bu amono obo, ákunu mabuo mu nsie na nkulu a Yiisu ya ályele ti: «Mfumu, mara o we na bele a me, mu kuulu me ndi mbwuru nga-a-masumu.»

⁹ Simō, ya bwohono ba báli ya nde bámono nzalamweē mu bubi ba bágyighili bo.

¹⁰ Óli bumō si kundaa Dzake ya Dzã, baana ba Nzebede, bambaala ba Simō. Yiisu ályele kundaa Simō ti: «Ka amono nzalamweē o! Obaana lolo li, we sa kala elebe kii baara.»

¹¹ Bu bayabvughuru a mabwara na yulu a nseghe, bo bábulusihi bilogho byehene ya bánama Yiisu.

Yiisu saha nga-a-buala

(Mat 8.1-4; Mar 1.40-45)

¹² Etsughu nga-emō, Yiisu áli mu bvulu litsyini. Omo óli ya baghala mutsyini wu áali a bubyele

bu buala. Baghala munde bu amono Yiisu, ábwi busu mu nsie ɲa nkulu a nde, ya ábuono nde bu: «Mfumu, kala we dzyi, we kughu otsehebe me.»

¹³ Yiisu álabala kwogho, ábyeme nde ya ályele ti: «Me ndzyi, kala wu a tse-tse.» Ya ɲaana oɲo, buala bu nde búfi.

¹⁴ ɲa mbihi oɲo, Yiisu átswi nde mukele wu: «Ka lyele kundaa mbwuru si mumō o. Lo gye yimoɲono weme kundaa ngaa a nzaami, ya gwa ekaba kii otsyeme ki ótumu Moyidze, mpaala okala elyimi kii bumpughulu kundaa baara.»

¹⁵ Lo nsia a Yiisu yíbvulu otsaɲama mu nkooro a nde, ya mampwumu ma baara malagha mákagya mu ogyughu nde, ya mu kuulu madzughu mu mabyele ma bo.

¹⁶ Lo nde, nde ágyene ku syehe ku ákabuono.

*Yiisu saha mbwuru wu ópki binama
(Mat 9.1-8; Mar 2.1-12)*

¹⁷ Etsughu etsyini, Yiisu bu ákaluo, ba-Faridzyě ya baluo-mikyene áli babwi nsini oɲo. Bo báfi mu mabvulu mwohonono mama ku Ngalile, ku Yude ya bvulu lili Yerusaleme. Lileene li Mfumu li líli mu nde, límoɲono mu libughu.

¹⁸ Ya mono, baara bágyi a mbwuru mutsyini wu ópki binama ɲa yulu a mbughu. Bo basagha bu baasohobo nde munsa nzo, ya bu otwulu nde ɲa nkulu a Yiisu.

¹⁹ Lo bo ka bábagha bu baasohobo nde o, mu nkooro a mpwumu a baara. Bo bákumu ku yulu a

see li nzo lili eyala*, bátobolo see, ya básurulu nde mu mbughu ɲa mihi mi baara bwohono ɲa nkulu a Yiisu.

²⁰ Yiisu bu amono kana li bo, ályele kundaa baghala wu ópki binama ti: «Baghala, masumu ma we baasi mo kolokolo.»

²¹ Ono, baluo-mikyene ya ba-Faridzyë bábaana otsimi ya bályele ti: «Mbwuru wu aatsaala Nzaami wu, nde nande ali? Nande kughu osa masumu kolokolo kala ka oli yini a Nzaami o?»

²² Yiisu bu abaghala bitsimi bi bo, ábvuhulu kundaa bo ti: «Mu emakye be lili a bitsimi bibye kunsu mikolo mi be?

²³ Nki ndagha yi gwene a mpara, olyele ti: “Masumu ma we baasi mo kolokolo”, bwunu we: “Temene ya dzyara”?»?

²⁴ Mu kuulu be ligyhaba ti Mwana a mbwuru li a litumu lii osa masumu kolokolo ɲa yulu a nsie – Nde ályele kundaa mbwuru wu ópki binama ti: «Temene, gwolo laba li we ya bvughuru ku nzo a we».

²⁵ Naana ono, mbwuru munde átemene ɲa mihi mi bwohono, ágwolo mbughu yi bálaha nde, ya ágyene ku nzo a nde, mu okabulusyighi Nzaami.

²⁶ Baara bwohono bákinjimi ku olagha ya bákasyighi Nzaami. Bo báli a nzalamweë ya bákabili bu: «Lolo liimono ndagha yi okinjimi.»

Yiisu ti Lebvi mbili
(Mat 9.9-13; Mar 2.13-17)

* **5:19 5:19** *see li nzo lili eyala* see li nzo li batwu mu ebagha kii eyala. Ku yulu a see lilo baara bákabwa nsini mu okamoño, mu okasamana ya mu okagwolo mpie mu nkonkolo.

²⁷ Na mbihi oŋo, Yiisu ápala ya nde ámono muntolo-mpagha mutsyini wu ábwi nsini ŋa nzo a mpagha. Nkwumu a nde Lebvi. Yiisu ályele kundaa nde ti: «Nama me!»

²⁸ Lebvi átemene, ábulusihi bilogho byehene, ya ánama nde.

²⁹ Lebvi ási Yiisu kyiri ki enene mu nzo a nde. Mintolo-mpagha ya baara babake báli oŋo, ya bákadza emõ ya bo.

³⁰ Ba-Faridzyẽ ya baluo-mikyene ba báli omo bákanyunu ya bályele kundaa binduono bi Yiisu bu: «Mu emakye be lili mu okadza ya oŋma emõ ya mintolo-mpagha ya banga-a-masumu?»

³¹ Yiisu ábvuhulu kundaa bo bu: «Ba bali nsiili ka bali a nzala a ngaa o, Lo babyele.

³² Me ka aangyi mu oyata baba bunsumu mbili o, lo banga-a-masumu mpaala bagyinj mayele.»

*Efwulu mu nkooro a okuru muswele mu bala
(Mat 9.14-17; Mar 2.18-22)*

³³ Bo bályele kundaa nde ti: «Binduono bi Dzã biikakuru muswele mu bala matala mwohonono ya biikabuono Nzaami, binduono bi ba-Faridzyẽ bumõ si. Lo bibi ndaa we yini a okadza ya okanyma.»

³⁴ Yiisu ábvuhulu bo ti: «Bunu, be likughu olu-omo bandughu baba mulumu bakuru muswele mu bala, mu matala maala nde nkini li ya bo?

³⁵ Lo bitsughu bili mu ogya, ya mbala-tsughu ŋa akala baamaha bo mulumu la ya bo, bo sa akala bakuru muswele mu bala.»

Mankumu mama enkuru ya mala

³⁶ Yiisu áfirita bo nkumu yi: «Ka oli a mbwuru wu kughu okaghala mupa a eko mu enkuru ki enyaghara mu obaama enkuru ki ekulu o. Buulu, nde sa akaghala enkuru ki enyaghara, ya mupa enkuru wu aamaha nde mu kye, ka li nsihi ya enkuru ki ekulu o.

³⁷ Bumõ si, ka oli a mbwuru wu kughu oloṇono mala ma manyaghara mu nduru yi a mu ebaana kii nyama yi nkulu o, buulu mala ma manyaghara sa mabaala mamfulu. Lo mala sa matsajama ya mamfulu sa mabyi.

³⁸ Lo, mala ma manyaghara okaloṇono mu manduru mama mu bibaana bi banyama ma manyaghara.

³⁹ Ya ka oli a mbwuru o wu kughu osa nzala a mala ma manyaghara, kala ti nde maan̄ma ma mayele. Buulu nde sa alyele ti: “Mala ma mayele mabvulu bubwe.”»

6

Yiisu li mfumu a Sabate (Mat 12.1-8; Mar 2.23-28)

¹ Ya mu etsughu etsyini kii Sabate, Yiisu ákaluru munsá manseghe mama bele. Binduono bi nde bíbwi okabuluka binsia bi mburu, bíkanyoõ ya bíkadza yo.

² Ba-Faridzyẽ babake bályele bo ti: «Mu emakye be lili mu okasa mandagha maala ka bágwí muswa mu etsughu kii Sabate o?»

³ Yiisu ábvuhulu bo bu: «Be ka liikataã ndagha yi ósi Dabvide o, mu matala ma ófuru nde nzala, nde ya ba báli ya nde?

⁴ Bunu nde ásomo mu nzo a Nzaami, ágwolo mampa mama ekaba, áli mo ya ágwi si kundaa ba báli ya nde. Mampa mamó, bo ka báli a muswa mu odza mo o, ña yulu a yini a bangaa ba nzaami.»

⁵ Nde áfirilyele kundaa bo ti: «Mwana a mbwuru li mfumu a Sabate.»

Mu etsughu kii Sabate Yiisu dzuhu baghala wu bágwolo kwogho

(Mat 12.9-14; Mar 3.1-6)

⁶ Mu etsughu ekimi kii Sabate, Yiisu ásomo mu nzo a lisamana a ba-Dzwife, ya ábaana oluo. Óli a baghala mutsyini omo wu bágwolo kwogho.

⁷ Baluo-mikyene ya ba-Faridzyě bákabulutala Yiisu mu omono kala ti nde kughu odzuhu mubyele mu etsughu kii Sabate, mpaala bo babagha ndagha yi baafwunu nde.

⁸ Lo Yiisu bu ágyahaba bitsimi bi bo, ályele kundaa baghala munde wu bágwolo kwogho ti: «Temene ya kala ña kara-a-kara ña.» Nde átemene ya ákala mu mukiri.

⁹ Yiisu ályele kundaa bo ti: «Me mfwulu kundaa be kala ti oli muswa mu ogyighili ma mabwe bwunu we ma mabi, mu obvwuhu bwunu we mu odzwa mbwuru mu etsughu kii Sabate?»

¹⁰ Yiisu átala ngulu ya ngulu, nde ályele kundaa baghala munde ti: «Labala kwogho e we!» Nde álabala kye, ya kwogho e nde ébvughuru bu éli nsomo.

¹¹ Lo baluo-mikyene ya ba-Faridzyě bákolo nkehe yi alagha ya bákabili bo-a-bo, bunu-a-bo bakughu osa Yiisu.

*Yiisu suolo bantumu kwumu ya buolo
(Mat 10.1-4; Mar 3.13-19; Big 1.13)*

¹² Mu bitsughu bibye, Yiisu ágyene ku yulu a munguo mu oyisamana. Nde áluhu mpyibi yohono mu okasamana Nzaami.

¹³ Bwihi bu buki, nde áti binduono bi nde mbili, ya ásuolo kwumu ya byele (12), ya ágwi bye nkwumu yi bantumu.

¹⁴ Ma me mankwumu ma bo: Simõ, wu ágwi nde nkwumu yi a Piere, Andere mbwee a nde, Dzake, Dzã, Filipe, Baretelemi,

¹⁵ Matye, Toma, Dzake mwana a Alafe, Simõ wu baakata ti mu-Nzelote,

¹⁶ Yuda mwana a Dzake, ya Yuda Isikaryote wu aatyeghe nde.

*Yiisu luo baara ya dzuhu babyele balagha
(Mat 4.24-25; Mar 3.7-13)*

¹⁷ Bu akumunu munguo emõ ya bo, Yiisu átemene ña epere, ña óli mpwumu yi nene yi a binduono bi nde, ya mpwumu yi nene yi a baara baba ku Yude lwohono, baba ku Yerusaleme, baba ku mukogho a mubu, baba Tire ya baba Sidõ.

¹⁸ Bo bwohono bágyi mu ogyughu nde ya mu kuulu nde adzuhu bo mu mabyele mabo. Babo ba ókamwehẽ mifulu mi mibi kimini badzughu.

¹⁹ Mpwumu a baara yohono yíkasagha obyeme nde mu kuulu lileene líkapala munde ya líkadzuhu bo bwohono.

*Esee ya Nyĩ
(Mat 5.2-12)*

20 Mu obo, Yiisu bu akaala mihi mi nde kundaa binduono bi nde, ályele ti:

«Esee kundaa be bawelee,
Mu kuulu Emfumu e Nzaami eli Kii ndaa be.

21 Esee kundaa be ba lili mu okpa nzala mu matala ma,
mu kuulu be sa ligyughuru.

Esee kundaa be ba lili mu okalili mu matala ma,
mu kuulu be sa lisebe.

22 Esee kundaa be, kala ti baara babele be, babihi be, batughu be ya balyele mandagha ma mabi mu be, mu nkooro a Mwana a mb-wuru».

23 «Limono emiini mu etsughu ekye, ya likala kunsu muyayaã, mu kuulu embwaã e be eli ki enene mu yulu. Bwunu obo si bataara ba be bákasa kundaa mibighili.»

24 «Lo, nyĩ kundaa be bisini,
mu kuulu be limaabagha libuono li be!

25 Nyĩ kundaa be ba lili kunsu bupfulu mu matala ma,
mu kuulu mbala-tsughu be tumu likpa nzala.

Nyĩ kundaa be ba lili mu okasebe mu matala ma,
etsughu eli ki liisomo be pfili ya liilili.

26 Nyĩ mu matala ma obili baara bwohonu mu bubwe bu be,
mu kuulu me obo si bataara ba be bákasa kundaa mibighili mimi mpya.»

*Ndagha yitala odzyi mitaara
(Mat 5.38-48)*

27 «Lo kundaa be ba lili mu okagyughu me, me ndyele be ti: Liikadzyi mitaara mi be, liikasa bubwe kundaa ba baakabele be.

²⁸ Liikaseme babo ba baakabiili be bipwolo. Li-ikabuono Nzaami mu babo ba baakabuulu mpya mu be.

²⁹ Kala ti mbwuru kaha we limpala mu tama, lo taama nde si tama lilike, ya kala ti nde gwohono we enkuru e we ki ela kii kobo, nyaã nde si agwolo enkuru kii mu ntulu.

³⁰ Nswe munde wu aaluomo we elogho, lo gwa nde kye. Ya kala ti mbwuru gwohono elogho e we, ka firiluomo nde kye o.

³¹ Mandagha ma lidzyi be ti baara bagyighili be mo, behe si ligyighili bumõ kundaa bo.

³² Kala ti be okadzyi babo ba baakadzyi be, lo mu emakye baatuono be? Banga-a-masumu si ti baakadzyi babo ba baakadzyi bo!

³³ Mu kuulu, kala ti be bubwe okasa kundaa babo ba baakasa be bubwe, lo mu emakye baatuono be? Banga-a-masumu si ti baakasa bumõ.

³⁴ Kala ti be okasohobo kundaa babo ba lili a be bitsimi ti sa babvurulu, lo emakye baatuono be? Banga-a-masumu si ti baakasohobo kundaa banga-a-masumu, mpaala babvurulu bo bwunu obo si!»

³⁵ «Lo be, liikadzyi mitaara mi be, liikasa bubwe, ya liikasohobo wene a okala a etsimi kiili ti sa babvurulu be. Mufuru a be sa akala wu munene, ya be sa likala baana ba Nzaami wu a Ensoõ-Yulu, mu kuulu nde li a mukolo mubwe kundaa ba baagwene okabvurulu matuono, ya kundaa banga-a-mukolo bubi.

³⁶ Liikakala ya mukolo wu a nyĩ bwunu a bu oli a Taara a behe si mukolo wu a nyĩ.»

Yiisu luo mu mi mitala omono bipfu bi banganda

(Mat 7.1-5)

³⁷ «Ka likalamana banganda o, mpaala banyaã olamana behe si. Ka likabwihi banganda o, mpaala banyaã obwihi behe si. Lisa babake kolokolo, ya sa basa behe si kolokolo.

³⁸ Likakaba banganda, ya sa bakaba behe si. Sa batsogho bilogho bi biluru mu mankuru ma be, ya sa bakomo bye ku oluru. Mu kuulu, sa bakateese be mu eteese ekye ki liikateese be bambaala.»

³⁹ Yiisu áfirita bo nkumu yi: «Enkpa-mihi ka ekughu osuo nganda enkpa-mihi nzili o. Kala pele, bo bansa buolo sa bayibwa munsa dzunu.

⁴⁰ Enduono ka eluru muluo a kye o, ya nkana si mumõ ka luru mfumu a nde o. Lo, nswe munde wu baaluo bubwe, nde sa akala ti muluo a nde.

⁴¹ Mu ema we li mu okatala mana lisele li lili mu lihi li nganda, ñaala we li a mubaa a muti mu lihi li weme?

⁴² Bwunu we bunu-a-bo we kughu olyele nganda ti: “Ngee a me, nyaã me maha we lisele mu lihi”, ñaala we mubaa a muti wu li mu lihi li weme omono we? We li mbwuru wu a bifa byele. Matswana maha a ti mubaa a muti wu li mu lihi li we. Ña mbihi oño, we sa gyighili omono bubwe mu omaha lisele mu lihi li nganda.»

Muti ya mburu a nde

(Mat 7.16-20; 12.33-35)

⁴³ «Muti wu mubwe ka kughu oburu bimburu bi bibi o, ya muti wu mubi ka kughu oburu bimburu bi bibwe o.

⁴⁴ Nswe muti okagyahaba mu bimburu bi nde. Ka bakughu oka finge mu munsene-a-nsene o, ya ka bakughu oka bimburu bi bviini mu mungaama o.

⁴⁵ Mbwuru wu mubwe li a bitsimi bi bibwe mu mukolo a nde. Mbwuru wu mubi li a bitsimi bi bibi mu mukolo a nde. Mu enganma, munjma a mbwuru okapaha mi milwulu kunsu mukolo a nde.»

Efaana kii manzo mwolo
(Mat 7.24-27)

⁴⁶ «Mu emakye be liikata me “Mfumu, Mfumu”, lo be liigwene okagyighili mandagha ma aakandyele me be?

⁴⁷ Me sa nsuo be efaana ki mbwuru wu gyi kundaa me, gyughu mandagha ma me ya salala mo.

⁴⁸ Nde li efaana kii baghala wu aatwu nzo. Nde tsimi miwaghala mi mila ya twu bitsini bi bibagha bi nzo na yulu a limeẽ. Mvulu bu anoõ, ndwuru yigyi mu mwele ya madza mayisini mu nzo oyo ya eturu kyehehe, lo yo obwa we, mu buulu bagyighili otwu yo.

⁴⁹ Lo munde wu gyughu mandagha ma me ya kuono osalala mo, nde li efaana kii baghala wu aatwu nzo mu yulu a dzyele, ku ogwene a bitsini bi bibagha. Mvulu bu anoõ, ndwuru yigyi mu mwele ya madza mayisini mu nzo ya eturu kyehehe, mabwihi nzo ya mabiri yo nkwu-nkwughu.»

7

Yiisu dzuhu musala a mfumu a bambumbulu nkama

(Mat 8.5-13)

¹ Yiisu bu amana olyele mandagha mwohono mamu kundaa baara ba bákagyughu nde, nde ágyene ku Kaperenawume.

² Oko óli a mfumu a ekuru ki bambumbulu ba Rome nkama. Nde áli a musala wu ákadzyi nde ku olagha. Musala me ábyele ya ákadzwana ya lipfu.

³ Mfumu munde bu agyughu ti Yiisu aayato ŋa Kaperenawume, nde ágweghe ndaama a bak-wuru ba ba-Dzwife bayilyele Yiisu ayabvwuhu nkana a nde.

⁴ Bo bágyene kundaa Yiisu ya bábuono nde ku olagha ti: «Wu aagweghe bihi li mbwuru wu mubwe ya we faana obaha nde,

⁵ Mu kuulu nde dzyi baara ba nsie a bihi-a-be, ya me nde aatwuhu bihi nzo a lisamana.»

⁶ Mu obo Yiisu ágyene ya bo. Nde ato ŋa bele a nzo a mfumu munde, mfumu a bambumbulu ágweghe ndaama a bandughu ba nde kundaa Yiisu mu olyele nde bu: «Mfumu, nyaã omono oko mpara yi ogya ku nzo a me! Me ka nkughu mu ogyagha we munsá nzo a me o.

⁷ Me obo me aamono si ti me ka mfaana oyabwana a we o. Lo tsughu yini a ndagha, ya musala a me sa adzughu.

⁸ Me ndi mu litumu li bamfumu ba me, ya meme si ndi a bambumbulu ba aakantum me. Kala me ndyele mutsyini ti: “Gye!” Nde sa agye. Kala me ndyele wu muke ndiri: “Gya!” Nde sa

agya. Kala me ndyele musala a me ti: “Sa bu!” Nde sa asa obo.»

⁹ Yiisu ayughu obo, nde ákinjimi. Nde ákaghala kundaa baara ba báyanama nde, ya ályele bo ti: «Mu enganma, me ndyele kundaa be, ngu okala mu Isarayele, me nkini amaamono mbwuru wu li a kana li linene lili bu o.»

¹⁰ Bandughu ba mfumu a bambumbulu bábvughuru kundaa nde ya bámono musala wu áali mbyele ádzughu.

Yiisu siili mwana a mupfili mu lipfu

¹¹ Na mbihi onjo, Yiisu ágyene ku bvulu lili Nayine. Binduono bi nde ya mpwumu a baara yi nene bágyene ya nde.

¹² Mu matala ma ákasomo nde kunsá bvulu, nde ámono ebyimi ki bákayidzyighi ku mampyeme: Mwana nga mumō wu a baghala mu mweē ngughu a nde, ya ngughu a nde áli mupfili. Mpwumu a baara baba bvulu lilo báli ya mupfili.

¹³ Mfumu bu amono mupfili munde, nde ámono nyī yi alagha. Mu obo nde ályele kundaa nde ti: «Ka lili o!»

¹⁴ Bu asele, Yiisu ábyeme lwana ya baara ba bákabiri lo bátemene. Nde átsughu ndagha ti: «Munkuru-mbala, me bu ndyele we, temene!»

¹⁵ Mvwumu ásighili, ábwi nsini ya ábaana obili. Yiisu ágwi nde kundaa maama a nde.

¹⁶ Baara bámono nzalamweē. Bo básyighi Nzaami ya bákalyele ti: «Nzaami aagweghe bihi mubighili wu munene!» Ya báfiribwehe ti: «Nzaami aayamoŋono kundaa baara ba nde!»

¹⁷ Mu obo nsia a Yiisu yítsanama mu etsulu e nsie kii Yude kyehene, ya mu bitsulu bi nsie bi bili be-bele a Yude.

Dzã Muboghoru gweghe binduono bi nde kundaa Yiisu

¹⁸ Binduono bi Dzã Muboghoru bílyele nde mandagha mwohonu mamu. Mu obo, nde áti binduono bi nde byele mbili

¹⁹ ya ágweghe bye kundaa Yiisu mu ofwulu nde ti: «We me mbwuru wu liikakyele, bwunu we mukimi liikyele?»

²⁰ Bo bato kundaa Yiisu bályele nde bu: «Dzã gweghe bihi mu ofwulu we, “kala we me mbwuru wu liikakyele, bwunu we mukimi liikyele?”»

²¹ Mu matala maana mamu, Yiisu ádzuhu babyele balagha, ya ba báli a mpara yi a mawamawa. Nde ábyi mifulu mi mibi mi míli ya bo, ya ádzubulu mihi mi babo ba áli ókpi mihi.

²² Na mbihi onjo, nde ályele kundaa baara ba ógweghe Dzã ti: «Ligye lílyele kundaa Dzã myehene mi liimono ya mi liigyughu be»

«Binkpa-mihi bili mu omono, bikara bili mu odzyara, bangaa buala ayi tse-tse, Binkpa-matswi bili mu ogyughu,

Ba bakpi bali mu osighili mu lipfu, ya bawele bali mu ogyughu Nsia yi Mbwe.

²³ Esee kundaa munde wu aagwene obwihi kana li nde mu nkooro a me!»

²⁴ Na bihi a na óbvughuru baara ba ógweghe Dzã, Yiisu ábaana obili mu nyuru a Dzã kundaa mpwumu a baara. Nde ályele bo ti: «Emakye be liiyitala ku syehe? Libanana li okanyihi efulu?

²⁵ Bu lo be emakye liiyitala? Mbwuru wu aalaha binkuru bibi ntala? Lo, ba baakalaha binkuru bibi ntala ya ba bali kunsu busini okakala mu manzo ma mikogho.

²⁶ Lo emakye be liiyitala? Mubighili? Heẽ, me ndi mu olyele be, nde bvulu mubighili».

²⁷ Mu kuulu Dzã me munde Bisoño biikalyele ti:

*«Me sa ntswahaba ntumu a me ku nkulu a we.
Mu ogyighili we nzili.»*

²⁸ «Me ndyele be bu: Nja kara li baara bwohono ba báburu mu bakaha, ka oli ya mbwuru wu bvulu Dzã o. Lo munde wu bvulu nde busala mu Emfumu e Nzaami bvulu nde bukwuru.

²⁹ Ya baara bwohono ba bagyughu nde, ya mintolo-mpagha, bo bábaghala ti Nzaami li wu a bunsumu, ya bákihi ti Dzã aboghoru bo.

³⁰ Lo ba-Faridzyẽ ya Baluo-mikyene bu babihi mi okadzyi Nzaami osa mu bo, bábihi ti Dzã aboghoru bo.»

³¹ Yiisu áfirilyele ti: «Ya na me aambvughu baara baba eseene ki? Bo efaana kii na bali?

³² Bo bafaana ya bike-bike bi biibwi nsini nja ebini ki ookabvununu baara bwohono, ya bali mu okalyele mu yulu kundaa babake ti:

“Bihi liifulu mamvulu-a-mvulu, lo be ka liikini o!
Bihi liigyimi bikwumu bibi minyoõ, lo be ka lilili o.”»

³³ «Dzã Muboghoru aagyi, nde ka ákadza mampa ya ka ákanma mala o. Mu obo, be liilyele ti: “Nde li a mufulu wu mubi.”

³⁴ Mwana a mbwuru aagyi. Nde li mu okadza ya okanma, ya be lili mu okalyele ti: “Mbwuru wu

ki agyahaba nde yini a odza ya onjma mala. Nde li mbaala a mintolo-mpagha ya banga-a-masumu.”

³⁵ Lo bunsughu bu Nzaami buumonono bubu bunsumu kundaa baana ba nde.»

Yiisu mu nzo a Simō mu-Faridzyē

³⁶ Mu-Faridzyē mutsyini áti Yiisu mbili mu oyidza ya nde, ya Yiisu ágyene ku nzo a nde ya ábwi nsini mu odza.

³⁷ Na bula bubo óli a mukaha mutsyini nga-a-masumu. Na ágyughu nde ti Yiisu ákadza mu nzo a Mu-Faridzyē munde, nde áli a mbwara yi alwulu mu mananaase.

³⁸ Nde ágyene na myili mi Yiisu, ábaana olili ya ábwoho myili mi Yiisu mu mansana ma nde. Na mbihi onjo, nde akakwono mye mu mfu a nde. Nde ákanyuburu myili mi Yiisu, ya ákagyogho mye mananaase.

³⁹ Mu-Faridzyē wu áati Yiisu mbili amono obo, nde ábili kunsu mukolo a nde ti: «Kala ti mbwuru wu mubighili ali, mu enganma, nkinini nde aagya-haba ti mukaha wu li mbwuru nga-a-masumu.»

⁴⁰ Na mbihi onjo, Yiisu ályele kundaa mu-Faridzyē munde ti: «Simō, me ndi a ndagha yi aandyele we.» Simō ábvuhulu nde ti: «Bili o we Muluo!»

⁴¹ Yiisu átsughu ndagha ndiri: «Baara buolo áli basomo nzi kundaa wu aakasohobo nzi. Mutsyini mipara nkama, ya wu muke mipara makwumu mataana.

⁴² Buulu bo bansa buolo ka báleene ofiri ebyimi ekye o, nde ányaghala bo ebyimi kyehene. Mu we, na kara li bo buolo, nande aabvulu dzyi nde?»

⁴³ Simō ábvuhulu nde bu: «Mu bitsimi bibi me, munde wu ányaghala nde ebyimi ki eluru olagha.» Yiisu ályele nde ti: «We aabili ku bwe.»

⁴⁴ Na nseele, nde bu akaghala mihi kundaa mukaha munde, ályele kundaa Simō ti: «We aamono mukaha wu? Me aayansomo mu nzo a we ya we ka aagwi me madza ma oswagha myili o. Lo nde aabwoho me mye mu mansanja ma nde, ya aakwono mye mu mfu a nde.

⁴⁵ We ka aanyuburu me o, lo, obaana bu aayan-somo me mu, nde ka aakolo mu okanyuburu myili mi me o.

⁴⁶ We ka aagyirili me maala ku yulu a mutswi o, lo nde aagyirili mananaase* mu myili mi me.

⁴⁷ Me mu obo, me ndi mu olyele we ti: Buulu nde aasuo dzyi li lilagha, mu olyele ti Nzaami aasi masumu ma nde ma malagha kolokolo. Lo munde wu baasi masumu ma nde ma masala kolokolo aakasuo si dzyi li lisala.»

⁴⁸ Na mbihi oŋo, Yiisu ályele kundaa mukaha munde ndiri: «Masumu ma we baasi mo kolokolo.»

⁴⁹ Baara ba bákadza ya Yiisu bábwi okabili mu bomo ti: «Mbwuru wu nande ali mu osa masumu ma baara kolokolo?»

⁵⁰ Lo Yiisu ályele mukaha munde ndiri: «Kana li we liibvwuhu we. Gye mu edzuunu.»

8

Bakaha ya ba bákabulunama Yiisu

¹ Na mbihi oŋo, Yiisu ágyene mu mabvulu ya mala mu okabulutsala nsia yi a Emfumu e

* **7:46 7.46** mananaase: madza ma mumpfu-mpfu.

Nzaami ya okabululuo. Bantum ba nde kwumu a buolo (12) bákakala ya nde emõ

² ya ndaama a bakaha ba ádzuhu ya ba ábyi nde mifulu mi mibi mu bo. Óli Mari wu baakata ti musi Mangadala, wu óbyi Yiisu mifulu nsaama mi mibi,

³ Dzaane mukala a Syudza wu ali musala a Erode, Sudzane ya bakaha balagha bakimi. Bo bwohonon bákasalala bilogho bi bo mu obaha Yiisu ya binduono bi nde.

Nkumu yi a mukunu

(Mat 13.1-9; Mar 4.1-9)

⁴ Mu obo mpwumu a baara yi nene yígyi kundaa Yiisu, ya nde áti bo nkumu yi:

⁵ «Etsughu etsyini, mbwuru mutsyini ágyene ku manseghe mu oyinyahala mburu. Mu matala ma ákabulunyahala nde yo, ndaama yíbwi mu mukogho a nzili. Baara bádzyara yo ya banjmini báli yo.

⁶ Ndaama yinke yíbwi mu nsie yi a mameẽ. Bu yilughubu, yo yíkee mu kuulu onjo nsie ka yíli a madza o.

⁷ Ndaama yinke yíbwi mu nsie yi áli a mingaama. Mingaama bu mílughubu, míkulu emõ ya mburu oyo, mísi mburu mpinji. Yo yíkwono okulu.

⁸ Ndaama yinke yíbwi mu nsie yi mbwe. Yo yíkulu, yíkulu, ya nswe liburu liburu mburu nkama.» Bu amana obili obo, Yiisu áfiribili mu mpini ti: «Nyaã wu li a matswi, agyughu!»

Mu emakye Yiisu abili mu mankumu

(Mat 13.10-17; Mar 4.10-12)

⁹ Na mbihi oŋo, binduono bi Yiisu bífwulu nde ti nkumu oyo bunu-a-bo yidzyi olyele.

¹⁰ Nde ágwi bo mvuru yi: «Nzaami aasuo kundaa be mansweghe ma Empu e Nzaami. Lo kundaa baara babake, myehene okaluru mu mankumu, mu kuulu, “si bapana mihi, banyaã omono. Si bagyughu, banyaã obaghala.”»

*Yiisu baala nkumu yi a mukunu
(Mat 13.18-23; Mar 4.14-20)*

¹¹ «Nkumu oyo bu yidzyi olyele: mburu me Ndagha a Nzaami.

¹² Baara ba báli mu mukogho a nzili, me baara ba baakagyughu Ndagha a Nzaami, na mbihi dyabulu gyi yamaha yo mu mikolo mi bo mu kuulu banyaã osa kana, ya banyaã obvwughu.

¹³ Baara ba bali mu nsie yi a mameẽ yi obwi mburu, me babo baala bu bagyughu Ndagha a Nzaami, bakihi yo ya esee. Lo ka bali a midza o. Bo baakasa kana mu mana a matala. Na ookagya bigyeele, bo baakabwa.

¹⁴ Ndaama yi aakabwa na kara li mingaama, me babo baala bu bagyughu Ndagha a Nzaami, bagyene ya banyaã minyoõ ya bisee bi nsie bisi yo mpinji, ya bimburu bi yo ka biikakulu o.

¹⁵ Mburu yi aakabwa mu nsie yi mbwe, me baara babo baala bu bagyughu Ndagha a Nzaami, bakebe yo mu mukolo wu a bunsumu ya wu mubwe, ya baakakwara yo ya baakaburu bimburu ya mukama.»

*Nkumu yi a mwindi
(Mar 4.21-25)*

¹⁶ «Ka oli ya mbwuru wu aakanahaba mwindi mu ofughu nde nkuru o, bwunu we mu otwulu nde ku nsini a mbughu. Lo mu otwulu nde na yulu a ebini ki baakatwulu nde, mu kuulu baara ba baasomo mu nzo bamono otsyeme.

¹⁷ Mandagha mwohono ma másweme sa magyighili omonono, ya mansweghe mwohono sa bagyighili ogyahaba mo ya opaha mo ku mbala.

¹⁸ Mu obo, lisa mayele mu ngyu-ngyughu a be! Mu kuulu sa babwehe elogho kundaa munde wu li a kye, lo kundaa munde wu aagwene a elogho o, sa bamaha ki aakatsimi nde ti li a kye.»

Ngughu ya bambwee ba Yiisu

(Mat 12.46-50; Mar 3.31-35)

¹⁹ Na mbihi onjo, ngughu ya bambwee ba Yiisu báyatála nde, lo bo ka báleene oto na áli nde o mu nkooro a mpwumu a baara.

²⁰ Mbwuru mutsyini ályele nde ndiri: «Ngughu ya bambwee ba we bali ku mbala. Bo bali ya nzala a we.»

²¹ Lo Yiisu ágwi bo mvuru yi: «Ngughu a me ya bambwee ba me, me babo ba baakagyughu Ndagha a Nzaami, ya ba baakasalala yo.»

Yiisu kahaba efulu ki enene

(Mat 8.23-27; Mar 4.35-41)

²² Etsughu etsyini, Yiisu ásomo munsa bwara ya binduono bi nde, ya ályele bo ti: «Litswe lisaghaba mu ngulu a mubu.» Mu obo, bo bágyene.

²³ Bu bákadzughu bwara, Yiisu ábwi tolo. Mu matala maana mamó, efulu kii mpini ébaana osa

mu yulu a madza ma bana, ya bwara búbaana olwulu mu madza. Mu obo, lipfu lígyele bo.

²⁴ Binduono bísiili Yiiisu ya bílyele nde ti: «Mfumu! Mfumu! Bihi-a-be lifi ekulu!» Yiiisu bu asighili, áfyeē efulu ya mimpana mi madza mu mpini. Efulu éfi ya edzuunu éyabvughuru.

²⁵ Na mbihi oŋo nde áfwulu bo ndiri: «Kana li be kunu lili?» Enkwughu ésughuru bo ya bákinjimi. Bo bábili bo-a-bo ti: «Wu nsa mbwuru wu aakatumu efulu ya madza, ya bye biikagyughu nde?»

Yiiisu byi mifulu mi mibi mi míli mu baghala mutsyini

(Mat 8.28-34; Mar 5.1-20)

²⁶ Yiiisu ya binduono bi nde bápala mu ngulu a bana ya básomo mu etsulu e nsie kii ba-Ngerasenyēē, ki eli nkolo ya nkolo ya Ngalile.

²⁷ Na ópala Yiiisu munsa bwara, baghala mutsyini wu áali musi bvulu áyabwana a nde. Baghala munde áli a mifulu mi mibi. Edzighi nde áli átsili binkuru. Nde ka áli a nzo o, lo kunsa mampyeme ákabulugyoŋomo.

²⁸ Bu amono Yiiisu, nde ákehe mungili, ákunu mabuo ŋa nkulu a nde, ya ályele mu mpini yohono ti: «Nsa ndagha yili ŋa kara li me ya we Yiiisu Mwana a Nzaami Wu Ensoō-Yulu? Yóboo, ka mwehē me mpara o!»

²⁹ Nde ábili obo mu kuulu Yiiisu ákalyele mifulu wu mubi ndiri: «We, mifulu wu mubi, pala mu baghala wu!» Nsa alagha mifulu ákasomo mu nde, ya bákakuru nde myaã mu bukolo ya bákawulu nde myili munsa edzu, lo nde ákatsyiri

bye. Mifulu wu mubi ákabalubiri nde kunsá syehe.

³⁰ Yiisu áfwulu nde ndiri: «Nkwumu a we na?» Nde ábvuhulu ndiri: «Mpwumu». Mu kuulu mifulu mi mibi milagha mísomo mu nde.

³¹ Mifulu mi mibi míbuono Yiisu bu: «Ka tumu bihi ligye ku nsini a mbie yi a nda yi a laña-laña o.»

³² Na bele oño óli a mukaã a bangubulu wu munene wu áakabuludza ña yulu a munguo. Mifulu mi mibi míbuono Yiisu agwa bo muswa wu oyisomo mu bangubulu. Nde ágwi bo muswa munde.

³³ Mu obo, mifulu mípala mu baghala munde, míyisomo mu bangubulu. Bangubulu bwohono bákumunu ku nsini a munguo, báyibwa mu bana ya báfi ekulu.

³⁴ Baara ba bákabulukebe bo bámono mi miluru. Mu obo bo bábara ya báyitsala nsia yi a ndagha oyo kunsá bvulu ya mu mala.

³⁵ Baara báyata mi míluru. Ña báyanto bo ku óli Yiisu, bámono baghala wu áali a mifulu mi mibi ábwi nsini ña myili mi Yiisu. Nde álaha ku obwe ya embwuru éyabvughuru nde. Nzalamweẽ yíbagha bo.

³⁶ Baara ba bámono mi miluru balyele bo bunu-a-bo baghala munde ábvuwughu.

³⁷ Na mbihi oño baara bwohono ba báli mu etsulu e nsie kii ba-Ngerasenyee bályele Yiisu ndiri: «Mara mu nsie a bihi!» Bo bályele obo mu kuulu báli a nzalamweẽ yi alagha. Mu obo Yiisu si ásomo mu bwara ya ágyene.

³⁸ Baghala wu áali a mifulu mi mibi áluomo Yiisu

muswa wu okala ya nde. Lo Yiisu ábihi ya ályele nde ti:

³⁹ «Bvughuru ku nzo a we, ya yilyele baara mandagha mwohono ma oogyighili Nzaami mu we.» Nde ágyene ya átsala nsia munsá bvulu lwohono yi a mi ósi Yiisu mu nde.

Yiisu dzuhu mukaha mutsyini ya siili mutughu mutsyini mu lipfu

(Mat 9.18-26; Mar 5.21-43)

⁴⁰ Na óyabvughuru Yiisu mu ngulu a bana, mpwumu a baara yíbwana a nde mu kuulu bo bwohono bákakebe nde.

⁴¹ Na mbihi oŋo, mukwuru mutsyini wu a nzo a lisamana yi a ba-Dzwife áyato. Nkwumu a nde áli Dzayiruse. Nde ákunu mabuo mu nsie ŋa nkulu a Yiisu ya ábuono nde agye ku nzo a nde.

⁴² Nde áli a mwana wu mukaha mumõ wu a mvulu kwumu ya ywolo (12). Nde ákadzwana ya lipfu.

Yiisu bu ákagye, mpwumu a baara yínama nde ya yísi nde mpiŋi.

⁴³ Na nsa mpwumu a baara oyo óli a mukaha mutsyini. Nde áli a ebyele kii okapala makili ki ési mvulu kwumu ya ywolo (12). Nde ámana nzi a nde yohono kundaa bangaa-libughu, lo mbwuru si mumõ ka ási ti nde amono bubwe o.

⁴⁴ Bu agyi ku mbihi a Yiisu, ábyeme mubele a enkuru e nde ya makili másaakanama.

⁴⁵ Mu obo Yiisu áfwulu ndiri: «Nande byeme me?» Baara bwohono bátunu ya Piere ályele ti: «Mfumu, we li mu omono ti mpwumu a baara yiidzyi we ya yili mu osa we mpiŋi.»

⁴⁶ Lo Yiisu ályele bu: «Mbwuru aabyeme me, mu kuulu me mono ti mpini yiipala mu nyuru a me.»

⁴⁷ Na ómono mukaha munde ti Yiisu agyahaba ndagha oyo, nde áyabwa ña myili mi Yiisu ya enkwughu kyehehe. Ña mbihi onjo, nde ályele ña mihi mi baara bwohono mu emakye nde aabyeme enkuru e Yiisu, ya bu aadzughu nde mu matala maana mamo.

⁴⁸ Yiisu ályele kundaa nde ndiri: «Ma mwana, kana li we liibvwuhu we. Gye mu edzuunu!»

⁴⁹ Ñaala Yiisu nkini mu okabili, mbwuru mutsyini wu áafi ku nzo a Dzayiruse, mfumu a nzo a lisamana a ba-Dzwife ályele nde ti: «Mwana a we aakpi. Muluo ka li a ki aafiriyisa oko o.»

⁵⁰ Lo Yiisu bu agyughu obo, ályele Dzayiruse ndiri: «Ka kala a nzalamweẽ o, sa yini a kana, nde sa adzughu.»

⁵¹ Yiisu bu áyato ña nzo a Dzayiruse, nde ka ágwi baara muswa wu osomo ya nde o. Yini a Piere, Dzake, Dzã, taara ya maama a mwana báasomo ya nde.

⁵² Baara bwohono bákálili ya bákanyoõ mu nkooro a lipfu li mwana. Mu obo Yiisu ályele ndiri: «Ka lili o! Nde ka aakpi o, lo nde ogyonjomo aagyonjomo.»

⁵³ Bo bákasebe nde mu kuulu bo bágyahaba ti mwana aakpi.

⁵⁴ Lo, Yiisu bu akwara mwana mu kwogho, ályele kundaa nde mu mpini ndiri: «Mwana, temene!»

⁵⁵ Mu matala maana mamo, ewumu e mwana éyabvughuru, ya maswa-maswa nde átemene. Yiisu ályele bo bagwa nde bi-odza.

⁵⁶ Taara ya maama a mwana bákinjimi ku olagha. Lo Yiisu átswi bo mukele banyaã olyele mbwuru ndagha oyo.

9

*Yiisu gweghe bantumu kwumu ya buolo
(Mat 10.5-15; Mar 6.7-13)*

¹ Yiisu áti bantumu ba nde kwumu ya buolo (12) mbili ya ágwi bo emfumu ya mpaana yi obyi mifulu mi mibi ya odzuhu babyele.

² Na nseele, nde ágweghe bo bayitsala nsia yi a Emfumu e Nzaami, ya badzuhu babyele.

³ Nde ályele kundaa bo ti: «Ka libiri elogho si emõ mu nzili o, ngu okala mukaana, empogholo, bi-odza, nzi, bwunu we enkuru kii byele.

⁴ Mu nswe nzo yi bagyagha be, likala omo tee matala ma liimara be oño.

⁵ Kala ti baara babihi be ogyagha, lipala mu bvulu lilo, ya likubulu lifufunu mu myili mi be mpaala okala bumpughulu mu bo.»

⁶ Bantumu bágyene, bátsala nsia yi a Emfumu e Nzaami mu bula nswe bula, ya bádzuhi babyele mu bibini byehene.

*Nsia a Yiisu yigwi Erode nzalamweẽ
(Mat 14.1-12; Mar 6.14-29)*

⁷ Erode, mfumu a etsulu e nsie kii Ngalile, ágyughu myehene mi mikaluru, nde ka ábagha yi obili o, mu kuulu bana bákalyele ti: «Munde ngu Dzã Muboghoru aasighili mu lipfu.»

⁸ Babake bákalyele ti: «Munde ngu Eli aayab-vughuru». Ya babake si ti: «Mumõ na kara li mibighili mi mikulu aasighili mu lipfu.»

⁹ Lo Erode ályele ndiri: «Me aantumu bakehe Dzã bolo. Lo mbwuru wu li mu okabulusa mandagha ma ndi mu ogyughu me nande?» Mu obo nde ákasagha omono Yiisu.

Yiisu gwi mapfwunu mataana ma baara bi-odza

(Mat 14.13-21; Mar 6.30-44; Dzã 6.1-14)

¹⁰ Bantumu kwumu ya buolo (12) bu bayabvughuru, bályele Yiisu myehene mi bási bo. Yiisu ábiri bo ku ebini ki egwene a baara, mu nkolo yi a bvulu lili Betesayida.

¹¹ Baara balagha bagyughu ti Yiisu ákagye ku bvulu lilo, bo bánama nde. Nde ágyagha bo, áluo bo mu mi mitala Empu e Nzaami, ya ádzuhu babyele.

¹² Bwihi bu bugyili, bantumu ba Yiisu kwumu ya buolo (12) bágyi kundaa nde ya bályele ti: «Lyele baara bagye ku mala ma masala ya ma manene ma mali bitaa-taa bi mu kuulu bayisagha bi-odza ya ebini ki ogyonomo. Bihi-a-be ña kara-a-kara a syehe lili.»

¹³ Lo Yiisu ályele bo bu: «Ligwa bo bi-odza beme.» Lo bo bábvuhulu nde bu: «Bihi bi lili a bye yini a mampa mataana ya banswi buolo. We budzyi ti bihi ligye liswumu bilogho bi okughu odza mpwumu a baara yi?»

¹⁴ Mutala a babaghala ba báli oño áli ku bele a mapfwunu mataana (5 000). Yiisu ályele kundaa binduono bi nde ndiri: «Libwihi baara nsini mu makaba mama baara makwumu mataana (50).»

¹⁵ Binduono bi nde bísi obo, ya bílyele baara bwohonono babwa nsini.

¹⁶ Na mbihi onjo, Yiisu ágwolo mampa mataana ya banswi buolo, átala ku yulu, ábvurulu matuono kundaa Nzaami, ákehe mampa ya banswi, ágwi kundaa binduono bi nde mu kuulu bakaba bye kundaa baara.

¹⁷ Baara bwohonono báli ya bágyughuru. Binduono bitolo bitsulu bi mampa ya ndaama a banswi bi bísyili, ya báluhu bitubu kwumu a byele.

*Piere lyele ti Yiisu me Kriste
(Mat 16.13-19; Mar 8.27-29)*

¹⁸ Etsughu etsyini Yiisu ákasamana na ebini kiili baara we, ya binduono bi nde bíli ya nde. Nde áfwulu bo ti: «Mu mbiili a baara, me nande ndi?»

¹⁹ Bye bíbvuhulu nde bu: «Bitsimi bi baara bana ti we li Dzã Muboghoru, babake ti we li Eli, babake si ti we li mumõ na kara li mibighili mi mikulu wu aasighili mu lipfu.»

²⁰ Yiisu ályele kundaa bo ti: «Lo, mu be, me nande ndi?» Piere ábvuhulu ti: «We li Kriste a Nzaami.»

²¹ Yiisu átswi bo mukele banyaã olyele mbwuru ndagha oyo.

*Yiisu lyele ndagha yitala lipfu li nde ya osighili
o nde mu lipfu*

(Mat 16.24-28; Mar 8.30; 9.1)

²² Yiisu áfirilyele kundaa binduono bi nde ti: «Mwana a mbwuru faana omono mpara yi alagha. Bakwuru, bakwuru ba bangaa ba Nzaami ya Baluo-mikyene sa babihi nde. Sa badzwa nde, ya bitsughu bitere biluru, nde sa asighili mu lipfu.»

²³ Na mbihi oŋo, Yiisu ályele kundaa baara bwohono ti: «Kala ti mbwuru dzyi onama me, nde faana otunu nyuru a ndeme. Lo nde faana obiri kuruwa li nde nswe etsughu ya onama me.

²⁴ Mu kuulu wu dzyi obvwuhu laama li nde, sa apfihili lo. Lo munde wu aapfihili lo mu nkooro a me, sa abvwuhu lo.

²⁵ Nsa ndaana mbwuru aabagha kala ti bagha bupfulu bu nsie nsyini, lo pfihili laama li nde?

²⁶ Nswe munde wu akala aamono budzwa mu me ya mu mandagha ma me, Mwana a mbwuru sa amono nde budzwa ŋa ayabvughuru nde kunsu nsia a nde, nsia a Taara a nde, ya yi a bangye-yulu.

²⁷ Mu enganma, me ndyele be, ndaama a baara mu ba bali ŋa ka bakpa o, nsomo-a-nsomo bamonu Emfumu e Nzaami.»

*Yiisu kunsu nsia a Nzaami
(Mat 17.1-8; Mar 9.2-8)*

²⁸ Bitsughu mpuomo bu biluru ŋa mbihi a ŋa ályele nde mandagha mamu, Yiisu ágwolo Piere, Dzã ya Dzake, ya ákumu ku yulu a munguo mu oyisamana.

²⁹ Mu matala maala nde mu okasamana, busu bu nde búkighiri ya biko bi nde bígyighili openeme kuu oluru.

³⁰ Mu matala maana mamu, babaghala buolo, Moyidze ya Eli, bákabili ya Yiisu.

³¹ Bo báypala kunsu nsia ya bámonjo ya Yiisu mu mi mitala bunu-a-bo nde ali afaana omana esala e nde mu oyikpa ku Yerusalem.

³² Piere ya bantumu buolo babake bábwí muk-aba a tolo, lo bu babulusighili, bámono nsia a Yíisu ya babaghala buolo ba báli ya nde.

³³ Mu matala ma óbaana Moyidze ya Eli ogye, Piere ályele Yíisu ndiri: «Muluo, bubwe buulu bihi lili ña. Bihi bibvulu bitere liitwu: Etsyini kii we, etsyini kii Moyidze ya etsyini kii Eli.» Piere ka ákasoolo mi ákabili nde o.

³⁴ Ñaala nde nkini mu okabili obo, edzi égyi ya edzyimi-a-dzyimi ekye éfughu bo. Nzalamweé yíbagha bantumu ña básomo bo kunsá edzi.

³⁵ Ña mbihi oño, likyi lífi kunsá edzi lídzumu ti: «Wu me mwana a me, wu aansuolo me, ligyughu nde.»

³⁶ Bu bamana ogyughu ndagha oyo, bantumu bámono yini a Yíisu ngasighi. Bo ka bátsughu ndagha o mu myehene mimye, ya mu matala mamó, bo ka bályele mbwuru mi bámono bo o.

*Yíisu dzuhu mwana wu aali mufulu wu mubi
(Mat 17.14-18; Mar 9.14-27)*

³⁷ Etsughu etsyini bu eluru, Yíisu ya binduono bi nde bitere bámunu ku nsie a munguo, ya mpwumu a baara yi nene yíyabwana a Yíisu.

³⁸ Ña kara li mpwumu a baara, baghala mutsyini ákehe engubu ndiri: «Muluo, yóboo, mono mwana a me nyí! Yini a mumõ wu me ndi a nde.

³⁹ Nswe matala, mufulu wu mubi aakasomo mu nde. Mu obo, mu matala maana mamó, mwana agwolo baana okehe mingili. Nde bwi elogho, ya fulu lipala mu muñma. Mufulu munde li mu osuo nde kimini ya ka dzyi onyaã nde o.

⁴⁰ Me aambuono binduono bi we bibyi mufulu munde, lo bye ka biileene o.»

⁴¹ Yiisu ágwi mvuru yi: «Ekaana ki egwene a kana, ya ki egwunumu! Tee nki matala me aankala ya be? Ya tee nki matala me aankuru mukolo mu be?» Mu obo Yiisu ályele baghala munde ndiri: «Yabiri mwana a we ɲa!»

⁴² Mu matala ma ókayabehene mwana kundaa Yiisu, mufulu wu mubi ábwíhi nde mu nsie ya ányíhi nde mu mpini yohono. Lo Yiisu áfulu mufulu wu mubi epama, ádzuhu mwana ya ábvurulu nde kundaa taara a nde.

⁴³ Baara bwohono bákinjimi mu omono mpaana a Nzaami.

*Yiisu firibili mu mi mitala lipfu li nde
(Mat 17.22-23; Mar 9.30-32)*

Ʋaala baara nkini mu okakinjimi mu mandagha ma ókasa Yiisu, nde ályele kundaa binduono bi nde ndiri:

⁴⁴ «Be, ligyighili otyeghe matswi mu mandagha ma: Bafaana otyeghe Mwana a mbwuru ɲa myaã mi baara.»

⁴⁵ Lo binduono bi nde ka bábaghala ndagha oyo o. Nzaami átwulu bo kunsá nzi-nzimini mu kuulu banyaã ogyahaba mambaala ma ndagha oyo, ya bye bíbara nzalamweẽ mu ofwulu Yiisu.

Nande luru bunene ɲa kara li binduono

⁴⁶ Binduono bísoho bo-a-bo mu ogyahaba nande luru bunene ɲa kara li bo.

⁴⁷ Lo Yiisu bu agyahaba bitsimi bi bo, ágwolo muke-muke, átwulu nde ɲa bele a nde

⁴⁸ ya ályele bo ndiri: «Nswe mbwuru wu gyagha muke-muke wu, mu nkwumu a me, meme nde agyagha. Ya nswe mbwuru wu gyagha me, wu aagweghe mehe si nde agyagha. Mu kuulu

munde wu luru busala ŋa kara li be bwohono, me munde bvulu bunene.»

Munde wu gwene bele bihi, ya bihi ali

⁴⁹ Na mbihi oŋo, Dzã ályele Yĩisu ndiri: «Muluo, bihi liimono baghala mutsyini wu li mu okabyi mifulu mi mibi mu nkwumu a we. Bihi liisagha okahaba nde mu kuulu nde ka li mu okanama we ya bihi o.»

⁵⁰ Lo Yĩisu ályele nde ndiri: «Ka likahaba nde o, mu kuulu munde wu gwene bele be, ya be ali.»

Babihi ogyagha Yĩisu mu bula butsyini baba Samari

⁵¹ Yĩisu ámono ti matala maa osihi nsie mu ogye ku yulu maabehene. Nde ágwolo munkaana wu ogye ku Yerusaleme.

⁵² Nde átswahaba baara ba bágyene ku bula butsyini baba etsulu e nsie kii Samari mu ogyighili nde ebini kii ogyoŋomo.

⁵³ Lo baara ba bula bubo bábihi ogyagha nde, mu kuulu bagyahaba ti nde ku Yerusaleme ákagye.

⁵⁴ Bu bágyughu obo, binduono bi nde byele, Dzake ya Dzã bályele ti: «Mfumu, we dzyi ti bihi liluomo mbaa yi mayulu yisughuru yiyadzwa bo?»

⁵⁵ Yĩisu ákaghala kundaa bo ya áfyeẽ bo.

⁵⁶ Mu obo, Yĩisu ágyene ku bula bukimi ya binduono bi nde.

Ba badzyi onama Yĩisu

⁵⁷ Na báli bo mu nzili, baghala mutsyini ályele Yĩisu ti: «Me sa nama we ku nswe ebini ki aagye we.»

⁵⁸ Yiisu ályele nde ndiri: «Mibagha mili a minjma, ya banjini bali a manzo, lo Mwana a mbwuru ka li a ebini kii ogwumu bwunu we kii ogyonomo o.»

⁵⁹ Nde ályele kundaa baghala mukimi ti: «Nama me!» Lo baghala munde ábvuhulu nde ti: «Mfumu, nyaã me manswama oyidzyighi taara a me.»

⁶⁰ Yiisu ágwi nde mvuru yi: «Nyaã ba bákpi badzyighi bo-a-bo. Lo we gye yitsala Nsia yi a Emfumu e Nzaami.»

⁶¹ Baghala wu muke ályele ndiri: «Mfumu, me sa nama we, lo nsomo-a-nsomo nyaã me ngye yingwa basi dzumu li me mboro yi masini.»

⁶² Yiisu ábvuhulu nde ti: «Mbwuru wu kwara teme mu obaana osala nseghe, ya tala ku mbihi ka li a esala o mu mi mitala Emfumu e Nzaami.»

10

Yiisu gweghe binduono makwumu-nsaama ya byele

(Mat 10.7-16)

¹ Na mbihi onjo, Mfumu ásuolo babaghala makwumu-nsaama ya buolo (72) bakimi ya ágweghe buolo-buolo mu nswe bvulu ya nswe ebini ki ágwaa nde ogye.

² Nde ályele bo ndiri: «Esala kii otolo bimburu mu manseghe elagha, lo baara ba baasala basala. Liluomo kundaa Mfumu a nseghe agweghe basala bakimi mu otolo bimburu.

³ Ligye! Me ndi mu ogweghe be ti anga baana ba bindoomo na kara li bango.

⁴ Ka libiri nzi, empogholo, bwunu we bikoghoru o. Ka liluhu matala mu nzili mu okabulugwa baara mamboro o.

⁵ Nswe nzo yi liisomo be, nsomo lilyele ndiri: "Nyaã edzuunu ekala mu nzo yi!"

⁶ Kala mbwuru wu edzuunu li omo, edzuunu e be sa ekala ya nde. Kala pele, kye sa ebvughuru kundaa beme.

⁷ Mu obo, likala mu nzo oyo, lidza ya lijma nswe elogho ki baagwa be, mu kuulu musala faana obagha mufuru mu esala e nde. Ka lipala mu nzo oyo mu oyigyonomo mu nzo nswe nzo o.

⁸ Kala ti be lisomo mu bvulu litsyini ya baara bagyagha be, lidza bi baagwa be.

⁹ Lidzuhu babyele ba bali mu bvulu lilo, ya lilyele baara ndiri: "Emfumu e Nzaami eeyabehene ya be."

¹⁰ Lo, kala be lisomo mu bvulu litsyini ya baara babihi ogyagha be, ligye mu minsagha ya lilyele ti:

¹¹ "Bihi likubulu si lifufunu li bvulu li be li liinabara mu myili mi bihi. Lo ligyahaba yo ti Emfumu e Nzaami ali eeyabehene ya be."

¹² Me ndi mu olyele be enganma, mu etsughu ki oosa Nzaami muyala a basi nsie, masyeme ma basi Sodome sa maluru osala ya mama bvulu lilo.»

*Mabvulu ma mabihi osa kana Yïisu
(Mat 11.21-23)*

¹³ «Nyĩ mu be, baara ba bvulu lili Koradzine, ya behe si baba bvulu lili Betesayida! Kala ti bimamaã bi oosi Nzaami mu mabvulu ma be, ku mama Tire ya Sidõ nde ási bye, baara baa oko nkini edzighi ekye ali bakaagyiñi mayele, bakaalaha mangooro, ya bakaagyogho lifuru a mbaa mu nyuru mu osuo ti bo baagyiñi mayele.

¹⁴ Mu obo, mu etsughu ki oosa Nzaami muyala a basi nsie, masyeme ma oobagha Tire ya Sidō sa maluru osala ya ma liibagha be.

¹⁵ Behe si, baara baba bvulu lili Kapere-nawume! Be bu liikatsimi ti Nzaami sa akuhubu be tee ku mayulu? Pele, be sa libwa ku nsini a ebini ki oli mu okakebe ba bákpi masyeme.»

¹⁶ Yiisu áfirilyele binduono bi nde ti: «Nswe mbwuru wu gyughu be, me agyughu. Nswe wu bihi be, me abihi, ya nswe mbwuru wu bihi me, mbwuru wu aagweghe me abihi.»

*Binduono makwumu-nsaama ya byele (72)
biyabvughuru*

¹⁷ Binduono makwumu-nsaama ya byele (72) bíyabvughuru ya esee kyehene ya bílyele ti: «Mfumu, si okala mifulu mi mibi miikagyughu bihi, ña liikatumu bihi mye mipala mu baara mu nkwumu a we!»

¹⁸ Yiisu ágwi bo mvuru yi: «Me áli aankamono ña ófi Satana ku yulu ya ábwi ti bu ookabwa ngayulu.

¹⁹ Ligyughu! Me aangwi be mpaana yi odzyara mu yulu a bantaala ya bangie, ya mu odzyara lileene lwohono li mutaara, ya ka oli a elogho ki ekughu osa be bubi o.

²⁰ Lo ka linene mu kuulu mifulu mi mibi mili mu okagyughu be o. Likala a esee mu kuulu mankwumu ma be baasono mo mu mayulu.»

*Esee e Yiisu
(Mat 11.25-27)*

²¹ Mu matala mamu, Mufulu a Ngili áluhu Yiisu mu esee ki elagha, mu obo Yiisu ályele ti:

«Taara, Mfumu a yulu ya nsie! Me mvurulu we matuono, mu kuulu we aasweghe mandagha ma kundaa banga-a-munzeele ya banga-a-maye, lo we aasuo mo kundaa bike-bike. Mu enganma, Taara, weme aadzyi ti okala obo.

²² Taara a me, we aatwulu bilogho byehene ŋa myaã mi me. Ka oli a mbwuru wu gyahaba Mwana nande ali o, kala ka oli yini a Taara o, ya ka oli a mbwuru wu gyahaba Taara nande ali o, kala ka oli Mwana. Mwana dzyi osuo bo Taara mu kuulu boho si basoolo nde.»

²³ Na nseele, Yiisu ákaghala kundaa binduono bi nde ya ályele yini a kundaa bo ti: «Esee mu be ba lili mu okamono mandagha ma!

²⁴ Mu enganma, me ndi mu olyele be, mimono ya mikogho milagha miikadzyi omono mi lili mu okamono be, lo ka miimono mye o. Boho si báli a nzala ogyughu mi lili mu okagyughu be, lo ka baagyughu mye o.»

Nkumu yi a musí Samari nga-a-mukolo wu mubwe

²⁵ Muluo-mikyene mutsyini ágyi kundaa Yiisu mu osagha obwihi nde, nde átsughu ndagha ti: «Muluo! Emakye me mfaana osa mu obagha laama lii mibvu ya mibvu?»

²⁶ Yiisu ágwi nde mvuru yi: «Bunu-abo básono mu mikyene mi Nzaami? We bunu-a-bo li mu obaghala mye?»

²⁷ Baghala munde ábvuhulu bu: «Dzyi Mfumu Nzaami a we mu mukolo a we wohono, mu muwumu a we wohono, mu mpini a we yohono ya mu bitsimi bi we byehene. Ya Dzyi nganda-mbwuru ti budzyi we nyuru a weme.»

²⁸ Mu obo, Yiisu ályele nde ti: «We aagwi mvuru yi mbwe. Sa obo, ya we sa bagha laama.»

²⁹ Lo baghala munde bu ádzyi osuo ti efwulu e nde éli mu nzili, nde áfwulu Yiisu ndiri: «Nande li nganda-mbwuru a me?»

³⁰ Yiisu ábvuhulu bu: «Etsughu etsyini baghala mutsyini ámara Yerusaleme ya ákakumunu ku Dzeriko. Mu nzili, bantwumu bábwirili nde, bátwulu nde mpene, ágwyini a nde mpaana, átaghaba ngaama ya bo bábulusihi nde.

³¹ Ngaa a nzaami mutsyini áluru mu nzili oyo. Bu amono baghala munde, nde ábululuru o nde mu mukogho a nzili wu muke.

³² Na mbihi oño, mu-Lebvite áyato oño. Bu amono baghala munde, ndehe si áluru mu mukogho a nzili wu muke.

³³ Lo musí Samari mutsyini áluru si mu nzili oyo. Bu amono baghala munde, nyíi yíbagha nde.

³⁴ Mu obo, nde ásele na bele a nde, ási nde maala ya bviini mu mambaala ya ákuru mo. Na mbihi oño, nde ákuhubu nde na yulu a syevale a nde, ábiri nde ku nzo a banzyi, ya ábughu nde.

³⁵ Bwihi bu buki, nde ágwolo badenye* buolo, ágwi kundaa musala a nzo a banzyi, ya ályele nde ti: “Gyighili oyabughu nde, ya na ayamvughuru me, me sa mvurulu we nzi yi aagyehe we mu nde na yulu.”»

³⁶ Yiisu áfirilyele nde ndiri: «Na kara li baara batere babo, nande li nganda-mbwuru a baghala munde wu ogwyini a bantwumu mpaana?»

* **10:35 10.35** Denye litsyini lili nzi yi bákañiri mbwuru mu etsughu etsyini kii esala.

³⁷ Muluo-mikyene ábvuhulu ti: «Me mbwuru munde wu aamono nde nyĩ». Mu obo Yiisu ályele ti: «Gye, ya wehe si sa bumõ».

Yiisu ku nzo a Marete ya Mari

³⁸ Mu matala maala Yiisu áli mu nzili ya binduono bi nde, nde ásomo mu bula butsyini, mukaha mutsyini wu a nkwumu Marete agyagha nde mu nzo a nde.

³⁹ Nde áli a mbwee wu mukaha, nkwumu a nde Mari. Nde áyibwa nsini ña myili mi Mfumu ya ákagyughu maluo ma nde.

⁴⁰ Bisala bi nzo áli bígwolo Marete nyuru. Mu obo nde ásele ña ndaa Yiisu ya ályele nde ti: «Mfumu, we ka li mu otsimi ti mbwee a me bubi aasi mu onyaã me ngasighi ya esala kyehehe ki o? Lyele nde ayabaha me.»

⁴¹ Mfumu ábvuhulu nde bu: «Marete, Marete, we li mu onyoõ ya omono mukolo mpara mu mandagha malagha.

⁴² Lo yini a elogho etsyini eli a mupfunu. Mari aasuolo kaba li libwe, ya ka oli ya mbwuru wu aagwohono nde lo o.»

11

Yiisu luo binduono bi nde bu bafaana osamana

¹ Etsughu etsyini, Yiisu ákasamana ña ebini etsyini. Bu amana, mumõ ña kara li binduono bi nde ályele nde ti: «Mfumu, luo bihi bu lifaana osamana, ti bu óluo Dzã binduono bi nde».

² Yiisu ályele bo ndiri: «Ña liikasamana be, liikalyele bu:

“Taara,

nyaã nkwumu a we yikala yi a ngili,
nyaã Emfumu e we egya!

³ Gwa bihi bi-odza bibi faana mu nswe etsughu.

⁴ Sa masumu ma bihi kolokolo, mu kuulu bihi si
liikasa babo ba baakasa bihi bubi kolokolo.
Ya ka atala bihi libwa mu bigyeele o.”»

⁵ Yiisu áfirilyele bo ndiri: «Kala mumõ ña kara
li be gyene yitala ndughu a nde kara-a-kara a
mpyibi mu olyele nde ti: “Ndughu a me, sohobo
me mampa matere.

⁶ Mu kuulu me mumõ mu bandughu ba me wu
li mu dzwe maayato ku nzo a me, ya me ka ndi a
elogho ki aangwa nde o.”

⁷ Kala ti ndughu a we wu li munsa nzo bvuhulu:
“Nyaã me pii, me nzo aankuru ofi, ya me ya baana
ba me liigyonomo. Me ka nkughu ofirisighili mu
ogwa we mampa o.”

⁸ Me ndi mu olyele be yo: “Si kala ti nde ka
sighili o ya ogwa we mampa mu kuulu we li
ndughu a nde, nde sa asighili ya sa agwa we
byehene bi li a we nzala bye, mu kuulu we ka
aabara budzwa o mu oluomo ya we aasi epini.”

⁹ Mu obo, me ndyele be ti: “Liluomo, ya sa
bagwa be, lisagha, ya sa libagha, likoboro, ya sa
badzubulu be.

¹⁰ Mu enganma, munde wu luomo sa bagwa
nde, munde wu sagha, sa abagha, ya sa
badzubulu kundaa munde wu aakoboro.

¹¹ Nki Taara wu kughu ogwa mwana a nde
ntaala kala ti mwana luomo nde nswi?

¹² Bwunu we ngie, kala ti mwana luomo nde bi?

¹³ Kala ti be baara ba babi lisoolo ogwa bilogho
bi bibwe kundaa baana ba be, lo Taara a be wu li

ku mayulu, bunu akughu ogwene ogwa Mufulu a Ngili kundaa babo ba baaluomo nde nde?”»

Yiisu byi mifulu mi mibi

(Mat 12.22-30; Mar 3.22-27)

¹⁴ Etsughu etsyini, Yiisu ábyi mufulu wu mubi wu áasi ti mbwuru akala nkini. Mufulu munde bu apala, baghala munde ábaana obili ya mpwumu a baara yíkinjimi ku olagha.

¹⁵ Lo baara bana bályele ti: «Me mu nkwumu a Beledzebule, mukwuru a mifulu mi mibi nde ali mu okabyi mifulu mimye.»

¹⁶ Ya babake, bu bádzyi ogyeele Yiisu, báluomo nde asa elyimi ki eefa ku yulu.

¹⁷ Lo Yiisu bu ágyahaba bitsimi bi bo, ályele ndiri: «Nswe nsie yiili baara bali kunsá etaara ka yilaama o, ya manzo ma yo sa maakabwa mana na yulu a mamake.

¹⁸ Mu obo, kala Satana li mu osa ti baara ba nde badzwana bo-a-bo, bunu-a-bo emfumu e nde eelaama? Be lili mu okalyele ti me Beledzebule li mu okagwa me mpaana yi obyi mifulu mi mibi.

¹⁹ Kala ti Beledzebule li mu okagwa me lileene lii obyi mifulu mi mibi, lo baana ba be nande aakagwa bo lileene lii okabyi mye? Mu obo, bo bomo sa balyele ti be ligyahaba ndagha.

²⁰ Lo, kala mu lileene li Nzaami me ndi mu okabyi mifulu mi mibi, oli mu osuo ti Emfumu e Nzaami ayi emaayato kundaa be.»

²¹ «Na ookakebe baghala nga a mpini wu li a bidzwana bi bikughu nzo a nde, bilogho bi nde byehene biikakala kunsá ekagha.

²² Lo, kala mbwuru wu luru nde mpini yadzwana ekyini ya nde, mbwuru munde sa

agwohono bidzwana bi nde byehene bi aakasa nde kana, ya sa akaba bilogho bi nde byehene.»

²³ «Nswe munde wuulu ka li emō ya me o, li mutaara a me, ya nswe munde wu aagwene okabvughu ya me, nde aakatsala.»

Mufulu wu mubi bvughuru mu nyuru a mbwuru

²⁴ «Ŋa ookapala mufulu wu mubi mu nyuru a mbwuru, nde aakayisagha ebini kii ogwumu ku syehe. Kala ti ka bagha kye o, nde sa atsimi bu: “Nyaã me mbvughuru ku nzo ku aamfi me.”

²⁵ Mu obo nde sa abvughuru ya sa ayabagha nzo bakuomo ya yifaana.

²⁶ Ŋa mbihi oŋo, nde sa apala ayigwolo mifulu mi mibi mikimi nsaama mi miluru nde bubi. Mye sa miyasomo ya sa mikala omo. Mu obo, mbwuru sa amono mpara yiluru oyo yi áli a nde nsomo.»

Esee kii nganma

²⁷ Yiisu bu amana obili obo, mukaha mutsyini wu áali kunsá mpwumu a baara átsughu ndagha ti: «Esee kundaa mukaha wu aaburu ya aanmihí we mabyene!»

²⁸ Lo Yiisu ágwi mvuru yi: «Lo esee kundaa baara ba bali mu okagyughu Ndagha a Nzaami ya ba bali mu okasalala yo.»

Yiisu bihi osa emamaã

²⁹ Ŋa ósi mpwumu a baara Yiisu ŋa kara, nde ályele bo ndiri: «Baara baba eseene kii lolo ki bali babi! Bo bali mu oluomo elyimi. Lo ka bamono elyimi o, kala ti ka yini a kii Dzonase o.

³⁰ Mu kuulu, bwunu a bu óli Dzonase elyimi mu basi Ninibve, Mwana a mbwuru si sa akala elyimi mu baara baba eseene ki.

³¹ Mu etsughu ki osa Nzaami mumfwunu a basi nsie, Ngasa a nsie yi a Sude sa atemene ña nkulu a baara baba eseene ki, ya sa agwa bo masyeme, mu kuulu nde aamara bula bu nde ba buli la mu oyagyughu maluo mama bunsughu ma ookaluo Salomō. Lo ña oli ya mbwuru wu bvulu Salomō.

³² Mu etsughu kii mumfwunu a basi nsie, basi Ninibve sa batemene ña nkulu a baara baba eseene ki, ya sa bagwa bo masyeme mu kuulu bo baagyinji mayele ña baagyughu bo mukwughu wu ooti Dzonase. Lo, ña oli ya mbwuru wu bvulu Dzonase.»

Nkumu yi a mwindi

³³ «Ka oli ya mbwuru wu aakanahaba mwindi mu osweghe nde bwunu we mu ofughu nde nkuru o, lo ña yulu ebini ki baakatwulu mwindi mu kuulu ba baasomo mu nzo bakala kunsá otsyeme.

³⁴ Lihi li we lili ti mwindi a nyuru a we. Kala nta-ntala a we li yi mbwe, nyuru a we yohono sa yikala kunsá otsyeme. Lo, kala nta-ntala a we li yi mbi, nyuru a we yohono sa yikala kunsá mpyibi.

³⁵ Mu obo, we faana osa mayele mu kuulu otsyeme ku oli mu we onyaã okala mpyibi.

³⁶ Kala nyuru a we yohono yili kunsá otsyeme, ku ogwene a esighi si etsyini kunsá mpyibi, yo yohono sa yikala kunsá otsyeme ti ña ookatse-hebe we mwindi.»

Yiisu fyeẽ ba-Faridzyẽ ya Baluo-Mikyene

³⁷ Yiisu bu amana obili, mu-Faridzyē mutsyini ályele nde ayidza ku nzo a nde. Mu obo Yiisu ásomo mu nzo ya ábwi nsini mu odza.

³⁸ Mu-Faridzyē munde ákinjimi mu omono ti Yiisu ka áswagha myaã o, nsomo-a-nsomo abaana odza ti bu óli ekulu ki ba-Dzwife.

³⁹ Mu obo, Mfumu ályele nde ti: «Be ba-Faridzyē, be lili a epfu ki okatsehebe bibaha ya mandonõ ma be ku mbihi, lo mu kara be lili a nzala a pfyibi ya mandagha mama nkehe.

⁴⁰ Be mayele we! Nzaami wu aagyighili bilogho bi biikamonõ, me nde si aagyighili mukolo a mbwuru.

⁴¹ Mu obo ligwa bawele bilogho bi bili mu bibaha ya mandonõ ma be, ya bilogho bi be byehene sa bikala bibi tse-tse.»

⁴² «Lo nyĩ mu be ba-Faridzyē! Be liikagwa Nzaami kaba lili kwumu lili bilogho bi liikakunu be, ti bu oli mampihi-a-mpihi ya miswoho mimi bifa-bifa. Lo be liikadzinimi bunsumu ya dzyi li Nzaami. Mamo mandagha ma lifaana okasa be, ya ogwene odzinimi bibike nsimi.»

⁴³ «Nyĩ mu be ba-Faridzyē! Be liikadzyi okabwa nsini mu bipehe bibi ku nkulu mu manzo ma lisamana, ya be liikadzyi ti baara bakagwa be mamboro mama budziri mu bibini bi ookab-vununu baara.

⁴⁴ Nyĩ mu be! Be lili efaana kii mampyeme ma magwene a elyimi, maala baara bali mu okadzyara mo ku ogwene a ogyahaba.»

⁴⁵ Mumõ ña kara li baluo-mikyene ályele nde ndiri: «Muluo, ña bili we obo, we aatughu bihi si!»

⁴⁶ Yiisu ábvuhulu nde ti: «Nyĩ si mu be baluo-mikyene! Be liikagwa baara matsulu mama leme mu obiri, lo be ka liikabaha bo si eke o.

⁴⁷ Nyĩ mu be! Mu kuulu be liikatwu mampyeme ma mibighili, lo bankagha ba be báadzwi mye.

⁴⁸ Mu obo, be lili mu okasuo bumpughulu ti be liikakihi bigyighili bi ósi bankagha ba be, mu kuulu bo bádzwi mibighili, ya be liikatwu bo mampyeme.

⁴⁹ Lo Nzaami mu mayele ma nde mwohonon ályele bu: “Me sa ngweghe mibighili ya bantumú. Bo sa badzwa bana ya sa bamwehẽ babake kimini.”

⁵⁰ Mpaala baara baba eseene ki babagha masyeme mu nkooro a makili ma mibighili myehene mi bádzwi obaana ebaana e nsie,

⁵¹ obaana lipfu li Abele tee mu lili Dzakari wu bádzwi ŋa kara li ebini ki baakatsughu Nzaami bikaba ya nzo a Nzaami yi nene. Me ndi mu olyele be, baara baba eseene ki sa babagha masyeme mu nkooro a makili ma bo.»

⁵² «Nyĩ mu be baluo-mikyene, mu kuulu be liimaha bvungulu li nzo yi aakagwa baara ligyabaha, be beme ka liisomo omo o, ya lili mu okakahaba babo ba badzyi osomo omo.»

⁵³ Mu matala ma ómara Yiisu ŋa ebini ekye, baluo-mikyene ya ba-Faridzyẽ bábaana okolo nde nkehe yi mbi ya okagwa nde bifwulu mu mandagha malagha.

⁵⁴ Bo bákasagha osomo nde mu mweẽ nkini-an ki nde ákughu opaha ndagha yi mbi.

12

Baara banga a bifa byele

¹ Mu matala mamu, mapfwunu ma baara mayabvununu, mu obo babake bákadzyara myili mi banganda. Yiisu ábaana olyele kundaa binduono bi nde ti: «Lisa mayele mu pfini lili ba-Faridzyě, li lili mandagha mama fughuru-fughuru.

² Etsughu eli kiili mandagha mwohonu ma máswe me sa magyighili omonono, ya mansweghe mwohonu sa bagyhaba mo.

³ Mu obo, mandagha mwohonu ma liibili be kunsu mpyibi, sa bagyughu mo mu nkara a mwĩ, ya mandagha ma liilyele be mu mamfwunu munsu mangwumu ma manzo, sa bata mo mukwughu ku yulu a see li nzo lili eyala.»

Mbwuru wu bafaana obara

⁴ «A baana-abo, me bu ndyele be: Ka libara baara baala yina a nyuru bakughu odzwa o, lo ka bakughu osa elogho ekimi o.

⁵ Me be aansuo nande be lifaana obara. Mbwuru wu lifaana obara be, munde wuulu ŋa mbihi ŋa aamaha nde mbwuru muwumu, nde li a lileene lili otsili nde ku mungele-a-mbaa. Me ngyighili olyele be yo, me nde be lifaana obara.

⁶ Ka baakatyeghe binswini-a-nswini bitaana mu mana a mipara myele o? Lo Nzaami ka aakadzimini si emō mu bye nsimi o.

⁷ Ngu okala mfu a be yi a ku mutswi, Nzaami gyhaba mutala a yo. Mu obo ka likala a nzalamweē o. Ŋa mihi mi Nzaami, be liluru mupfunu ya binswini-a-nswini bilagha!»

Okihi bwunu we obihi Yiisu

⁸ «Me ndyele be bu, nswe mbwuru wu aakihi me na mihi mi baara, Mwana a mbwuru si sa akihi nde na mihi mi bangye-yulu ba Nzaami.

⁹ Lo munde wu aatunu na mihi mi baara ti nde ka gyahaba me o, Mwana a mbwuru sa abihi nde si na mihi mi bangye-yulu ba Nzaami.

¹⁰ Nswe mbwuru wu tughu Mwana a mbwuru kughu obagha kolokolo, lo munde wu aatsaala Mufulu a Ngili ka kughu obagha kolokolo o.

¹¹ Na akala baabiri be mu manzo mama lisamana ma ba-Dzwife mu osa be muyala, bwunu we kundaa bamfumu ya ba baakatumu, ka likala a mikolo maã-maã mu mandagha ma liibvuhulu be bo o, bwunu we mu mandagha ma akala liibili be.

¹² Mu kuulu mu matala mamo Mufulu a Ngili sa asuo be mandagha ma lifaana obili be.»

Nkumu yi a esini ki egwene a munzeele

¹³ Mbwuru mutsyini na kara li ba báli onjo ályele Yiisu ti: «Muluo, lyele naana a me akaba ya me pfa li oosihi taara bihi.»

¹⁴ Yiisu ágwi nde mvuru yi: «Ta baghala, nande aatwulu me nsughu a lamana a be bwunu we mbwuru wu aakaba pfa li be?»

¹⁵ Na mbihi onjo nde ályele bo ndiri: «Lisa mayele linyaã okala a ntono a nzi, mu kuulu mbwuru ka kughu obagha laama lili nganma mu nkooro a bilogho bi ali a bye o, si kala ti nde li a bye kyele.»

¹⁶ Mu obo nde áti bo nkumu yi: «Esini etsyini éli a manseghe ma máburu ku olagha.

¹⁷ Nde ákatsimi ti: “Bunu-abo me aansa? Me ka aafirinsyili a ebini kii olwunu bimburu byehene bi aantolo me mu nseghe o.”

¹⁸ Mu obo, nde ályele ti: “Me bu aansa: Me sa mbwihi bitaghala bi me ya me sa ntwu bibaã bi biluru bunene, ya me sa ntwulu mburu a bele a me ya bilogho bi me omo.

¹⁹ Na mbihi oŋo sa ndyele muwumunu a ti: We aabunu bilogho bilagha bi bikughu osa bamvulu balagha. Gwumu o we, dza, ŋma ya kala mu esee!”

²⁰ Lo Nzaami ályele nde ti: “We ewulu! Mu mpyibi yiyi we kpa aakpa. Lo bilogho byehene bi aalwunu we, nande aabyala bye?”»

²¹ Yiisu áfiribwehe bu: «Bumõ kundaa munde wu aakakwu busini mu nkooro a ndeme, lo nde ka li esini ŋa nkulu a Nzaami o.»

Osa kana mu Nzaami
(Mat 6.25-34)

²² Na mbihi oŋo, Yiisu ályele binduono bi nde ndiri: «Me mu obo me ndyele be ti: Ka limono mukolo mpara mu nkooro a bi-odza bi bifaana mu laama li be o, bwunu we mu binkuru bi bifaana mu manyuru ma be o.

²³ Mu kuulu, laama liluru bi-odza, ya nyuru yiluru binkuru.

²⁴ Litala bangankwaã: Bo ka baakakunu o, ka baakatolo o, ka bali a bibaã bwunu we mangwumu ma baakalwunu bimburu o, lo Nzaami aakabuŋunu bo. Ligyahaba ti be liluru banmini mupfunu.

²⁵ Nande ŋa kara li be kughu obwehe etsughu mu laama li nde mu nkooro a minyoõ mi nde?

²⁶ Kala be ka likughu osa enda-ndagha kii obo o, mu emakye be lili a minyoõ mu bilogho bibike?

²⁷ Litala bu ookamene bifulu mu ebiri, bye ka biikasala o, bye ka biikatwu o, lo me ndyele be ti, si kala Salomõ, mbwuru wu áali a nsia yi alagha, ka álaaha bubwe oluru efulu emõ mu bye o.

²⁸ Kala ti Nzaami aakalaha obo lolo nsele yili mu ebiri ya yiili mbala sa batsili yo ku mbaa, lo bunu-abo nde akala aangwene olaha be obo, be baara banga-a-kana li lisala?

²⁹ Lo be, ka likasagha bilogho bi liidza bwunu we bi liinma, ya mikolo mi be minyaã okala mu yulu mu okatsimi mandagha mamu.

³⁰ Mu kuulu, yini a babo baala ka bali ba-Dzwife o baakasughu mukolo mu bilogho byene bibye. Lo Taara a be gyahaba ti be lili a nzala a bilogho bibye.

³¹ Nsomo-a-nsomo be lifaana osagha Emfumu e Nzaami, ya sa bagwa be bilogho bibike bibye.»

³² «Mukaã a bindoomo wu asala, ka kala a nzalamweẽ o, mu kuulu Taara a be aamono ti oli bubwe nde agwa be Emfumu e nde.

Busini mu mayulu

(Mat 6.19-21)

³³ Lityeghe bilogho bi lili a be ya ligwa nzi kundaa bawele. Likala a bimpogholo bi nzi bi biigwene okakagha, lilwunu mu mayulu busini bu buugwene okafa, mu kuulu oko muturu ka kughu oturu bo o, ya bansiele ka bakughu odza bo o.

³⁴ Mu kuulu ebini ki okala busini bu be, me onjo ña okala mikolo mi behe si.»

Bisala bi biikakahala mihi

³⁵ «Likala yeelee, *likuru nswele mu bala* ya lisa kuulu ti miindi mi be mikala mi minama.

³⁶ Behe si, likala ti anga baara ba bali mu okakebe mfumu a bo, wu aagyene ku kyiri kii mabala, mpaala badzubulu nde nzo maswa-maswa na ayabvughuru nde ya na aakoboro nde munjma a nzo.

³⁷ Esee kundaa bisala bi ooyabagha mfumu a bo na aagya nde mu okakahala mihi! Mu enganma, me ndyele be, nde sa alaha binkuru bi nde bii esala, sa abwihi bo nsini na tabele, ya nde ndeme sa agwa bo bi-odza.

³⁸ Ngu okala ti nde gyi kara-a-kara a mpyibi bwunu we ku ookya bwihi, ya nde ayabagha bo mu okakahala mihi, bo sa bakala kunsu esee ki elagha.

³⁹ Limatsimi ati. Kala ti nga-a-nzo aakasoolo matala ma okagya muturu, nde nkini aakasa myehene mu kuulu banyaã obulu nzo a nde.

⁴⁰ Behe si likala yeelee, mu kuulu Mwana a mbwuru kughu ogya mu matala maala be ka lili a si bitsimi bi mo o.»

Esala ki ebwe ya ki ebi

⁴¹ Mu obo Piere áfwulu nde ti: «Mfumu, we yini a mu bihi aati nkumu oyo, bwunu we mu baara bwohono?»

⁴² Mfumu ábvuhulu nde ndiri: «Nande li musala wu aakakebe ya aakasalala bilogho bi mfumu a nde wu mayele ya wu bakughu osa kana mu nde, wu ootwulu mfumu mukwuru a basala ba nde, mu kuulu akagwa bo bi-odza mu matala ma mafaana?

⁴³ Esee kundaa musala munde kala ti mfumu a nde yabvughuru ya yabagha nde mu okasala esala ekye!

⁴⁴ Mu enganma me ndyele be, mfumu munde sa agwa bilogho bi nde byehene na myaã mi nde, mu kuulu nde akatala bye.

⁴⁵ Lo kala ti musala munde tsi mi bu: “Mfumu a me li mu ogyili”. Ya kala nde baana odzwa basala babake baba babaghala ya baba bakaha nkubu, kala ti nde bwi mu odza, onma ya okolo mala,

⁴⁶ mfumu a musala munde sa ayabvughuru ensihibi mu etsughu ya matala maala nde ka agyahaba o. Nde sa agwini a nde nkubu yi luru, sa abagha masyeme mamu ya baara ba bagwene a kana.

⁴⁷ Musala wu gyahaba mi okadzyi mfumu a nde, lo kwono ogyighili dzyi li nde, sa bakaha nde nswa-nswa yi alagha.

⁴⁸ Lo munde wu gwene gyahaba mi okadzyi mfumu a nde ya gyighili mandagha ma makughu osa ti bakaha nde nswa-nswa, ka badzwa nde nkubu yi alagha o. Sa basagha bi bilagha kundaa munde wu baagwi bi bilagha. Sa baluomo bi biluru kundaa munde wu baagwi bi bibvulu.»

Yiisu aayabiri munkaghaba

⁴⁹ «Me aayantsili mbaa na yulu a nsie. Me ali ndzyi omono mbaa oyo yimaalughulu.

⁵⁰ Oli a liboghoru li mfaana me obagha, ya mukolo a me li a mbaa mu obaabagha lo!

(Mat 10.34-36)

⁵¹ Be bu litsimi ti me edzuunu aayangwa na nsie? Pele! Me bu ndyele be: Me aangyi mu okabala baara.

⁵² Mu kuulu, obaana etsughu kii lolo dzumu lili baara bataana sa likaghaba, nkolo mō baara batere, nkolo yinke baara buolo:

⁵³ Munkaghaba sa akala ŋa kara li taara ya mwana a nde wu baghala, ŋa kara li *mwana wu baghala* ya taara a nde, ŋa kara li ngughu ya mwana a nde wu mukaha, ŋa kara li *mwana wu mukaha* ya ngughu a nde, ŋa kara li *bako ba bakaha bo-a-bo*.»

Obaghala bilyimi bibi matala ma

⁵⁴ Yiisu áfirilyele kunda mpwumu a baara bu: «Ŋa liikamono be edzi kii epyini ku ookadzyama tala, mu matala maana mamo be liikalyele ti: “Mvulu sa anoō”. Ya ookakala obo.

⁵⁵ Ya ŋa liikamono be efulu ki eekafa ku Sude, be liikalyele: “Lolo mwĩ sa agyighili obala”. Ya ookakala obo*.

⁵⁶ Be baara ba lili fughuru-fughuru! Be ligyaghaba okabaghala mandagha ma liikamono ku yulu ya ŋa nsie ŋa. Mu emakye liikuono obaghala mandagha ma mali mu oluru mu matala ma?»

Eyiẽ ya mitaara

(Mat 5.25-26)

⁵⁷ «Mu emakye be beme liikakuono obaghala mandagha mama bunsumu?

⁵⁸ Mu matala ma li mu okagye we kundaa nsughu a lamana ya mutaara a we, sa myehene mu ogwihini ya nde ŋaala be nkini mu nzili. Kala pele, mbwuru munde sa abiri we kundaa nsughu

* **12:55 12.55** Ku baana a Isaraye, oli ya syehe li linene ku oli a mwĩ wu alagha. Mu obo efulu ki eekafa oko eekayabiri mwĩ.

a lamana, ya nsughu sa agwa we ku myaã mi bambumbulu mu kuulu balo we mu boloko.

⁵⁹ Me ndyele be, we ka pala mu boloko o, kala ti we ka mana ofiri ebyimi kyehene o.»

13

Ogyinji mayele bwunu we okpa

¹ Mu matala maana mamo, ndaama a baara báyalyle Yiisu mi míbwi mu basi Ngalile ba ódzwi Pilate, mu matala ma bákatsughu bo bikaba.

² Yiisu ábvuhulu bo ti: «Be bu litsimi ti basi Ngalile babo bámono mpara oyo, mu kuulu bo bábvulu a masumu mu baara bwohono baba mu Ngalile?

³ Pele! Lo me ndyele be, kala ti be ka ligyinj mayele o, be bwohono sa likpa ti bu bákpi bo.

⁴ Lo baara kwumu a mpuomo (18) ba bákpi na óbwi nzo yi mutele yi a Silowe na yulu a bo, be bu litsimi ti bo báluru baara bwohono babake baba Yerusaleme bubi?

⁵ Pele! Lo me ndyele be, kala ti be ka ligyinj mayele o, be bwohono sa likpa ti bu bákpi bo.»

Nkumu yi a mufinge wu aagwene okaburu bimburu

(Mat 21.18-19,43; Rom 2.4-5)

⁶ Yiisu áfirita nkumu yi: «Baghala mutsyini áli ákunu mufinge mu nseghe a nde yi a bviini. Etsughu etsyini nde áyasagha bimburu, lo ka ábagha elogho o.

⁷ Mu obo nde ályele kundaa musala a nseghe a bviini ti: “Mibvu ayi mitere mi ndi mu okayasagha me bimburu mu mufinge wu, lo ka

ndi mu okabagha elogho o. Kpaa nde! Mu emakye nde ali mu okakala nsie kuu bwunu?”

⁸ Lo musala ábvuhulu kundaa nde ti: “Mfumu, mafirinyaã nde mubvu wu. Me sa nsimi nde mu bele-a-bele, ya me sa ndo nde mbwoho,

⁹ nkini-a-nki buru bimburu mu bitsughu bi biigya. Kala pele, sa kpaa o we nde”.

Yiisu dzuhu mukaha mutsyini mu etsughu kii sabate

(Mat 12.9-13; Luk 14.1-6; Bik 146.8)

¹⁰ Mu etsughu kii sabate, Yiisu ákaluo mu nzo a lisamana a ba-Dzwife.

¹¹ Omo óli a mukaha mutsyini wu áali a mufulu wu mubi wu áagwi nde epfwumu, mu bamvulu kwumu a mpuomo (18). Ebughu e nde éli ekorono ya nde ka ákakughu otemene nsumu o.

¹² Yiisu bu amono nde, áti nde mbili ya ályele kundaa nde ti: «Mukaha, baakwulu we mu epfwumu e we».

¹³ Na mbihi oño nde ánaã nde myaã. Mu matala maana mamó, mukaha átemene nsumu ya ábwi okasyighi Nzaami.

¹⁴ Lo mukwuru a nzo a lisamana a ba-Dzwife ákolo nkehe mu kuulu Yiisu ádzuhu mbwuru mu etsughu kii sabate. Mu obo, nde ályele kundaa mpwumu a baara ti: «Bihi-a-be bitsughu bisemene lili a bye bibi esala. Liikayasagha libughu mu bitsughu bibye, lo ka mu etsughu kii sabate o.»

¹⁵ Mfumu ábvuhulu kundaa nde ndiri: «Be lili baara baba bifa bye! Mu etsughu kii sabate, nande na kara li be aagwene okanyana ngoomo

bwunu we aane a nde swe ŋa ebini ki aakadza nde mu oyigwa nde madza aŋma?

¹⁶ Ya mwana a Abarahame wu mukaha wu, bamvulu kwumu a mpuomo (18) bamaaluru, obaana bu ókuru nde Satana minkana. Mu obo, bubi mu bu aanyana me nde minkana mimye mu etsughu kii sabate?»

¹⁷ Ŋaala nde mu okabili obo, mitaara mi nde mímono budzwa, lo mpwumu a baara yímono esee mu mandagha ma manene ma mabwe ma ókasa Yiisu.

Nkumu yi a liburu li mutaade

(Mat 13.31-32; Mar 4.30-32)

¹⁸ Mu obo, Yiisu áfirilyele ti: «Mu nki efaana Emfumu e Nzaami eli, ya emakye me nkughu obvughu kye?

¹⁹ Kye efaana ya liburu li mutaade li ókunu mbwuru mu ebwa e nde. Bu lilughubu, likulu ya likighiri muti, mu obo baŋmini baba yulu báyatwu manzo mu mampala ma nde.»

Nkumu yi a pfini

(Mat 13.33)

²⁰ Yiisu áfirilyele ti: «Ya emakye me nkughu obvughu ya Emfumu e Nzaami?

²¹ Kye efaana ya pfini li ólo mukaha mutsyini ya ábvughu lo ya makaba matere mama farine. Mu obo nkpaŋa yohono yíkumu.»

Muŋma a nzo wu a sala

(Mat 7.13-14,21-23)

²² Ŋa ókagye Yiisu ku Yerusaleme, nde ákabulusomo mu mabvulu ya mu mala, ya ákabululuo.

²³ Mbawuru mutsyini áfwulu nde ndiri: «Mfumu, yini a mana ndaama a baara akala baab-vwughu?» Yiisu ágwi bo mvuru yi:

²⁴ «Lisa makpa lisomo mu munjma a nzo wu a sala. Mu kuulu, me ndyele be yo, balagha akala baasagha osomo lo bo ka baleene o.»

²⁵ «Etsughu eli mu ogya, kiili nga-a-nzo sa atemene ya sa akuru yo. Mu obo be sa likala ku mbala, sa libaana okoboro nzo ya olyele ndiri: “Mfumu, dzubulu bihi nzo!” Lo nde sa abvuhulu be bu: “Me ka ngyahaba ku liifi be o!”

²⁶ Mu obo be sa lilyele nde: “Bihi ali liikadza ya okanjma emō ya we, ya we aakaluo mu minsagha mi bihi!”

²⁷ Lo nde sa abvuhulu kundaa be bu: “Me ka ngyahaba ku liifi be o! Ligye la ya me, be bwohono ba lili mu okasa bubi!”

²⁸ Oko sa okala a bilili ya nkerene a myini, mu matala ma liimono be Abarahame, Idzake ya Dzakobe ya mibighili myehene, babwi nsini mu Emfumu e Nzaami, lo be bapaha be ku mbala.

²⁹ Baara balagha baafa ku esete ya ku wesete, ku nore ya ku sude, sa basomo kunsu malagha ma odza mu Emfumu e Nzaami.

³⁰ Ya mono, baara babake ba bali binsielembihi sa bakala baba nsomo, ya ba bali baba nsomo sa bakala binsielembihi.»

*Yiisu gyene ku Yerusaleme
(Mat 23.37-39)*

³¹ Mu matala maana mamo, ndaama a ba-Faridzyē yígyi kundaa Yiisu ya yílyele nde ti:

«Mara ɲa, gye o we, mu kuulu Erode dzyi odzwa we.»

³² Lo Yiisu ágwi bo mvuru yi: «Ligye liyilyele mubagha munde bu: “Mono, me ndi mu obyí mifulu mi mibi ya odzuhu babyele lolo, ya mbala, ya etsughu kii bitere, esala e me sa efa”.

³³ Lo me mfaana osa esala e me lolo, mbala ya mbaala ɲa epala, mu kuulu yini a ɲa Yerusaleme bafaana odzwa mubighili, ka oli nkolo nkimi o.»

³⁴ «Yerusaleme, Yerusaleme! We wu aakadzwa mibighili ya wu aakadzwa mu mameé babo ba ookagweghe Nzaami kundaa we. Lo mu nswe matala, me aakansagha obvughu baana ba we ti bu ookabvughu nsuhu baana ba nde kunsá mapaba. Lo be ka liikadzyi o.

³⁵ Mono, Nzaami sa atyeghe nzo a be ebughu. Me ndyele be yo, be ka lifirimono me o, tee matala ma liilyele be ti: *Liseme likala mu munde wu li mu ogya mu nkwumu a Mfumu.*»

14

Yiisu firidzuhu mubyele mu etsughu kii sabate

¹ Mu etsughu emō kii sabate, Yiisu áli áyadza ku nzo a mukwuru ba-Faridzyě mutsyini. Ba-Faridzyě bákagyighili otala nde.

² Mbwuru mutsyini wu áli a bubyele baba bituru ágyi ɲa nkulu a Yiisu.

³ Yiisu áfwulu baluo-mikyene ya ba-Faridzyě ti: «Bunu, oli a muswa wu odzuhu mbwuru mu etsughu kii sabate, bwunu we pele?»

⁴ Lo bo ka bábvuhulu ndagha o. Mu obo, Yiisu ákwara mubyele, ádzuhu nde ya ályele nde abvughuru ku nzo.

⁵ Nja mbihi oño, Yiisu ályele kundaa bo ti: «Nande mu be wuulu kala ti mwana a nde wu baghala, bwunu we ngoomo a nde bwi munsa dzunu li madza mu etsughu kii sabate, ka apaha nde maswa-maswa o?»

⁶ Bo ka bákughu ogwa nde mvuru mu ndagha oyo o.

Ebini kii nsomo

⁷ Yiisu bu amono ti baara ba óti mu-Faridzyě mbili mu oyadza bákasuolo bibini bibi nsomo, nde ályele kundaa bo ti:

⁸ «Kala ti mbwuru ti we mbili mu ogye ku mabala, ka ayibwa nsini nja ebini kii nsomo o. Nkini-a-nki baati mbwuru mukimi wu luru we bunene mbili.

⁹ Ya mbwuru wu aati be bansa buolo mbili anyaã oyalyele we ndiri: “Gwa nde ebini ki”. Mu obo, we sa mono budzwa mu oyibwa nsini nja ebini kii masini.

¹⁰ Lo, kala ti bati we mbili, gye yibwa nsini nja ebini kii masini, mu kuulu mu matala ma ogya munde wu aati we mbili, nde sa alyele kundaa we ti: “Ndughu a me, kumu nja yulu nja!” Mu obo, we sa kala a budziri nja mihi mi baara bwohonon ba bali mu odza ya we.

¹¹ Mu kuulu, munde wu aasagha osejene mu endeme, sa babvurulu nde linsie, ya munde wu aabvughuru linsie, sa baseene nde.»

Ndagha yitala baara ba lifaana ota mbili ku malagha

¹² Yiisu ályele si kundaa munde wu áati nde mbili ndiri: «Ŋa aakadza we mu mwiĩ, bwunu we mu nkonkolo, ka akata bandughu ba we mbili o, si okala banaana ya bambwee ba we, taara ya ngughu a we, bisini bi bili bitaa-taa ya we o, mu kuulu boho si sa babvurulu we mi aagyighili we bo.

¹³ Lo, kala we dzyi odza malagha, ta bawe, banga-a-bipfwumu, bikara ya binkpa-mihi mbili.

¹⁴ Mu obo, we sa kala a esee mu kuulu bo ka bali a elogho ki baabvurulu we o. Yini a Nzaami akala aabvurulu we bye, mu matala ma oosighili baba bunsumu mu lipfu.»

*Nkumu yi a malagha ma manene
(Mat 22.1-10)*

¹⁵ Bu amana ogyughu mandagha mamu, mbwuru mutsyini wu áabwi nsini ya Yiisu ályele kundaa nde ti: «Esee kundaa munde wu akala aadza mu malagha mama Emfumu e Nzaami!»

¹⁶ Yiisu ályele kundaa nde ndiri: «Mbwuru mutsyini ási malagha ya áti baara balagha mbili.

¹⁷ Matala ma odza bu mato, nde ágweghe musala a nde mu oyilyele bo bu: “Ligya, mu kuulu bilogho byehene biikughu”.

¹⁸ Lo bo bwohono mu etsimi emõ, bábaana ogwa mabwu. Wu a nsomo ályele nde ti: “Me aanswumu nseghe ya me mfaana oyitala yo. Me mbuono we, sa me kolokolo”.

¹⁹ Mukimi ályele nde ndiri: “Me mfi ku oswumu bangoomo kwumu, ya me ndi mu nzili mu oyigy-eele bo. Me mbuono we, sa me kolokolo”.

²⁰ Ya mukimi si ályele ti: “Me bu bu nkie, mu obo, me ka nkughu ogya o.”

²¹ Musala munde ábvughuru kundaa mfumu a nde ya ályele nde myehene mimye. Mu obo mfumu ákolo nkehe ya ályele kundaa musala a nde ti: “Sa maswa, gye mu bibini bi ookab-vununu baara bwohono, ya mu minsagha mimi munsa bvulu, gya a me ŋa bawe, ba banga-a-bipfwumu, binkpa-mihi ya bikara.”

²² Musala ályele kundaa nde ti: “Mfumu! Me aansu bu aatumu we, lo nkini ya bibini mu nzo.”

²³ Mu obo, mfumu ályele kundaa nde bu: “Gye mu manzili ya kunsu bibolo, sa myehene, tsiini baara basomo mu nzo a me mu kuulu yo yil-wulu.”

²⁴ Me ndyele be bu, mu baara ba aanti me mbili nsomo, si mumō mu bo ka adza bilogho mu kyiri e me o.»

Bunu-abo mbwuru akughu onama Yīisu

(Mat 10.37-38)

²⁵ Mu kuulu mampwumu ma baara mákanama Yīisu, nde ákaghala ya ályele kundaa bo ti:

²⁶ «Mbwuru wu dzyi ogya kundaa me, ka kughu okala enduono e me o kala ti nde ka bele taara ya ngughu, mukala, baana, bambwee ya banaana ba nde ba bakaha ya ba babaghala, ya laama li ndeme o.

²⁷ Ya munde wu bihi obiri kuruwa li nde ya onama me, ka kughu okala enduono e me o.

²⁸ Mu kuulu, ɲa kara li be mbwuru wu dzyi otwu nzo yi mutele, emakye aatswama okasa? Nsomo-a-nsomo, nde sa abwa nsini, ya sa atsimi mu mutala a nzi wu a faana, ya mu otala kala ti nde kughu omana yo.

²⁹ Kala pele, kala ti nde baana bitsini bi bibagha bi yo, ya kwono omana yo, baara bwohono ba baamono yo sa basebe nde ya balyele ndiri:

³⁰ “Mbwuru munde aabaana otwu nzo, lo aakwono omana yo”.

³¹ Bumō si kundaa mukogho wu li a bambumbulu mafwunu kwumu (10 000), kala ti dzyi odzwana mvulu ya mukogho mukimi wu li a bambumbulu mafwunu makwumu muolo (20 000), ema aatswama osa? Nsomo-a-nsomo, nde sa abwa nsini ya atsimi kala ti nde kughu oyibwana a munde wu aayabaana nde mvulu.

³² Kala nde mono ti ka akughu o, nde sa agweghe nde ntumu buulu bagwihini mu osa eyeye, ɲaala wu muke nkini la.

³³ Mu obo, nswe mbwuru ɲa kara li be ka kughu okala enduono e me o, kala ti nde ka asihi bilogho bi nde byehene o.»

Mungba wu gwene a ntyere

(Mat 5.13; Mar 9.50)

³⁴ «Mungba li elogho ki ebwe, lo kala ti ntyere a nde yifi, bunu-a-bo bakughu ofribvurulu nde yo?

³⁵ Nde ka aafirisyili a esala o, ngu okala mu nsie, bwunu we mu mbwoho. Lo baakatsili nde ku mbala. Nyaã munde wu li a matswi mu ogyughu, agyughu!»

15

Endoomo ki édzimini emonono

(Mat 18.12-14)

¹ Etsughu etsyini, mintolo-mpagha ya banga-a-masumu bá kayabehene bo bwohonono kundaa Yiisu mu ogyughu nde.

² Ba-Faridzyē ya baluo-mikyene bá kanununu ya bá kalyele ndiri: «Mbwuru wu li mu okagyagha banga-a-masumu ya li mu okadza ya bo.»

³ Lo Yiisu áti bo nkumu yi:

⁴ «Nande ŋa kara li be kala ti nde li a bindoomo nkama (100), ya kala ti etsyini edzimini, nde ka abulusihi makwumu-wa ya wa (99) bibike ku syehe mu oyisagha emō ekye ki eedzimini tee ŋa aayimono nde kye o?

⁵ Kala ti nde mono kye, nde sa akala a esee, sa atwulu kye ŋa yulu a bisanama bi nde.

⁶ Ya bu ayabvughuru ku nzo, nde sa ata bandughu ba nde mbili ya ba bali bitaa-taa bibye, ya sa alyele kundaa bo ti: “Ligya likala mu esee ya me, mu kuulu me aamono endoomo e me ki ali eedzimini.”

⁷ Me ndyele be ti mu mayulu si bumō, kala mbwuru yini a mumō gyinji mayele, sa bamono esee ki eluru ki baakamono mu baara makwumu-wa ya wa (99) ba bali bunsumu ba bagwene a nzala a ogyinji mayele.»

Nzi yi aadzimini yimonono

⁸ «Bwunu we, kala ti mukaha li a mipara mimi bisyeē kwumu, ya mupara mutsyini dzimini*,

* **15:8 15.8** mu matala mamo, mupara mutsyini mu nde áli nzi yi bá kafiri mbwuru mu etsughu etsyini kii esala

lo nde ka anahaba mwindi, ka akwomo nzo ya okabulusagha nde ya bunkere tee ɲa aamono nde mupara mu nde o?

⁹ Ɗa aamono nde mupara, sa ata bandughu ba nde mbili ya ba bali bitaa-taa bibye, ya olyele bo ndiri: “Liyakala mu esee ya me, mu kuulu me aamono mupara a me wu ali aadzimini.”

¹⁰ Bumō si, me ndi mu olyele be, bangye-yulu ba Nzaami baakamono esee mu yini a nga-a-masumu mutsyini wu gyinji mayele.»

Mwana wu áadzinimi moɲono

¹¹ Yiisu áfirilyele bu: «Baghala mutsyini áli a baana buolo ba babaghala.

¹² Mbwee ályele kundaa taara a nde ti: “Taara, gwa me kaba lili busini lili ndaa me”. Mu obo taara ákaba bo busini bu nde.

¹³ Mana bitsughu bu biluru, mwana wu baghala wu a sala átolo byehene bi áli a bye ya ágyene ku nsie yi a la. Oko nde ábyihi busini bu nde mu laama lili bisee.

¹⁴ Bu agyehe nzi a nde yohono, nde ásyili myaã-a-myaã. Ewala ki enene égyi mu nsie oyo, ya nde ábaana okpa nzala.

¹⁵ Mu obo, nde áyisagha esala kundaa musu nsie oyo mutsyini. Nde ágweghe nde ku ebiri mu okabulukebe bangubulu.

¹⁶ Mu nkooro a nzala, nde ádzyi ogyughuru mu bi-odza bi bangubulu, lo ka óli a mbwuru wu aagwa nde bye o.

¹⁷ Mu obo, nde ábaana otsimi ya obili bu: “Basala ba taara a me bwohono baakadza bu badzyi, lo me ɲa ndi mu okakpa nzala.

¹⁸ Me sa ntemene, sa ngye kundaa taara a me, ya sa ndyele nde bu: Taara, me aansii masumu kundaa Nzaami ya kundaa we.

¹⁹ Ka bafaana ofirita me mwana a we o, gwolo me ti mumõ ña kara li basala ba we.”

²⁰ Nde átemene ya ágyene kundaa taara a nde.»

«Naala nde nkini la, taara a nde, átaala nde, nyiñ yíbagha nde. Ábara ntyini, áyibwumu nde ya ányuburu nde.

²¹ Mwana ályele kundaa nde ti: “Taara a me, me aansii masumu kundaa Nzaami ya kundaa we, ka bafaana ofirita me mwana a we o”.

²² Lo taara ályele kundaa basala ba nde ti: “Lisa maswa, liyabiri me enkuru ki eluru bubwe ya lilaha nde kye. Lilaha nde mulwu mu mulyeme, ya bikoghoru mu myili.

²³ Ligya a pulu li ngoomo lili maala, lidzwa lo. Litswe lidza ya likala kunsá esee.

²⁴ Mu kuulu mwana a me wu áli ákpi, lo aasighili mu lipfu, áli ádzimini, lo aafirimoñono”. Ya bábaana osa kyiri.»

²⁵ «Mu matala mamó, mwana wu mukwuru áli munsá nseghe. Nde bu ayabvughuru, áyabehene ya nzo, ya nde ágyughu nkele a bikwumu ya makini.

²⁶ Nde áti musala mutsyini mbili ya áfwulu ndiri: “Nki ndagha yili mu okaluru mu nzo?”

²⁷ Musala munde ábvuhulu nde bu: “Mbwee a we aayabvughuru, ya taara a we aatumu badzwa pulu li ngoomo lili maala bu aamono nde ti nde aagyi bunsiiili”.

²⁸ Nde ákolo nkehe ya ábihi osomo mu nzo. Taara a nde ápala mu obuono nde asomo mu nzo.

²⁹ Lo nde ábvuhulu kundaa taara a nde bu: “Mono, bamvulu balagha me ndi mu okasalala we. Me nkini ámaambihi osa litumu li we o. Lo we nkini ámaagwa me si mwana a ntaba mu osa kyiri ya bandughu ba me o.

³⁰ Lo mu matala ma oyabvughuru mwana a we wu wu aamana busini bu we bwohonono mu okabulutaama ya bakaha banga-a-enkwunu, we aatumu badzwa pulu li ngoomo lili maala mu nkooro a nde!”

³¹ Taara ályele kundaa nde ti: “Mwana a me, we li ya me matala mwohonono. Bilogho bi me byehene bili bibi ndaa we.

³² Ali lifaana okala kunsa kyiri ya esee, mu kuulu mbwee a we áli ákpi, ya aasighili mu lipfu, nde áli ádzimini, ya aafirimoŋono.”»

16

Musala wu aakakebe ya aakasalala bilogho bi mfumu a nde wu mayele

¹ Yiisu ályele si kundaa binduono bi nde ti: «Óli a esini etsyini ki éli a musala wu aakakebe ya aakasalala bilogho bi mfumu a nde. Báyalyle nde ti musala a nde ákabyihi busini bu nde.

² Mu obo, Mfumu áti nde mbili ya ályele kundaa nde ti: “Mamo nki mandagha me ndi mu okagyughu mu nyuru a we? Suo me bu aasi we esala e we, mu kuulu we ka kughu ofirikala musala wu aakakebe ya aakasalala bilogho bi me o.”

³ Musala munde átsimi mu mukolo a nde ndiri: “Bunu-abo me aansa, buulu mfumu a me me aamaha mu esala? Me ka ndi a makpa mu

osala esala kii manseghe o. Ya okabululuomo nzi kundaa baara, me sa mono budzwa!

⁴ Aa! Me ngyahaba emakye me aansa, mu kuulu baara bagyagha me mu manzo ma bo mu matala ma baamaha me mu esala.”

⁵ Mu obo, bu ati mbwuru-mbwuru mbili mu ba báli a ebyimi ya mfumu a nde, nde áfwulu wu a nsomo bu: “Ebyimi kii kpe we li a kye ya mfumu a me?”

⁶ Mbwuru munde ábvuhulu nde ti: “Batono nkama (100) baba maala”. Musala ályele nde ndiri: “Ma mukaana a we wu a ebyimi, bwa nsini mu maswa ya sono: Batono makwumu mataana (50).”

⁷ Na mbihi onjo, nde ályele kundaa wu muke ndiri: “Lo we, ebyimi kii kpe we li a kye”? Nde ábvuhulu nde bu: “Me ebyimi kii basaake nkama (100) baba bimburu bi bele”. Musala ályele kundaa nde ti: “Ma mukaana a we wu a ebyimi ya sono bu: basaake makwumu mpuomo (80)”.

⁸ Mfumu ásyighi musala munde wu mubi mu nkooro a mayele ma nde. Mu enganma basi nsie baluru mayele mu mandagha ma bo ya ba bali kunsá otsyeme.»

⁹ Ya me bu ndyele kundaa be: «Nzi yiikapfiri baara balagha, lo be lisalala yo mu kuulu likala a bandughu. Mpaala mu matala ma oofa nzi oyo, sa bagyagha be mu manzo mu bamvulu ya bamvulu.

¹⁰ Mbwuru wu aakagyughu mfumu a nde mu mandagha ma masala, aakagyughu nde si mu mandagha ma manene, wu aagwene ok-agyughu nde mu mandagha ma masala, ka akala

aagyughu nde si mu mandagha ma manene o.

¹¹ Mu obo kala ti be ka lili a yughu o mu busini baba gwene a bunsumu, nande aasa kana mu be mu busini baba enganma?

¹² Ya kala ti be ka lili a yughu mu bilogho bi mbwuru mukimi o, nande aagwa be bibi ndaa beme?

¹³ Ka oli a musala wu kughu osalala bamfumu buolo o. Kala pele, nde sa abele mutsyini ya sa adzyi wu muke, bwunu we sa anabara mu mumō ya sa abele wu muke. Be ka lifaana osalala Nzaami ya nzi o.»

Mandagha ma Yiisu

¹⁴ Ba-Faridzyē ba baakadzyi nzi, bu bagyughu myehene mimye, bo bákasa Yiisu munsensehē.

¹⁵ Yiisu ályele kundaa bo ndiri: «Be lili mu okasa mandagha mpaala limonono ti be lili bunsumu ŋa mihi mi baara, lo Nzaami gyahaba mikolo mi be, mu kuulu mandagha ma ooka-mono baara ti mali ma manene, mali mandagha ma maluru bubi ŋa mihi mi Nzaami.»

¹⁶ «Mikyene ya mibighili míkala tee mu matala mama Dzã. Obaana oŋo, bali mu otsala Nsia yi Mbwe yi a Emfumu e Nzaami, ya nswe mbwuru li mu osa makpa mu osomo mu Emfumu ekye.

¹⁷ Yulu ya nsie bikughu oluru, lo ŋa kara li Mikyene, si mpiri nsyini ka yimara o.»

¹⁸ «Nswe baghala wu dzwi bala ya mukala a nde ya kie mukaha mukimi, nde si bukala, ya nswe baghala wu kie mukaha wu aadzwi bala ya mulumu a nde, si bukala.»

Esini ya Ladzare

19 «Áli oli a baghala mutsyini wu esini. Nde ákalaha biko bi bibwe ya bibi ntala. Nswe etsughu nde ákasa malagha.

20 Óli si ya muwele mutsyini wuulu áli ágyonjomo ña munjma a ekagha e nzo a esini, nkwumu a nde áli Ldzare, ya nyuru a nde áli yílwulu mu biboõ.

21 Ya nde ákadzyi otolo yini a mpfi-mpfihini a bi-odza yi áakabwa ku nsie a tabele li esini ekye. Ya bambwa si bá kayalyere biboõ bi nde.

22 Muwele ákpi ya bangye-yulu bá biri nde kunda Abarahame. Esini si ékpi ya bá dzyighi kye.

23 Ya ku nsie a ba bá kpi, nde ákamono kimini li lilagha. Bu asiili mihi, átaala Abarahame ku la, ya Ldzare ña nkara a nde.

24 Nde ákehe engubu ndiri: “Abarahame, taara me, mono me nyí, ya gweghe Ldzare atsubu mbunu a mulyele a nde mu madza ya abwoho me nzalisogho, mu kuulu me ndi mu okamono kimini lilagha munsá mbáa yi.”

25 Abarahame ábvuhulu nde ti: “Mwana a me, libili mweé ti we áali a busini bulagha mu bumweé bu we, ya Ldzare áli kunsá kimini. Mu matala ma, báli mu obuono nde kunu, lo we li mu omono kimini.

26 Gyahaba ti, mu matala ma oli ya mbie yi nene ña kara li bihi-a-be. Mpaala baara ba badzyi omara kunu mu ogya kunda be ka baleene o, ya ba báli kunda be ka baleene si osaghaba yo mu ogya kunu o.”

27 Esini élyele ndiri: “Taara, me mbuono we, gweghe Ldzare agye ku nzo a taara a me,

²⁸ mu kuulu me ndi a bambwee bataana. Nde agye ayilyele bo mpaala bo si banyaã ogya ku ebini kii kimini ki.”

²⁹ Abarahame ábvuhulu nde bu: “Bo bali a Moyidze ya mibighili. Bafaana ogyughu bo!”

³⁰ Ya esini ébvuhulu nde ndiri: “Pele, taara Abarahame. Kala ti mbwuru wu ákpi gyene kundaa bo, bo sa bagyiŋi mayele.”

³¹ Lo Abarahame ábvuhulu kundaa nde bu: “Kala ti bo ka bagyughu Moyidze ya mibighili o, si okala ti mbwuru wu ákpi sighili mu lipfu, bo akala ka bagyughu nde si o.”»

17

Obwa mu lisumu

¹ Yiisu ályele kundaa binduono bi nde ti: «Mandagha ma maakasa ti baara babwa mu lisumu ka makughu ogwene o. Lo nyiĩ kundaa munde wu aakala mpeene yi maagya mo!

² Ali oluru bubwe kundaa nde bakwighi nde limeẽ li linene mu bolo ya batsili nde mu mubu, ya bu abwihi mu lisumu mumõ ŋa kara li bike-bike bi.

³ Be beme lisa mayele. Kala ndughu mu kana bwi mu lisumu, fyeẽ nde. Kala ti nde gyinji mayele, sa nde kolokolo.

⁴ Ya kala ti nde si we bubi nsa nsaama mu etsughu, ya kala ti mu nsa nsaama oyo nde gyi mu olyele we ti: “Me aanyoõ bu aansì we bubi”, sa nde kolokolo.»

Kana

⁵ Bantum mu bályele kundaa Yiisu ti: «Mfumu gwa bihi kana lili ngo lo.»

⁶ Mu obo Mfumu ályele kundaa bo ndiri: «Kala ti be lili a kana ti liburu li mutaade, be likughu olyele kundaa muti wu a sikomore ti: “Tunjumu ya midza mi we ya gye yibwa mu mubu!” Ya nde sa agyughu be.»

Mandagha ma ofaana osa musala

⁷ «Nande ŋa kara li be kughu olyele kundaa musala a nde wu aakasala mu manseghe ma nde, bwunu we wu aakakebe mikaã mi nde, ŋa aafa nde ku manseghe bu: “Gya maswa-maswa, bwa nsini, ya dza?”

⁸ Pele! Lo nde bu aalyele kundaa nde: “Nana me bi-odza, laha biko bibi esala ya gwa me bi-odza. Me mana odza ya oŋma, ŋa mbihi oŋo we kughu odza ya oŋma.”

⁹ Lo liimaamono ti mfumu bvurulu matuono kundaa musala a nde mu kuulu aakagyighili mi aakatumu nde?

¹⁰ Behe si bumõ, ŋa liimana osa myehene mi baatumu be osa, lilyele bu: “Bihi lili basala ba bagwene a mupfunu, bihi liigyighili yini a mamoma lifaana ogyighili.”»

Yiisu dzuhu banga-a-buala kwumu

¹¹ Naala Yiisu mu okagye ku Yerusaleme, nde áluru mu milili mi etsulu e nsie kii Samari ya kii Ngalile.

¹² Na ákasomo nde munsa bula butsyini, banga-a-buala kwumu báýabwana a nde. Bátemene la-la

¹³ ya bákehe engubu: «Yiisu, Muluo, mono bihi nyĩ!»

¹⁴ Bu amono bo, nde ályele kundaa bo ti: «Ligye liyisuo manyuru kundaa bangaa ba nzaami.»

Na báli bo nkini mu okagye, bo bámono ti bo baadzughu.

¹⁵ Mumõ na kara li bo bu amono ti nde aadzughu, áyabvughuru ya ákasyighi Nzaami mu yulu.

¹⁶ Nde ápfumunu busu mu nsie na myili mi Yiisu ya ábvurulu nde matuono. Baghala munde áli musi Samari.

¹⁷ Yiisu áfwulu ti: «Bunu, bo bansa kwumu ka baadzughu o? Bu wa babake kunu bali?»

¹⁸ Yini a munzyi wu aayabvughuru mu ogwa Nzaami masyighi?»

¹⁹ Na mbihi oño Yiisu ályele kundaa nde ti: «Temene, gye, kana li we liibvwuhu we!»

Ogya ku Emfumu e Nzaami

²⁰ Ba-Faridzyẽ báfwulu nde ti nsa matala Emfumu e Nzaami eegya, nde ábvuhulu kundaa bo ti: «Emfumu e Nzaami ka eegyi ti anga elogho ki bakughu omono mu mihi o.

²¹ Banyaã olyele be ti: “Limono, na eli”, bwunu we: “Eli kunii!” Limono, Emfumu e Nzaami eli na nsa kara li be.»

²² Na mbihi oño, Yiisu ályele kundaa binduono bi nde ti: «Bitsughu sa bigya, bi likala a be nzala a omono Mwana a mbwuru, ti mu etsughu etsyini, lo akala ka liimono nde o.

²³ Sa akala balyele kundaa be ti: “Nde na ali”, bwunu we: “Kunii ali”. Ka ligye o, ya ka libara ntyini o.

²⁴ Mu kuulu, ti bu ookasehene mvulu ya bu aakatsehebe nde yulu nkolo ya nkolo, me obo si bu ookala Mwana a mbwuru mu etsughu e nde.

²⁵ Lo nde faana otswama omono mpara yi alagha, ya baara ba eseene ki sa babihi nde.

²⁶ Mi míluru mu matala mama Nowe sa miluru mu etsughu ki oogya Mwana a mbwuru.

²⁷ Baara bákadza, bákaŋma, bákakie ya bákakwehe tee mu etsughu ki ósomo Nowe munsa bwara ba bunene. Ndwuru yígyi mu nsie nsyini, ya baara bwohonon báfí ekulu.

²⁸ Bumõ si mu matala mama Lote. Baara bákadza, bákaŋma, bákaswumu ya bákatyeghe, bákakunu ya bákawuhu manzo.

²⁹ Lo etsughu ki ópala Lote munsa bvulu lili Sodome, Nzaami ánohõ mvulu wu a mbaa ya wu makele ma maakalughulu mbaa, wu áayadzwa baara bwohonon.

³⁰ Sa okala bumõ mu etsughu ki oyamononon Mwana a mbwuru.»

³¹ «Mu etsughu ekye, mbwuru wu li ku yulu a see li nzo lili eyala, asughuru, anyaa osomo munsa nzo mu ogwolo bilogho. Wu aakala ku manseghe, anyaa si obvughuru ku bula.

³² Litsimi mi míbwi mu mukala a Lote.

³³ Munde wu aasagha obvwuhu laama li nde sa apfihili lo. Munde wu aakihi okpa, sa akala mweẽ.

³⁴ Me bu ndyele kundaa be: mu mpyibi oyo, mu baara buolo ba baakala ku yulu a mbughu mõ, sa babiri mutsyini ya sa basihi wu muke.

³⁵ Mu bakaha buolo ba bali mu okasighi bimburu, sa bagwolo mutsyini ya sa basihi wu muke.

³⁶ [Mu babaghala buolo ba baakala munsa nseghe, sa bagwolo mutsyini ya sa basihi wu

muke.»]*

³⁷ Binduono bíbvuhulu nde ti: «Mfumu, mandagha mamu kunu-ako akala maaluru?» Yiiisu ágwi bo mvuru yi: «Ku ookala ebyimi, me oko ku oyabvununu bango-mbimi.»

18

Nkumu yi a mupfili ya nsughu-a-lamana wu mubi

¹ Yiiisu áti bo nkumu nsyini mu osuo bo ti bafaana okasamana Nzaami matala mwohono ku ogwene okolo.

² Mu obo, nde ályele kundaa bo ti: «Óli a nsughu-a-lamana mutsyini mu bvulu litsyini. Nde ka ákabara Nzaami o, ya ka ákagwa si mbwuru mutsyini budziri o.

³ Óli si a mupfili mutsyini wu mukaha oko, wu áakalyele kundaa nde ti: “Tsyiri ndagha yi li ña kara li me ya mutaara a me.”

⁴ Matala malagha nsughu-a-lamana munde ábihi. Lo ña mbihi oño, nde ábili bu mu mukolo a nde: “Si okala ti me ka aakambara Nzaami o, bwunu we me ka aakangwa mbwuru si mumõ budziri o,

⁵ lo me ndagha a mupfili wu aantseyiri, mu kuulu nde ka li mu okanyaã me pii o. Kala pele, nde sa akayaluhu me nkele bitsughu byehene.”»

⁶ Mfumu áfirilyele bu: «Be liigyughu mbiili a nsughu-a-lamana munde wu mubi.

⁷ Lo Nzaami ka kughu otsyiri mandagha ma babo ba ásuolo nde o, ba bali mu okasyama

* **17:36 17:36** Mikaana mi mike mimi nsomo-a-nsomo ka mili ya etsulu ki o.

kundaa nde mpyibi ya mwiĩ? Ya nde ka asa maswa mu obaha bo o?

⁸ Me bu ndyele be, Nzaami sa atsyiri mandagha ma bo maswa-maswa. Lo ŋa oogya Mwana a mbwuru, nde sa ayamono kana ŋa yulu a nsie?»

Nkumu yi a mu-Faridzyē ya muntolo-mpagha

⁹ Yiisu áfirita bo nkumu yi mu ogwa maluo kundaa baara ba baakatsimi ti bo bali kunsa bunsumu ya ba baakatsaala babake.

¹⁰ «Babaghala buolo bákumu ku nzo a Nzaami yi nene mu osamana. Mumō áli mu-Faridzyē, ya wu muke áli muntolo-mpagha.

¹¹ Mu-Faridzyē átemene ya ásamana kunsa mukolo bu: “Nzaami, me mbvurulu we matuono mu kuulu me ka ndi ti baara babake o. Bo bali banga-a-pfyibi, ba bagwene a bunsumu, ba baak-abvughu mbughu ya mukala bwunu we mulumu a nganda-mbwuru, ti anga muntolo-mpagha wu.

¹² Me aankankuru nswele nsa ywolo mu limiŋi, me aakangwa kaba lili kwumu mu byehene bi aakambagha me.”

¹³ Muntolo-mpagha áli átemene la, ya ka ábagha si bu aasiili mihi ku yulu o. Nde ákakoboro ntulu ya ákalyele ti: “Nzaami mono me nyiĩ, me ndi nga-a-masumu!”

¹⁴ Me ndyele be, muntolo-mpagha munde ábvughuru ku nzo a nde ya Nzaami ákirili nde mbwuru wu bunsumu, lo ka mu-Faridzyē wu o, mu kuulu munde wu aaseŋene mu endeme, sa basurulu nde linsie, ya munde wu li linsie, sa baseene nde.»

*Yiisu gyagha baana ba basala
(Mat 19.13-15; Mar 10.13-16)*

¹⁵ Baara bágyi a baana ba basala kundaa Yiisu mu kuulu nde abyeme bo. Lo binduono bi nde bu bimonono obo, bífyee baara babo.

¹⁶ Mu obo, Yiisu áti baana mbili ya ályele ti: «Linyaã baana ba basala bagya kundaa me, ya ka likahaba bo o, mu kuulu Emfumu e Nzaami eli kii ba bafaana ya bo.

¹⁷ Me ndyele be mu enganma, nswe munde wu gwene okihi Emfumu e Nzaami ti mwana wu asala, ka asomo omo o.»

Baghala wu Esini

(Mat 19.16-30; Mar 10.17-31)

¹⁸ Mfumu a ba-Dzwife mutsyini áfwulu Yiisu ti: «Muluo wu mubwe, emakye me mfaana osa mu obagha laama lili mibvu ya mibvu?»

¹⁹ Yiisu ályele kundaa nde ti: «Mu emakye we li mu olyele ti me mbwuru wu mubwe? Ka oli a mbwuru wu mubwe o, kala ka yini a Nzaami o.

²⁰ We gyahaba mikyene: *Ka bvughu mbughu ya mukala bwunu we ya mulumu a nganda-mbwuru o, ka dzwa o, ka turu o, ka kala mpughulu wu a mpya mu nganda-mbwuru o, gwa taara ya ngughu a we budziri.»*

²¹ Mbwuru munde ábvuhulu bu: «Obaana bumwana bu me, me aankebe myehene mimye.»

²² Bu amana ogyughu nde, Yiisu ályele kundaa nde ti: «Elogho etsyini we gwene a kye: Tyeghe byehene bi li a bye, kaba nzi kundaa bawele, ya we sa kala a busini mu mayulu. Na mbihi onjo, gya, ya nama me.»

²³ Lo bu agyughu obo, mbwuru munde ányoõ ku olagha, mu kuulu nde áli a busini bulagha.

²⁴ Yiisu bu amono minyoõ mi nde, ályele ti: «Mpara kundaa bisini mu osomo mu Emfumu e Nzaami!

²⁵ Mu kuulu, ka oli mpara o kundaa nyama wu baakata ti syamo mu osomo mu lihi li ntuumu, lo mpara kundaa esini mu osomo mu Emfumu e Nzaami.»

²⁶ Baara ba bákagyughu mandagha mamó bályele ti: «Mu obo, nande kughu obvwughu?»

²⁷ Yiisu ábvuhulu bu: «Miili baara ka bakughu osa o, Nzaami kughu osa mye.»

²⁸ Piere ályele ti: «Tala, bihi liisihi bilogho bi liili a bye ya liinama we.»

²⁹ Mu obo Yiisu ágwi bo mvuru yi: «Me ndi mu olyele be nganma, nswe munde wu sihi nzo, mukala, banaana ya bambwee, taara ya ngughu, bwunu we baana ba nde, mu nkooro a Empu e Nzaami,

³⁰ nde sa abagha mi miluru mu matala ma, ya laama lili mibvu ya mibvu mu bitsughu bi biigya.»

Yiisu firilyele sa li litere ndagha yitala okpa ya osighili o nde mu lipfu

(Mat 20.17-19; Mar 10.32-34)

³¹ Yiisu bu akogho ña bele a nde bantumu ba nde kwumu a buolo (12), nde ályele kundaa bo ti: «Mono! Bihi-a-be ku yulu a Yerusaleme lili mu ogye. Oko myehene mi ósono mibighili mu Mwana a mbwuru sa mikeele.

³² Sa batyeghe nde ña myaã mi baara ba bagwene osoolo Nzaami, sa basa nde munsighi, sa batsaala nde, sa batswulu nde manteẽ,

³³ ya bu bamana okaha nde nswa-nswa, sa badzwa nde. Ya etsughu kii bitere, nde sa asighili mu lipfu.»

³⁴ Lo bantumu ba nde ka bábaghala ndagha si mō o. Bo báli kunsá nzi-nzimini. Ka bákagyahaba o bunu-a-bo mandagha mamó mákadzyi olyele.

Yiisu dzuhu enkpa-mihi
(Mat 20.29-34; Mar 10.46-52)

³⁵ Mu matala ma óyabehene Yiisu ŋa bvulu lili Dzeriko, enkpa-mihi etsyini ébwi nsini mu mukogho a nzili mu okaluomo baara nzi.

³⁶ Bu agyughu mpwumu a baara yi áakaluru, nde áfwulu nki ndagha áakaluru.

³⁷ Bályele nde ti: «Yiisu musi Nadzarete li mu okaluru.»

³⁸ Mu obo, nde ákehe engubu mu yulu ti: «Yiisu, Mwana a Dabvide, mono me nyii!»

³⁹ Ba báli ku nkulu báfyeẽ nde ya bályele nde akuru muŋma, lo nde ákehe bingubu bi biluru: «Mwana a Dabvide, mono me nyii!»

⁴⁰ Yiisu bu atemene, átu mu bagya a nde kundaa nde. Nde bu ayabehene, Yiisu áfwulu nde ti:

⁴¹ «Emakye we dzyi me nsa mu we?» Nde ábvuhulu bu: «Mfumu, sa kuulu me firimono!»

⁴² Mu obo, Yiisu ályele kundaa nde ti: «Firimono o we! Kana li we liibvwuhu we!»

⁴³ Mu ena kyini ekye, nde ábaana omono, ya ábwi onama Yiisu mu okabulusyighi Nzaami. Baara bwohonó bu bamono obo, básyighi Nzaami.

19

Yiisu ya Dzasye

¹ Yiisu ásomo mu Dzeriko ya áluru kunsá bvulu lilo.

² Mbwuru mutsyini áli oko, nkwumu a nde Dzasye. Nde áli mfumu a mintolo-mpagha ya áli esini.

³ Nde ákasagha omono Yiisu, lo nde ka ákughu o, mu kuulu nde áli mutele mupfi, ya mpwumu a baara yíkyi Yiisu.

⁴ Mu obo, nde ábara ku nkulu ya ákumu ku yulu a muti wu a sikomore mu omono Yiisu, mu kuulu oyo nzili yi ákaluru nde.

⁵ Yiisu bu ayato ña ebini ekye, ásiili mihi ku yulu, ya ályele kundaa nde ti: «Dzasye, suguru mu maswa, mu kuulu me mfaana ogyoñomo mu nzo a we lolo li.»

⁶ Dzasye ási maswa ásuguru, ya ágyagha nde ya esee.

⁷ Mu obo, baara bwohono ba bámono mandagha mamó bakanjunu ya bákalyele ti: «Nde aayigyoñomo kundaa nga-a-masumu.»

⁸ Lo Dzasye bu atemene ña nkulu a Mfumu, ályele nde ndiri: «Mfumu, tala: me nkaba bilogho bi me ña kara-a-kara mu ogwa ndaama kundaa bawele. Ya kala ti me aampfiri mbwuru mu ogwolo nzi yiluru kundaa nde, me sa mbvurulu nde yo nsa na.»

⁹ Ña mbihi oño, Yiisu ályele bu: «Lolo li baara ba baakakala mu nzo yi baabvwughu, mu kuulu wuhu si li musi dzumu lili Abarahame.

¹⁰ Mu kuulu Mwana a mbwuru aagyi mu os-
agha ya obvwuhu baara ba bádzimini.»

Nkumu yi a nzi
(Mat 25.14-30)

¹¹ Yiisu áfirita baara ba bákagyughu nde nkumu nkimi, mu buulu nde áto ña bele a Yerusaleme, ya baara bákatsimi ti Emfumu e Nzaami mu matala mamó ékaamonono.

¹² Mu obo Yiisu ályele kundaa bo ti: «Mbwuru mutsyini wu budziri ágyene ku nsie yi a la mu oyibyalá emfumu kii mukogho ya áyabvughuru.

¹³ Nsomo agye, nde áti basala kwumu mbili ña kara a basala ba nde. Nde ágwi ña kara a nswe musala mupara mutsyini wu a mu oore, ya ályele bo ti: “Lita nkaala mu nzi yi tee ku aayambvughuru me.”

¹⁴ Lo baara baba nsie a nde bákabele nde. Mu obo, bágweghe baara ña mbihi a nde mu oyilyele ku ákagye nde bu: “Bihi ka lidzyi ti nde akala mukogho a bihi o.”

¹⁵ Bu amana obyalá emfumu, nde áyabvughuru. Nde áti basala ba ágwi nde nzi mbili mu ogyahaba ndaana yi bábagha bo mu nkaala.

¹⁶ Wu a nsomo ágyi ya ályele ti: “Mfumu! Mupara a we aaburu mipara kwumu.”

¹⁷ Mfumu ályele nde ti: “Bubwe, we li musala wu mubwe. Mu kuulu we aasi waa li me mu bilogho bi bisala, me ntwulu we mfumu a mabvulu kwumu.”

¹⁸ Wu a buolo ágyi ya ályele ti: “Mfumu, mupara a we aaburu mipara mitaana.”

¹⁹ Mfumu ályele nde ndiri: “Me ntwulu wehe si mfumu a mabvulu mataana.”

²⁰ Mukimi ágyi ya ályele ti: “Mfumu, mupara a we ndindi. Me ali aandwunu nde kunsá mupa a

eko.

²¹ Me aakankala a nzalamweẽ a we, mu kuulu we li mbwuru wu a mukolo wu a kubu. We aakagwolo bilogho bi aagwene okamono we mpara, ya we aakatolo bimburu bi aagwene okakunu we.”

²² Mukogho ályele nde ti: “We li musala wu mubi! Me muyala a we aansa mu mandagha ma paha weme. We gyahaba ti me ndi a mukolo wu a kubu, me aakangwolo bilogho bi aangwene okamono me mpara, ya aakantolo bimburu bi aangwene okakunu me.

²³ Mu emakye we aagwene oyitwulu mupara a me kundaa ba baakabunu nzi? Bu ayambvughuru me bu, me ali aankughu obagha ndaana mu nde.”

²⁴ Na mbihi onjo nde ályele kundaa ba báli onjo ti: “Ligwohono nde mupara munde ya ligwa nde kundaa wu li a mipara kwumu.”

²⁵ Bo bályele nde ti: “Mfumu, ta nde li a mipara kwumu mimi oore!”

²⁶ Nde ábvuhulu bo ti: “Me ndyele be, sa babwehe kundaa munde wu li a bye, lo wu gwene a bye, sa bagwohono si okala mana a ndaama yi ali a nde.

²⁷ Na yulu onjo, liyabiri mitaara mi me na, mi miibihi ti me nkala mukogho a mye, ya lidzwa mye na mihi mi me.”»

²⁸ Bu amana obili obo, Yiiisu átswama na nkulu a mpwumu a baara mu okumu ku Yerusaleme.

*Osomo o Yiiisu ku Yerusaleme
(Mat 21.1-9; Mar 11.1-10; Dzã 12.12-16)*

²⁹ Mu matala ma ábehene a nde na bula baba Betefadze ya bvulu lili Betani, na bele a Munguo

wu a mi-Olibve, Yiisu ágweghe binduono bi nde byele

³⁰ ya ályele bye ti: «Ligye ku bula ba buli ku nkulu. Na liisomo be oko, sa limono mwana a aane bákuru na muti, ya wuulu si mbwuru mutsyini nkini ámaabwa nsini na yulu a nde o. Linyana nde ya ligya a nde.

³¹ Kala mbwuru fwulu be ti: “Mu emakye be lili mu onyana nde?” Lilyele nde bu: “Mfumu li a nzala a nde.”»

³² Binduono bibye bígyene ya bímono mandagha mwohono ti bu ólyele Yiisu.

³³ Na bákanyana bo mwana a aane, banga-a-nde báfwulu bo mu emakye bo bákanyana mwana a aane munde.

³⁴ Bo bábvuhulu bo ti Mfumu li a nzala a nde.

³⁵ Na mbihi onjo bágyene a mwana a aane kundaa Yiisu. Bágyala biko bi bo na yulu a nde ya bákuhubu Yiisu na yulu a nde.

³⁶ Na ókagye Yiisu, baara bákagyalala biko bi bo mu nzili.

³⁷ Na áli nde na bele Yerusaleme mu okumunu Munguo wu a mi-Olibve, mpwumu a binduono bi nde yísomo kunsá esee ya yíbaana osyighi Nzaami mu yulu mu nkooro a bimaã bi bámono bo.

³⁸ Bo bu bákalyele:

«Liseme kundaa Mukogho, munde wu li mu ogya mu nkhwumu a Mfumu!

Edzuunu ekala ku yulu,
ya nsia yíkala kundaa Nzaami!»

³⁹ Ndaama a ba-Faridzyě yi áli na kara li mpwumu a baara yílyele Yiisu ndiri: «Muluo, tumu binduono bi we binyaã nkele.»

⁴⁰ Nde ágwi bo mvuru yi: «Me ndi mu olyele be, kala bye binyaã nkele, mameẽ sa makehe bingubu!»

Yiisu lili mu nkooro a Yerusaleme

⁴¹ Na óto Yiisu na bele a Yerusaleme, nde álili mu nkooro a bvulu lilo, na ámono nde lo.

⁴² Nde ályele ti: «Yerusaleme, kala wehe si, we aabaghala mandagha ma makughu ogwa we edzuunu mu matala ma! Lo mu matala ma, mo mali ma másweme na mihi mi we.

⁴³ Bitsughu bili mu ogya, mitaara mi we sa mitsimi miwaghala mu odzwana a we. Mye sa midzinji we ya sa miswehẽ we nkolo ya nkolo.

⁴⁴ Sa mitsala we, ya sa midzwa baara ba we bwohonono. Mye ka misihi si limeẽ litsyini na yulu a limeẽ o, mu kuulu we ka aagyahaba matala ma oogya Nzaami kundaa we o.»

Yiisu mu nzo a Nzaami yi nene

(Mat 21.12-17; Mar 11.15-17; Dzã 2.13-17)

⁴⁵ Yiisu ásomo mu Nzo a nzaami yi nene ya ábaana obyí ba bákata nkaala omõ.

⁴⁶ Nde ákalyele bo bu: «Bisono bi Nzaami bili mu olyele bu:

“Nzo a me sa yikala nzo yi a lisamana”,
lo be liikirili yo ngala yi ookasweme mituru.»

⁴⁷ Nde ákaluo mu Nzo a nzaami yi nene bit-sughu byehene. Bakwuru ba bangaa ba nza-ami, baluo-mikyene ya bakwuru ba ba-Dzwife bákasagha mayele ma odzwa nde.

⁴⁸ Lo ka bágyahaba bu baasa o, mu kuulu baara bwohonono bakagyighili ogyughu nde.

20

Nande aagwi Yiisu muswa wu osa myehene mi akasa nde

(Mat 21.23-27; Mar 11.27-33)

¹ Etsughu etsyini, Yiisu ákaluo baara mu nzo a Nzaami yi nene, ya ákatsala Nsia yi Mbwe. Bakwuru ba bangaa ba nzaami, baluo-mikyene, ya bakulu bágyi.

² Bo báfwulu nde ti: «Lyele ati bihi, we nki emfumu li a kye mu osa mandagha ma? Ya nande aagwi we muswa munde?»

³ Yiisu ágwi bo mvuru yi: «Mehe si be aangwa efwulu.

⁴ Lilyele me, oboghoru o Dzã kuu yulu bwunu we kuu baara?»

⁵ Lo bo bátsoho bo-a-bo bu: «Kala libvuhulu ti Nzaami aatumu nde, nde sa afwulu bihi-a-be mu emakye liibihi osa kana mu mandagha ma nde?

⁶ Ya kala lilyele ti kundaa baara, baara bwohono sa bakaha bihi-a-be mameë, mu kuulu bo bwohono bákihi ti Dzã mubighili áali.»

⁷ Mu obo, bágyi nde mvuru ti bo ka bagyahaba o.

⁸ Ya Yiisu ályele ti: «Mehe si ka andyele be o, mu nsa litumu me ndi mu okagyighili mandagha ma.»

Nkumu yi a basala ba babi

(Mat 21.33-46; Mar 12.1-12)

⁹ Na mbihi onjo, Yiisu áti baara nkumu yi: «Mbwuru mutsyini ákunu nseghe a bviini, ágyihini ya ba bákasala mu yo, ya ágyene ya ásihi nsie a nde, ási matala malagha oko.

¹⁰ Matala ma otolo bimburu bu máto, nde ágweghe musala mumõ kundaa ba bákasala mu

nseghe a bviini, mpaala bagwa kaba li bviini lili nde. Bo bágwini a nde mpaana, ya bábvurulu nde myaã a myaã.

¹¹ Nde áfirigweghe musala mukimi. Baara babo bágwini a nde mpaana, ya babvurulu nde myaã a myaã.

¹² Nde áfirigweghe wu batere, bádzwaha nde mabogho ya babyi nde.

¹³ Mu obo, mfumu a nseghe a bviini ábili bu: “Me bunu-a-bo aansa? Me mwana a me wu mukolo aangweghe, nkini-a-nki bo bagwi nde budziri.”

¹⁴ Lo baara babo bu bamono nde, bábili bu bo-a-bo: “Wu me mbwuru wu aayabyala pfa. Litswe lidzwa nde, mu kuulu pfa likala lili ndaa bihi bameme.”

¹⁵ Mu obo, bátsili nde ku mbala a nseghe a bviini ya bádzwi nde. Na mbihi oŋo, nga a nseghe a bviini ema aasa bo?

¹⁶ Nde sa agya, adzwa baara babo, ya sa agwa nseghe a bviini kundaa baara bakimi.»

Na ógyughu baara mandagha mamó, bo bályele ti: «Mandagha mamó ka makughu okala o!»

¹⁷ Lo bu atala bo, Yiisu ályele ti: «Limatsimi ati, Ndagha yi básono mu Mukaana a Nzaami yi bunu-a-bo yidzyi olyele?»

«*Limeẽ li ootsili ba baakatwu nzo, lo ayi lili lili ngughu na mutswunu a nzo*»,

¹⁸ «Nswe mbwuru wu aabwa na yulu a lo, sa abwogho, ya kala ti lo libwi na yulu a mbwuru, sa lipwene nde.»

¹⁹ Bakwuru ba bangaa ba nzaami ya baluo-mikyene básagha bu baasyimi Yiisu mu ena kyini

ekye, mu kuulu bo bábaghala ti nkumu oyo mu bo nde áti yo. Lo bo bábara nzalamweë a baara.

Mpagha a Sedzare

(Mat 22.15-22; Mar 12.13-17)

²⁰ Mu obo, bábaana ogyighili okatala Yiisu. Bo bágweghe bankere ba bákamonono ti bo bali baba bunsumu, mu kuulu bagyeele obwihi Yiisu mu mandagha ma ndeme. Ya na mbihi onjo, batyeghe nde na myaã mi mfumu a etsulu e nsie kii Yude.

²¹ Baara babo bághi nde efwulu ki: «Muluo, bihi ligyahaba ti we aakabili ya aakaluo ya bunsumu. We ka aakatala bifa bi baara o, lo we aakaluo nzili a Nzaami mu engama.

²² Lyele ati bihi: mikyene mi bihi-a-be miik-agwa bihi-a-be muswa wu ofiri mpagha kundaa Sedzare, bwunu we pele?»

²³ Lo Yiisu ábaghala mayele ma bo ma mabi ya ághi bo mvuru yi: «Lisuo me mupara mutsyini.

²⁴ Edzili ya bisono bi, bibi nande?» Bo bábvuhulu nde ti: «Bibi ndaa Sedzare.»

²⁵ Mu obo Yiisu ályele bo ti: «Libvurulu bibi Sedzare kundaa Sedzare, ya bibi Nzaami kundaa Nzaami.»

²⁶ Bo ka bákughu omono Yiisu epfwumu mu mandagha mamu na mihi mi baara o. Bo bákinjimi mu mvuru a Yiisu ya bákuru minja.

Efwulu mu mi mitala osighili o baara mu lipfu

(Mat 22.23-33; Mar 12.18-27)

²⁷ Ndaama a ba-Saduseyë, baara babo ba baakalyele ti osighili o baara mu lipfu ka oli o, báyabehene ya bághi Yiisu efwulu ki:

28 «Muluo, Moyidze ágwi bihi mukyene wu: *“Kala ti naana a mbwuru kpi, sihi mupfili gwene a mwana, mbwee a nde faana ogwolo mupfili munde, mu kuulu aburu naana a nde baana.”*

29 Óli a babaghala nsaama ɲa bula bumō, bo bwohono maama mumō, taara mumō. Wu a nsomo kie mukaha, nde yakpa, mwana we.

30 Wu a buolo kie mupfili, ya kpi si mwana we.

31 Wu batere si kie mupfili ya kpi. Bo bansa nsaama bumō si, bákpi ku ogwene oburu mwana.

32 ɲa mbihi a bo, mupfili si kpi.

33 Lo ɲa akala oosighili baara bwohono mu lipfu, nande aakala mulumu a nde, buulu bo bansa nsaama bákíe nde?»

34 Yiisu ágwi bo mvuru yi: «Basi nsie bali mu okie bakala ya balumu,

35 lo baara ba oomono Nzaami ti bakughu osighili mu lipfu, ya bagyagha nde mu bula bu bunyaghara, ka bakie bakala bwunu we balumu o.

36 Bo ka bafirikpa o, mu kuulu sa bakala ti banye-yulu, ya sa bakala baana ba Nzaami mu ku baasighili bo ɲa kara li ba bákpi.

37 Moyidze ágyighili osuo ti ba bákpi sa basighili mu lipfu. Mu emono kii eti-ti ki ékalughulu mbaa lo odzighi we, bályele ti: “Mfumu li Nzaami a Abarahame, Nzaami a Idzake ya Nzaami a Dzakobe.”

38 Nzaami ka li Nzaami a ba bákpi o, lo wu a baba mweë. Mu kuulu kundaa nde, baara bwohono bali baba mweë.»

39 Ndaama a baluo-mikyene bábvuhulu bu: «Muluo, we aabili ku obwe.»

⁴⁰ Mu obo, bo ka báfiribagha bukyini mu ogwa nde bifwulu o.

Ndagha yitala Kriste ya Dabvide

(Mat 22.41-46; Mar 12.35-37)

⁴¹ Yiisu ályele kundaa bo ti: «Bunu-abo bakughu olyele ti Kriste li mwana a Dabvide?

⁴² Dabvide ndeme ásono mu Mukaana wu Bikwumu ti:

“Mfumu aalyele kundaa Mfumu a me:

Bwa nsini ku kwogho-a-kwogho e me,

⁴³ *tee ña aansa me kuulu mitaara mi we mikala nkara a myili mi we.”»*

⁴⁴ «Kala ti Dabvide aakata nde Mfumu, lo bunu-a-bo nde akughu ofirikala mwana a Dabvide?»

Yiisu syeme baluo-mikyene

(Mat 23.1,5-7,14; Mar 12.37-40)

⁴⁵ Ñaala baara bwohono mu okagyughu nde, Yiisu ályele kundaa binduono bi nde ndiri:

⁴⁶ «Lisa mayele mu baluo-mikyene. Bo badzyi okabuludzie ya binkuru bi bila. Badzyi ti baara bakagwa bo mamboro mu bibini bi ookabvununu baara bwohono. Bo baakasuolo bibini bibi ku nkulu mu manzo mama lisamana mama ba-Dzwife, ya bibini bibi ku nkulu mu malagha.

⁴⁷ Baakagwohono bilogho mu manzo ma bapfili, ya baakasa nsamana yi nda mu kuulu baara bakamono bo. Mu obo, sa babagha masyeme ma maluru.»

21

Ekaba kii mupfili wu mukaha wu muwele

(Mar 12.41-44)

¹ Yiisu bu aseene mihi, ámono bisini bi bíkalo bikaba munsa elogho ki baakagwa bikaba.

² Nde ámono si mukaha mutsyini wu mupfiili wu áli muwele mu olo mana mipara myele.

³ Mu obo Yiisu ályele ti: «Me ndi mu olyele be enganma, ekaba kii mupfiili wu muwele wu eluru kii baara bwohono.

⁴ Mu kuulu, bo bwohono baalo nzi yi bagwene a yo esala, lo nde kunsu buwele bu nde, aalo nzi yohono yi aakakala a yo mu olaama.»

*Yiisu lyele ti Nzo a nzaami yi nene sa yitsanama
(Mat 24.1-2; Mar 13.1-2)*

⁵ Baara babake bákabili mu mi mitala Nzo a Nzaami yi nene, ya mu bu bátwu yo mu mameë ma mabwe, ya mu bilogho bi okagwa baara Nzaami bikaba. Mu obo Yiisu ályele:

⁶ «Etsughu eli kiili mu myehene mi lili mu okamono be, ka osyili si limeë litsyini ña yulu a limeë likimi o. Nzo yohono sa yibwa mu nsie.»

*Bilyimi bi biitswama-nkulu ya mpara yi aagya
(Mat 24.3-8; Mar 13.3-8)*

⁷ Bo báfwulu nde: «Muluo, mu nki matala mandagha mamu maatswighi, ya nki elyimi eesuo ti myehene sa mikala?»

⁸ Yiisu ábvuhulu bu: «Lisa mayele, mbwuru anyaa opfiri be. Mu kuulu, baara balagha akala baagya mu nkwumu a me ya olyele ti: “Wu me Kriste wu lili mu okakebe be!” Ya “Matala maato!” Ka linama bo o.

⁹ Ña liigyughu be nsia yi a mamvulu ya mandagha mama mpaatsala, ka likala a nza-lamweë o. Mandagha mamu mafaana otswama

ogya, lo masini ma nsie ka magya maswa-maswa o.»

¹⁰ Na mbihi oŋo nde ályele bo ti: «Ekaana e baara etsyini sa edzwana ya ki eke, nsie a mukogho mutsyini sa yidzwana ya yi a mukogho mukimi.

¹¹ Nsie sa yinyinji mu mpini yohono, ya nkolo ya nkolo bifulu bibi mabyele sa bibiri baara mu lipfu, ya biwala sa bigya. Mandagha ma maagwa baara nzalamweẽ yi alagha sa makala, ya bilyimi bi binene sa bimoŋono mu mayulu.

Omwehẽ banga a kana kimini, elyimi ki ebvulu bubwe

(Mat 10.17-22; Mar 13.9-12)

¹² Lo, nsomo-a-nsomo, sa basyimi be, ya sa bamwehẽ be kimini. Sa basa be muyala mu manzo mama lisamana ma ba-Dzwife ya sa bat-sili be mu boloko. Sa babiri be kundaa mikogho ya bamfumu mu nkooro a nkwumu a me.

¹³ Mu obo be sa libagha mpeene yi okala bampughulu ba me.

¹⁴ Ka limono mukolo mpara o mu mi liibili be ŋa baasa be muyala,

¹⁵ mu kuulu meme sa ngwa be mayele mama obili ya munzeele bi biisa ti bataara ba be bwohono ka bakughu okemene mandagha ma be bwunu we obwihi be o.

¹⁶ Si okala basyana ya bangughu ba be, baana ba ngughu ya baana ba taara, badzigghi ya bandughu ba be sa batyeghe be, ya sa badzwa babake ŋa kara li be.»

(Mat 24.9-13; Mar 13.13)

¹⁷ «Baara bwohono sa babele be mu nkooro a nkwumu a me.

¹⁸ Lo si lifu li be litsyini ku mutswi ka lipfighili o.

¹⁹ Mu nkooro a mukama a be sa libagha laama.»

Yerusaleme sa litsanjama

(Mat 24.15-22; Mar 13.14-20)

²⁰ «Da liimono be mampwumu ma bambum-bulu mu odzyi Yerusaleme, ligyhaba ti matala masala maasyili mpaala bvulu litsanjama.

²¹ Mu obo baara ba baakala ku etsulu e nsie kii Yude bafaana obara ku yulu a minguo, ba baakala na nsa Yerusaleme bapala, ya ba baakala ku bibiri banyaã oyasomo kunsu bvulu.

²² Bitsughu bibye sa bikala bitsughu bibi masyeme ma Nzaami, mu kuulu myehene mi básono mu Mukaana a Nzaami mitswighi.

²³ Mu bitsughu bibye, nyĩ mu bakaha ba baakala a mayimi ya basuomo! Mu kuulu nsie yohono sa yisomo kunsu mpara yi alagha, ya Nzaami sa asuo nkehe a nde mu baara baba nsie yi.

²⁴ Mitaara sa midzwa baara balagha mu mapee, sa babiri bo kunsu bunkana ku mansie mwohono, ya baara baala ka bali ba-Dzwife o sa badzyara Yerusaleme tee ku ookughu matala ma bo.»

Ogya o Mwana a mbwuru

(Mat 24.29-31; Mar 13.24-27)

²⁵ «Bilyimi sa bimonono kunsu tala, kunsu ngoono ya kunsu banomanomo. Na yulu a nsie baara bwohono sa bateghere. Nkele yi aafa ku

mubu ya mimpagha mi madza sa bigwa baara nzalamweẽ.

²⁶ Baara sa bakpa mu nzalamweẽ ña baatsimi bo mi mili mu ogya mu nsie nsyini, mu kuulu tala, ngoono ya banomanomo sa binyiñi.

²⁷ Ña mbihi oño *baara sa bamono Mwana a mbwuru mu ogya ña yulu a edzi*, mu lileene ya nsia yohono.

²⁸ Ña obaana omonono mandagha mamu, litemene ya litala ku yulu mu kuulu obvwughu o be oobehene.»

Efaana kii mufinge

(Mat 24.32-35; Mar 13.28-31)

²⁹ Ña mbihi oño Yiisu áti bo nkumu nsyini: «Litala mufinge ya miti myehene.

³⁰ Ña liikamono be ti mye mibaana omyehe masagha ma manyaghara, be liikasoolo ti mvulu a nsomo aabehene.

³¹ Behe si bumõ, ña liimono be mandagha mamu, ligyahaba ti Emfumu e Nzaami eebehene.

³² *Mu enganma* me ndyele be ti baara baba eseene ki bo bwohono ka basomo mu lipfu o obaana mandagha mamu mamonono.

³³ Yulu ya nsie sa biluru, lo mandagha ma me ka maluru o.»

Okala yeelee matala mwohono

³⁴ «Lisa mayele! Mikolo mi be minyaã obyí mu byiri, mu okolo mala, bwunu we mu mpara a nsie, kala pele etsughu ekye sa ebwa be ensihibi,

³⁵ mu kuulu sa ebwa ña yulu a baara bwohono ba bali ña yulu a nsie ti likoho.

³⁶ Mu obo likahala mihi ya lisamana matala mwohono, mu kuulu likala a makpa ma olughulu ŋa nkulu a myehene mi mili mu ogya, ya lileene otemene ŋa nkulu a Mwana a mbwuru.»

Bitsughu bi Yiisu bibi masini

³⁷ Bitsughu byehene mu nkara-a-mwiĩ, Yiisu ákaluo mu Nzo a nzaami yi nene, ya ákayiluhu mpyibi ku yulu a Munguo wu a mi-Olibve.

³⁸ Mu obo baara, bwohono bákagya kundaa nde epala-epala ku Nzo a nzaami yi nene mu ogyughu nde.

22

*Bamfumu bakuru mfwunu yi odzwa Yiisu
(Mat 26.1-5,14-16; Mar 14.1-2,10-11)*

¹ Kyiri kii mampa ma magwene a pfini, ki baakata Paake, ébehene.

² Bakwuru ba bangaa ba Nzaami ya Baluo-mikyene bákasagha bu baadzwa Yiisu, lo bo báli a nzalamweẽ a baara.

Yuda kihi otyeghe Yiisu

³ Ankoho Satana ásono mu mukolo a Yuda wu bákata Isikaryote. Nde áli mumõ ŋa kara li bantumumu kwumu a buolo (12).

⁴ Nde ágyene ayigwihini ya bakwuru ba bangaa ba Nzaami ya bakwuru ba baakakebe Nzo a nzaami yi nene, mu mi mitala bunu nde akughu otyeghe Yiisu kundaa bo.

⁵ Bo básomo kunsa esee ya bagwihini ti bagwa nde nzi.

⁶ Yuda ákihi ya ábaana osagha mpeene yi faana mu otyeghe Yiisu ku ogwene a mpwumu a baara ogyahaba.

Binduono bi Yiisu bigyighili bilogho bibi kyiri kii Paake

(Mat 26.17-19; Mar 14.12-16)

⁷ Etsughu kii mampa ma magwene a pfini éto. Kye áli etsughu ki baakadzwa mwana a endoomo mu ogwa mukaba, mu odza kyiri kii Paake.

⁸ Mu obo, Yiisu ágweghe Piere ya Dzã, ya ályele kundaa bo ti: «Ligye ligyighili bilogho bi liidza bihi-a-be kyiri kii Paake.»

⁹ Bo báfwulu nde ti: «Kunu-ako we dzyi ti bihi ligyighili bye?»

¹⁰ Yiisu ágwi bo mvuru yi: «Mono, ña liisomo be munsá bvulu, be sa libwana a baghala mutsyini ya yughu li madza. Linama nde tee mu nzo yi aasomo nde,

¹¹ ya lilyele nga a nzo bu: “Muluo bu afwulu we: Ngwumu a nzo yi aandza me kyiri kii Paake ya binduono bi me yini a yo?”

¹² Nde sa asuo be ngwumu yi nene yi a ku yulu ku oli bilogho byehene mukughu. Me omo be liigyighili bilogho bi-odza mu kyiri kii Paake.»

¹³ Bo bágyene ya bámono mandagha mwohonon ti bu ólyele bo Yiisu, ya bagyighili bi-odza bi kyiri kii Paake.

Nyuru ya makili ma Yiisu

(Mat 26.20,26-29; Mar 14.17,22-25; 1 Kor 11.23-26)

¹⁴ Matala mama odza bu mato, Yiisu ábwi nsini ya bantumu.

¹⁵ Nde ályele kundaa bo ti: «Me aandzyi ku olagha odza kyiri kii Paake ki ya be, nsomo-ansomo me mono mpara!

¹⁶ Mu kuulu me ndi mu olyele be yo, me ka aafirindza kye o, tee matala ma ootswighi kye mu Emfumu e Nzaami.»

¹⁷ Ya bu agwolo ebaha, nde ábvurulu matuono ya ályele ti: «Ligwolo ebaha ki, ya likaba kye be a be,

¹⁸ mu kuulu, me ndi mu olyele be, me ka afirinma mala ma bviini o, tee mu matala ma oogya Emfumu e Nzaami.»

¹⁹ Na mbihi oño, nde ágwolo limpa, bu abvurulu matuono, nde átsyiri lo, ágwi bo lo ya ályele ti: «Yi me nyuru a me yi bágwi mu be. Liikasa bu mu okalibili me mweẽ.»

²⁰ Bumõ si mu ebaha, bu bamana odza, nde ágwi bo kye ya ályele ti: «Ebaha ki eli ogwihini ku onyaghara mu makili ma me ma matsanama mu be.»

Yiisu lyele ti sa batyeghe nde

(Mat 26.21-25; Mar 14.18-21)

²¹ «Lo litala! Kwogho kii munde wu aatyeghe me eli emõ ya me ña yulu a tabele.

²² Mu enganma, Mwana a mbwuru faana ogye ti bu ogwaa Nzaami. Lo nyiĩ kundaa munde wu aatyeghe nde!»

²³ Mu obo, bo bábaana ofwulu bo-a-bo, nande ña kara li bo aagyighili ndagha oyo.

Nande bvulu bukwuru ña kara li binduono

(Mat 20.24-28; 19.28; Mar 10.41-45)

24 Binduono si bíbaana otsoho bye-a-bye mu ogyahaba nande bvulu babake bukwuru.

25 Yiisu ályele bo ti: «Mikogho mi mansie miika-tumu mansie ma bo, ya babo ba bali a litumu na yulu a mo, baakata bo ba baakasa mi mibwe.

26 Lo ka oli bubo o mu be, ka lisa obo o. Na kara li be, mbwuru wu bvulu bukwuru, akala ti wu bvulu bungagye, ya munde wu li mu okatumu, akala ti musala.

27 Nande bvulu bukwuru na kara li munde wu aalabala myili mu odza ya munde wu li mu okasalala? Ka oli munde wu aalabala myili mu odza o? Lo na kara li be, me ndi munde wu li mu okasalala.»

28 «Be lili babo ba baasi mukama ya me kunsu bigyeele.

29 Me mu obo, bu ógwi me Taara Emfumu, me obo si me aangwi be kye.

30 Mpaala be lidza ya lijma emõ ya me na tabele mu Emfumu e me. Ya be sa libwa nsini na makubu mu olamana madzumu kwumu ya muolo (12) ma Isarayelee.»

Yiisu lyele Piere ti sa atunu nde

(Mat 26.31-35; Mar 14.27-31; Dzã 13.37-38)

31 «Simõ, Simõ, Satana aaluomo we mu onyihwe ti bu baakakele bimburu bi bele,

32 Lo me aambuono Nzaami mu nkooro a we, mpaala kana li we linyaã obwa, ya mu matala ma akala aafiriyabvughuru we kundaa me, we gwa bambaala ba we bukyini.»

33 Piere ályele nde ti: «Mfumu, me aankughu mu osomo boloko ya mu okpa ya we.»

³⁴ Yiisu ábvuhulu nde ti: «Piere, me ndyele we: Mu mpyibi yi a lolo yi, nsomo nsuhu akwolo, we sa tunu nsa tere ti we ka gyahaba me o.»

Empogholo e nzi, bikoghoru ya lipee

³⁵ Yiisu áfirilyele kundaa bo ti: «Mu matala ma ángweghe me be ku ogwene obiri nzi, ku ogwene a empogholo, ku ogwene a bikoghoru, be áli liigweene a elogho?» Bo ábvuhulu nde ti: «Ti elogho we!»

³⁶ Ya, nde ályele kundaa bo ti: «Lo mu matala ma, wu li a nzi, agwolo yo, bumõ si mu munde wu li a empogholo, agwolo kye, ya wu gwene a lipee atyeghe enkuru ya aswumu lipee limõ.

³⁷ Me ndi mu olyele be ti, mandagha ma básono mu Mukaana a Nzaami mafaana otswighi mu me: *Baatwulu nde mu muluo a baara ba babi.* Mandagha mamo sa mamonono edzi-dzighi mu me.»

³⁸ Bantumú bályele kundaa nde ti: «Mfumu, mapee mwolo mama.» Nde ábvuhulu bo ti: «Ookughu!»

*Yiisu buono ku Munguo wu a mi-Olibve
(Mat 26.36-46; Mar 14.32-42)*

³⁹ Yiisu ápala ya ágyene ku Munguo wu a mi-Olibve ti bu óli epfu e nde. Binduono bi nde bínama nde.

⁴⁰ Bu ato oko, nde ályele bo: «Lisamana mpaala be linyaã obwa mu bigyeele.»

⁴¹ Na mbihi oño, nde ábulusihi bo ya ágyene mu etiiri ki bakughu otubu limeẽ, ákunu mabuo mu nsie ya ásamana.

⁴² Nde ályele bu: «Taara, kala we dzyi, maha me ebaha ki. Lo ka bu ndzyi me o, lo bu dzyi we.» [

⁴³ Mu obo ngye-yulu áfi ku yulu mu ogwa nde bukyini.

⁴⁴ Yiisu ámono mpara yi alagha kunsu mukolo, ya áfirisamana mu mpini yi luru. Tsughuru li nde líli ti mabere ma makili ma mali mu okatsolo mu nsie.]

⁴⁵ Bu amana osamana, átemene ya ágyene ku oli binduono bi nde. Nde áyabaha bye bigyonomo tolo mu nkooro a nyĩ.

⁴⁶ Yiisu ályele bye ti: «Mu emakye be li-igyonomo? Litemene, ya lisamana, mpaala linyaã obwa mu bigyeele.»

Bambumbulu basyimi Yiisu

(Mat 26.47-56; Mar 14.43-49; Dzã 18.3-11)

⁴⁷ Naala Yiisu nkini mu okabili, mpwumu a baara yígyi. Yuda, mumõ ña kara li bantumu kwumu a buolo (12), áayabiri mpwumu oyo. Nde áyasele ña bele a Yiisu mu onyuburu nde.

⁴⁸ Yiisu ályele nde ti: «Yuda, me mu onyuburu we tyeghe Mwana a mbwuru!»

⁴⁹ Na omono binduono bi Yiisu mandagha ma mali mu ogya, bye bífwulu nde: «Mfumu, lidzwana mu mapee?»

⁵⁰ Ya mumõ ña kara li bo ákaha musala a Mukwuru a bangaa ba nzaami ya atsyiri nde tswi líli kwogho-a-kwogho.

⁵¹ Lo Yiisu átsughu ndagha ti: «Linyaã! Lisa bwunu!» Mu obo, ábyeme tswi li mbwuru munde ya ádzuhu nde.

⁵² Na mbihi onjo, Yiisu ályele bakwuru ba bangaa ba Nzaami, bakwuru baba bankyele ba Nzo a nzaami yi nene ya bakwuru ba ba-Dzwife ba bágyi mu oyasyimi nde bu: «Be liigyí a mapee ya mimpagha, ti be liiyasyimi ntwumu,

⁵³ bitsughu byehene, me aakankala ya be mu Nzo a nzaami yi nene, ya be ka liisyimi me o. Lo li me tala lili ndaa be ya lili lileene lili mpyibi.»

Piere tunu ti nde gyahaba Yiisu

(Mat 26.57–27.1; Mar 14.53–15.1; Dzã 18.13-27)

⁵⁴ Mu obo, básyimi Yiisu, bábiri nde ya bágyene a nde ku nzo a mukwuru a bangaa ba nzaami. Piere ákanama bo la la.

⁵⁵ Bábvughu mbaa na kara-a-kara a mbala ya bábwí nsini. Piere ágyene ayibwa nsini ya baara ba bákagoro mbaa.

⁵⁶ Musala mutsyini wu mukaha wu áamono nde abwi nsini na nkwa-a-mbaa, átuunu nde mihi ya ályele ti: «Baghala wuhu si aali ya nde.»

⁵⁷ Lo Piere átuunu ya ályele: «Ma mwana, me ka ngyahaba nde o.»

⁵⁸ Mana matala bu maluru, mbwuru mukimi ámono nde ya ályele ti: «Wehe si li mumõ na kara li baara ba bo.» Lo Piere ábvuhulu nde: «Pele ta baghala, ka oli me o.»

⁵⁹ Tala litsyini bu liluru, mbwuru mukimi ágyighili onyeme: «Mu enganma baghala wu ya nde aali mu kuulu nde li musi Ngalile.»

⁶⁰ Lo Piere ágwi mvuru yi: «Me ka ngyahaba mi dzyi we olyele o.» Mu ena kyini ekye, naala Piere nkini mu okabili, nsuhu ákwolo.

⁶¹ Mfumu ákaghala ya átala Piere. Piere álibili mweẽ ndagha yi áli olyele nde Mfumu: «Mu mpyibi yi a lolo nsomo nsuhu akwolo, we sa tunu nsa tere ti we gyahaba me.»

⁶² Mu obo, Piere ábulupala ya ágwubulu mukaba a elili.

Baara batughu ya bakaha Yiisu

⁶³ Baara ba bákakebe Yiisu bákasebe nde ya bákakaha nde.

⁶⁴ Báfughu nde mihi ya bályele nde ti: «Bighili, nande aakaha we.»

⁶⁵ Bo bákatsyala nde bitughu ku oluru.

Ekwuru kii ba-Dzwife esi muyala a Yiisu

⁶⁶ Bwihi bu buki, ekwuru ki ba-Dzwife, bakwuru ba bangaa ba Nzaami ya baluo-mikyene bábvuñunu ebini emõ. Bo bátumu bayabiri Yiisu kundaa ekwuru ki ba-Dzwife.

⁶⁷ Bo bályele Yiisu ti: «Lyele bihi, kala we li Kriste.» Yiisu ábvuhulu bo ti: «Kala me ndyele be, be ka lisa kana o,

⁶⁸ ya kala me mfwulu be, be ka ligwa me mvuru o.

⁶⁹ Lo, obaana matala ma, Mwana a mbwuru sa abwa nsini ku kwogho-a-kwogho e Nzaami Nga-a-Mpwũ.»

⁷⁰ Bo bwohono báf wulu nde ti: «We me Mwana a Nzaami?» Nde ábvuhulu bo ti: «Beme lilyele ti me ndi nde.»

⁷¹ Mu obo, bo bályele ti: «Bihi-a-be ka liifirisyili a nzala a bampughulu o. Bihi bameme liigyughu mi mípala mu muñma a nde.»

23

Yiisu mu muyala kundaa Pilate

(Mat 27.2,11-14; Mar 15.1-5; Dzã 18.28,33-38)

¹ Baara bwohono bátemene ya bábirí Yiisu ña nkulu a Pilate.

² Bábaana oburulu nde mandagha bu: «Bihi liimono mbwuru wu mu okagwa baara ba bihi mutswi mpini, ya olighi bo banyaã ofiri mpagha kundaa Sedzare. Ya aalyele ti nde li Kriste ya Mukogho.»

³ Pilate ágwi nde efwulu ki: «We me mukogho a ba-Dzwife?» Yiisu ábvuhulu nde ti: «Weme lyele obo!»

⁴ Pilate ályele kundaa bakwuru ba bangaa ba Nzaami ya kundaa mpwumu a baara ti: «Me ka mono ndagha yi mbi yi oosi baghala wu o.»

⁵ Lo bo bányeme ya bályele ti: «Nde li mu okagwa baara mutswi mpini mu maluo ma nde, mu kuulu bakolo nkehe. Aabana ku Ngalile, aabululuru ku Yude lwohono, mu matala ma aagyi kunu.»

Pilate gweghe Yiisu kundaa Erode

⁶ Ña ógyughu Pilate mandagha mamó, nde áfwulu bo kala ti Yiisu musi Ngalile ali.

⁷ Ya bu agyughu ti Yiisu áli mbwuru wu a bula baba emfumu e Erode, Pilate ágweghe nde kundaa Erode wu áali si ña Yerusalemé mu bitsughu bibye.

⁸ Ña ómono Erode Yiisu, nde ámono esee ki elagha. Mu kuulu edzighi nde ákasagha omono nde mu nkooro a mi ágyughu nde mu Yiisu, ya nde ákadzyi ti Yiisu asa emamaã ña busu bu nde.

⁹ Nde ágwi nde bifwulu bilagha, lo Yïisu ka ágwi nde mvuru si nsyini o.

¹⁰ Bakwuru ba bangaa ba Nzaami ya baluo-mikyene báli onjo ya bákaburulu nde mandagha mu nzunju.

¹¹ Erode ya bambumbulu ba nde bási nde munkulu. Bu bamana otsaala nde, bálaha nde enkuru ki ebwe ya babvurulu nde kundaa Pilate.

¹² Na nsomo, Pilate ya Erode báli mitaara, lo mu etsughu kyini ekye, bo bákala bandughu.

Batsyiri Yïisu lipfu

(Mat 27.11-26; Mar 15.1-15; Dzã 18.39–19.16)

¹³ Pilate bu abvughu bakwuru ba bangaa ba Nzaami, bamfumu ya baara bwohono,

¹⁴ nde ályele bo ti: «Be liigyí a me baghala wu ya liilyele ti nde li mu okagwa baara mutswi mpini. Litala, me aangwi nde bifwulu ña mihi mi be, ya me ka aamono nde epfwumu mu mandagha ma lili mu okakwighi be nde o.

¹⁵ Erode si ka aamono nde epfwumu o, mu kuulu nde aabvurulu nde kunu. Mu olyele ti baghala wu ka aasi ndagha yi bakughu otsyiri nde lipfu o.

¹⁶ Mu obo, me otumu aantumu bakaha nde yini a nswa-nswa, ña mbihi onjo, me nde aanyaã agye o nde.»

¹⁷ *[Mu nswe kyiri, Pilate ákapaha mbwuru mutsyini mu boloko.]

* **23:17 23.17.** Mikaana mi mike mimi nsomo-a-nsomo ka mili ya etsulu ki o.

¹⁸ Lo bo bwohono mu emvununu bákehe bingubu ya bályele ti: «Dzwa baghala wu, ya paha bihi Barabase mu boloko.»

¹⁹ Barabase munde áli ásono boloko mu nkooro a baara ba bábihi litumu li bamfumu ba bvulu, ya mbwuru wu bádzwi.

²⁰ Mu kuulu nde ákadzyi onyaã Yiisu agye, Pilate áfiribili ya bo,

²¹ lo bo bákehe bingubu ti: «Komo nde na kuruwa! Komo nde na kuruwa!»

²² Pilate áfirilyele bo mu sa li li tere ti: «Bu nde nsa ndagha yi mbi aasi? Me ka aamono epfwumu mu nde o ki ekughu osa ti badzwa nde. Mu obo, me otumu aantumu bakaha nde nswa-nswa, na mbihi onjo me nde aanyaã agye.»

²³ Lo bo báfirikehe bingubu bi biluru, ya báluomo bakomo nde na kuruwa. Pilate ágyughu bingubu bibo.

²⁴ Mu obo, nde átsyiri ndagha bu bákadzyi bo.

²⁵ Nde ápaha mbwuru wu báluomo bo mu boloko, munde wu ásono boloko mu nkooro a baara ba bábihi litumu li bamfumu ba bvulu, ya ku bádzwi mbwuru, ya ágwi Yiisu na myaã mi bo mu kuulu basa nde mi bákadzyi bo.

Yiisu na yulu a kuruwa

(Mat 27.31-44; Mar 15.20-32; Dzã 19.17-24)

²⁶ Na ókabiri bambumbulu Yiisu, bábwana a musi Sirene mutsyini, nkwumu a nde áli Simõ. Nde ku manseghe áfi. Bákwichi nde mu obiri kuruwa na mbihi a Yiisu.

²⁷ Mpwumu a baara yi nene ya bakaha bakanama Yiisu. Bakaha bákabeere bitulu ya bákagwobolo bilili mu nkooro a nde.

28 Yiisu ákaghala, ályele bo ti: «Batughu ba Yerusaleme, ka lilili mu me o, lo lilili mu beme ya mu baana ba be.

29 Mu kuulu, mu bitsughu bi bili mu ogya sa akala balyele ti: “Esee kundaa bitini, kundaa ba bagwene oburu, ya ba bagwene osomo busuomo!”

30 Mu matala mamu, baara sa babaana olyele kundaa minguo mi minene: “Libwa ŋa yulu a bihi!” Ya kundaa minguo mi misala ti: “Lifughu bihi!”

31 Mu kuulu, kala basi mandagha ma kundaa muti wu mubihi, ema akala baasa kundaa muti wu akee?»

32 Mu matala maana mamu bákabiri si bantwumu buolo mu oyidzwa bo emō ya Yiisu.

33 Ŋa báto bo ŋa ebini ki bákata ti «Etyeghe kii mutswi», bákomo Yiisu ŋa kuruwa ya bantwumu buolo babo, mutsyini ku kwogho-a-kwogho, ya wu muke ku engbambogho.

34 [Yiisu ályele bu: «Taara, sa bo kolokolo, mu kuulu bo ka bali mu ogyahaba mi bali mu okagyighili o.»] Báti empa kii nga a bwehe, ya bákaba biko bi nde.

35 Baara bátemene oŋo ya bákatala. Bamfumu bákasa Yiisu munkulu ya bályele ti: «Nde aabvwuhu baara babake, abvwuhu nyuru a ndeme, kala ti nganma nde li Kriste wu ósuolo Nzaami!»

36 Bambumbulu si bákasa nde munkulu. Báýasele ku bele a nde, bágwi nde bviini lili ŋeē

37 ya bályele ti: «Kala ti we li mukogho a ba-Dzwife, bvwuhu nyuru a we weme!»

38 Ŋa yulu a kuruwa li nde básono bu:

«Wu me Mukogho a ba-Dzwife.»

³⁹ Mumō mu bantwumu ba bákomo ɲa kuruwa, átughu nde ya ályele bu: «We ka li Kriste o? Bvwuhu nyuru a weme, ya bvwuhu bihi!»

⁴⁰ Lo wu muke áfyee nde ya ályele ti: «We ka aakabara Nzaami o, we wu baatsyiri lipfu limō ti nde?

⁴¹ Lipfu li lifaana mu bihi a we bansa buolo mu nkooro a bigyighili bi bihi a we bi bibi, lo nde ka aasi ndagha yi mbi o.»

⁴² Ɗa mbihi oɲo, nde ályele kundaa Yiisu ti: «Yiisu, tsimini me mu matala ma ayabvughuru we kunsá emfumu e we.»

⁴³ Yiisu ágwi nde mvuru yi: «*Mu enganma me ndyele we, lolo li we sa kala ya me ku paradise.*»

Lipfu li Yiisu

(Mat 27.45-56; Mar 15.33-41; Dzã 19.28-30)

⁴⁴ Matala máto ku bele a mbihi a ntaã a minsene, ya mpyibi yíbwi ɲa yulu a nsie yohono tee mu matala mama matere ɲa mbihi a ntaã a minsene.

⁴⁵ Tala lípyini, ya nkpaɲa a eko yi áli mu Nzo a nzaami yi nene yíkagha ɲa kara-a-kara.

⁴⁶ Yiisu ákehe engubu ki enene: «Taara, *me mbvurulu mufulu a me ɲa myaã mi we!*» Nde abili obo, átaghaba.

⁴⁷ Ɗa ómono mfumu a ekuru ki bambumbulu nkama (100) mi míluru, nde ásyighi Nzaami ya ályele ti: «Nganma, mbwuru wu, mbwuru wu a bunsumu áakakala.»

⁴⁸ Baara bwohono ba bágyi mu mampwumu mu oyamono nde, bu bamono mandagha

ma máluru, bási myaã ña yulu a mitswi ya bábvughuru.

⁴⁹ Baara ba básoolo Yiisu ya bakaha ba bákánama nde obaana Ngalile, bátemene la la, ya bákatala mi míkáluru.

Badzyighi Yiisu

(Mat 27.57-61; Mar 15.42-47; Dzã 19.38-42)

⁵⁰ Óli a mbwuru mutsyini wu a ekwuru ki ba-Dzwife, nkwumu a nde Dzodzefe. Nde áli mbwuru wu mubwe ya wu bunsumu.

⁵¹ Nde ka áli kunsá mfwunu yi ósi babake mu odzwa Yiisu o. Nde áli musí Arimate, bvulu lí ba-Dzwife, ya ákakebe Emfumu e Nzaami.

⁵² Nde ágyene kundaa Pilate ya áluomo nde ebyimi e Yiisu.

⁵³ Bu amaha kye ña yulu a kuruwa, ádziní kye kunsá eko kii lino ya átwulu kye kunsá mpyeme yi bátsimi kunsá limeẽ, mpyeme yiili nkini ka bámaadzyighi mbwuru o.

⁵⁴ Kye áli etsughu kí bákagyighili mí mitala etsughu kii Sabate, mu kuulu etsughu kii Sabate áli ayi mu obaana.

⁵⁵ Bakaha ba bánama Yiisu obaana ku Ngalile, bágyene nzili mō ya Dzodzefe, bámono mpyeme ya bu bádzyighi ebyimi e Yiisu.

⁵⁶ Ña mbihi oño, bo bábvughuru, bágyighili mananaase ya maala, ya bágwumu mu etsughu kii Sabate, bwunu a bu óli mikyene.

24

Osighili o Yiisu mu lipfu

¹ Ya mu etsughu kii nsomo mu limiṇi, bakaha bágyene epala-epala ku mpyeme. Babiri mananaase ma bágyighili.

² Bámono ti limeē li baakakyi mpyeme baakimini lo la ya mpyeme.

³ Ya bu basomo, bo ka bámono nyuru a Mfumu Yiisu o.

⁴ Ya mu kuulu bo ka básoolo bu baasa o mu mi mitala ndagha yi, mono, babaghala buolo báyamonoṇono ṇa nkulu a bo ya binkuru bi biikasehene.

⁵ Bo bábagha nzalamweē, bápfununu masu mu nsie, ya babaghala babo bályele bo ti: «Mu emakye be lili mu okasagha munde wu li mweē ṇa kara li baara ba bákpi?»

⁶ Nde ka ali ṇa o, nde aasighili mu lipfu. Litsimi nsa mandagha nde ákalyele be, ṇaala nde nkini ali ku Ngalile.

⁷ Nde bu ákalyele ti: “Bafaana otyeghe Mwana a mbwuru ṇa myaã mi banga-a-masumu. Sa bakomo nde ṇa kuruwa, lo ṇa mbihi a bitsughu bitere, nde sa asighili mu lipfu.”»

⁸ Bo bálibili mweē mandagha ma ókalyele bo Yiisu.

⁹ Bámara ṇa mpyeme ya báyilyele mandagha mwohonono mamu kunda bantum kwumu ya mumō (11) ya binduono bibike byehene.

¹⁰ Mu bo óli Mari musi Mangadala, Dzaane, Mari maama a Dzake, ya bakaha babake ba báli ya bo. Bo bályele kunda bantum,

¹¹ lo bantum bámono ti mandagha ma ólyele bo bakaha máli bigwobolo. Mu obo, bo ka bási mo kana o.

¹² Lo Piere átemene ya ágyene mu ntyini ku mpyeme. Bu apfunumu, nde ámono yini a bisili bi bili mu nsie. Nja mbihi onjo, nde ábvughuru ku nzo a nde, ya ákinjimi ku olagha mu mi miluru.

*Mu nzili yi a Emawuse
(Mar 16.12-13)*

¹³ Ya mono, mu etsughu kyini ekye, binduono byele bíkagye ku bula butsyini bubu nkwumu a Emawuse. Etiiri nja kara a Yerusaleme ya bula bubo ekughu okala ampe bakilometere kwumu ya mumõ (11).

¹⁴ Bo bákabulubili mu mandagha mwohonono ma máluru.

¹⁵ Njaala bo mu okabulubili ya mu okabulutsoho, Yiisu áyasele ya ábvughu nzili ya bo.

¹⁶ Bo bámono nde, lo bo ka bákagyahaba ti munde áli nde o.

¹⁷ Yiisu áfwulu bo ti: «Be nsa ndagha lili mu okabulutsoho mu nzili?» Bo bátemene ya bámono nyĩ yi alagha .

¹⁸ Mumõ nja kara li bo, nkwumu a nde Kelepase ágwi nde mvuru yi: «Nja kara li baara bwohonono ba bali nja Yerusaleme, yini a we dzimini mandagha ma maaluru bitsughu bi?»

¹⁹ Yiisu áfwulu bo ti: «Emakye?» Bo bábvuhulu nde ti: «Mandagha ma maabwi mu Yiisu musi Nadzarete. Nde ali mubighili mumõ wu munene nja mihi mi Nzaami ya mimi baara, mu nkooro a bigyighili bi nde ya maluo ma nde.

²⁰ Bakwuru ba bangaa ba Nzaami ya bakwuru ba bihi baasi nde muyala, baatsyiri nde lipfu, ya baakomo nde nja kuruwa.

²¹ Bihi ali liikakala a bitsimi ti me nde aakwulu Isarayele kunsu bunkana. Lo, lolo bitsughu bitere biiluru, obaana bu ooluru mandagha mamu.

²² Mu enganma, ndaama a bakaha ŋa kara li bihi baalyele bihi mandagha mama okinjimi. Bo baagyene ku mpyeme epala-epala,

²³ lo ka baamono nyuru a nde o. Baayabvughuru ya baalyele bihi ti bo baamono bangyeyulu ba baalyele bo ti Yiisu li mweẽ.

²⁴ Ndaama a baara ba baakakala ya bihi baagyene ku mpyeme, ya baamono mandagha mwohonu ti bu oolyele bakaha, lo nde ka baamono nde o.»

²⁵ Mu obo Yiisu ályele bo ti: «Be lili baara ba bagwene a mayele. Ya be lili a mikolo mimi maleme mu osa kana mu mandagha ma ólyele mibighili.

²⁶ Lo, áli ofaana ti Kriste amono mpara mu mandagha mwohonu mamu ya asomu mu nsia a nde?»

²⁷ Na mbihi oŋo, nde ábaala bo mandagha mwohonu ma básonu mu nde mu Mukaana a Nzaami, obaana mu mi ósonu Moyidze, tee mu mi ósonu mibighili.

²⁸ Na báto bo ŋa bele a Emawuse, Yiisu ási ti nde aaluru bula bu bo.

²⁹ Lo bo bályele kundaa nde ti: «Agye o, kala ŋa ya bihi. Bwihi buugyili, ya mpyibi edzi-dzighi yibwi.» Mu obo, nde ásomu mu nzo mu okala ya bo.

³⁰ Na bábwu bo nsini mu odza, nde ágwolo limpa, abvurulu matuono, átsyiri lo ya ágwu bo lo.

³¹ Mu matala maana mamu, mihi mi bo mǐdzubulu, ya bo bábaghala ti munde áli Yiisu, lo

nde ádzimini ña mihi mi bo.

³² Bo bábili bo-a-bo ti: «Ña aakabili nde ya bihi a we mu nzili ya osuo bihi a we bunu-a-bo Mukaana a Nzaami adzyi olyele, bihi ka ali liimono esee ki eluru mu mikolo o?»

³³ Yini a mu mutala maana mamo, bo bátemene ya bábvughuru ku Yerusaleme. Bo báyibaha bantumumu kwumu ya mumõ (11) bábvununu ya binduono bibike,

³⁴ bo bályele ti: «Nganma! Mfumu aasighili mu lipfu, nde aayamonono kundaa Simõ.»

³⁵ Bo bályele bo mi baabwana a bo mu nzili, ya bunu-a-bo baagyahaba Yiisu mu matala ma aakatsyiri nde limpa.

*Yiisu monono a binduono bi nde
(Dzã 20.19-23)*

³⁶ Ñaala bo nkini mu okabili obo, Yiisu ndeme áyamonono ña kara li bo, ya ályele bo ti: «Edzuunu ekala ya be!»

³⁷ Bo bábagha nzalamweẽ yi alagha, mu kuulu bátsimi ti munde mupfu baamono.

³⁸ Lo Yiisu ályele bo ti: «Mu ema be lili a mikolo maã-maã, ya mu ema be lili a mikeme?»

³⁹ Litala myaã ya myili mi me, me me mu enganma. Libyeme me ya litala. Mufulu ka ali a nyuru ya miwehe o, ti bu lili mu omonono be ti me ndi a bye.»

⁴⁰ Bu abili obo, ásuo bo myaã ya myili mi nde.

⁴¹ Buulu bo báli kunsá esee, bo áli nkini ka básí kana o, ya báli kunsá okinjimi, nde ályele kundaa bo ti: «Be lili a elogho kii odza ña?»

⁴² Bágwí nde ekele e nswi ki bágyoho.

⁴³ Yiisu ágwolo kye ya áli ña mihi mi bo.

⁴⁴ Ña mbihi oño nde ályele bo ti: «Ma me mandagha ma ákandyele me be, mu matala maala me nkini áli ya be: “Myehene mi básono mu mikyene mi Moyidze, mikaana mi mibighili, ya mu Bikwumu mifaana otswighi.”»

⁴⁵ Mu obo, Yiisu ágwi bo mayele mpaala babaghala Mukaana a Nzaami.

⁴⁶ Nde ályele bo bu: «Mu obo, básono ti Kriste faana omono mpara ya sa asighili mu lipfu et-sughu kii bitere.

⁴⁷ Ya bafaana si otsala nsia a nde, obaana ña Yerusaleme tee ku mansie mwohono, mu kuulu baara bagyinj mayele ya babagha kolokolo lili masumu mu nkwumu a nde.

⁴⁸ Be lili bampughulu ba mandagha mwohono.

⁴⁹ Me be aangweghe Mufulu a Ngili wu ósi Taara a me misiini. Lo be, limakala ña Yerusaleme ña, tee matala ma lilaha be lileene lili ku yulu.»

Bagyene a Yiisu ku yulu
(Mar 16.19; Big 1.4-14)

⁵⁰ Ña mbihi oño, Yiisu ábiri bo tee ku bele a Betani. Bu aseene myaã ku yulu, nde áseme bo.

⁵¹ Mu matala ma ákaseme nde bo, nde ákaghaba ya bo ya bágyene a nde ku yulu.

⁵² Bo bu bamana obuono nde, bábvughuru ku Yerusaleme kunsá esee kii elagha.

⁵³ Bitsughu byehene, bo bákasyighi ya bákaseme Nzaami mu Nzo a nzaami yi nene.

Teke Sud-Ouest

Teke-Tyee: Teke Sud-Ouest (New Testament)

copyright © 2024 Wycliffe Bible Translators, Inc.

Language: (Teke-Tyee)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

6f558581-83f7-55dd-acef-3d682f6a705d